

Revu  
**LALIT**

Rs. 20.00

d e k l a s

Enn Piblikasyon Lagazet Lalit deklas

No. **117**

MARS-AVRIL

2015

EDITO : GVERNMAN LEPEP FAS A SOMAZ.....3

**DERIV RAMGOOLAM VER REYN MONARSIK ..... 5**

LANKET LAPOLIS LOR RAMGOOLAM: MANIPILASYON LOPINYON PIBLIK ..... 16

**NUVO GVERNMAN SAJ & BURZWAZI DISIK & KANN .....16**

JABALJAS & BULBAK....PAZ 24

**KART ID: LALIT MET "ELI LEPEP" DIVAN ZOT RESPONSABILITE .....30**

LALIT CHALLENGE: IS GOVERNMENT CEDING ON DIEGO GARCIA ..... 36

**LASINN KUMANS RANPLAS FMI KUMA PRETER DERNYE REKUR..... 39**



**INEGALITE DAN LEMOND....39**

# KONTENI

No.117

Mars - Avril 2015

Editorial: Guvernman Lepep Fas-a Somaz .....	3
Ki Nuvo Lopoziyon? MMM ek Travayis sorti afebli, <i>par Lindsey Collen</i> .....	4
Deriv Ramgoolam ver Reyn Monarsik: Inpinite: Warning Repete depi LALIT .....	5
Demokratizasyon Lekonomi: Frod, Koripsyon, Blansiman Larzan, <i>par Ram Seegobin</i> .....	9
Lanket Lapolis lor Navin Ramgoolam: Manipilasyon Lopinyon Piblik, <i>par Ram Seegobin</i> .....	9
Defans Legal Ramgoolam: Tu kalite dimunn tom dan pyez, <i>par Lindsey Collen</i> .....	9
Degringolad Ramgoolam & Mega-Proze Fyasko, <i>par Rajni Lallah</i> .....	10
“Inpinite” Dirizan inpe Partu dan Lemond: Sassou Nguesso, Prezidan Congo <i>par Rada Kistnasamy</i> .....	11
Nuvo Guvernman e Seki li Repezante, <i>par Alain Ah-Vee</i> .....	12
Nuvo Guvernman SAJ & Burzwazi Disik ek Kann, <i>par Rajni Lallah</i> .....	16
LALIT an Aksyon .....	17
Feb Lopoziyon Parlamter, <i>par Lindsey Collen</i> .....	18
Lopoziyon Extra-Parlamter .....	20
Jabaljas & Bulbak .....	24
Leson Nimero Enn: “Lavi Prive”, mansonz, konplo otur vol dan Kanpman Ramgoolam Ros Nwar .....	25
Leson Nimero De: Lyin ant Kanpman Ros Nwar ek Lamor dan Selil .....	26
BIDZE 2015: LALIT sumet propozisyon Minis Finans .....	28
BIDZE: Ki mezir pu Rodrig? <i>par Rada Kistnasamy</i> .....	29
“Kontrol Uvriye: Konn to Lennmi” (Versyon Kreol ek orizinal Angle) .....	29
Kart Idantite: LALIT met “eli Lepep” divan zot responsabilite .....	30
LALIT calls on Speaker of National Assembly: Kreol as Official Language .....	31
Let LPT a Nuvo Minis Ledikasyon: Lang Maternel kuma Medium .....	32
MLF Calls on new Minister Perraud: Priorities for Women’s Emancipation .....	33
Protocol of Assistance to Victims of Sexual Assault .....	34
Lamizik: Imans Travay Menwar pe fer <i>par Rajni Lallah</i> .....	35
LALIT Challenge: Is Government Ceding on Diego Garcia? .....	36
Loazis: Lekol ALternativ dan Lareynion, <i>par Jean-Yves Dick</i> .....	37
OXFAM: 1% dimunn posed Lamwatye Larises, <i>par Alain Ah-Vee</i> .....	39
Lasinn kumans ranplas F.M.I kuma preter dernye rekur .....	39
Netanyahu v/s Obama, <i>par Kisna Kistnasamy</i> .....	40
Komisyon Sindikal LALIT: Invitasyon pu Fim Harlan County, Kentucky .....	41
Intervyu Alexis Tsipras, lider Syriza dan Lagres .....	42

Remersiman pu vizyel: Le Monde Diplomatique

Pibliye ek inprime par LALIT, 153 Rut Rwayal, Port Louis, Repiblik Moris. Pri: Rs 20/-  
www.lalitmauriti.us 208 2132 ek 208 5551 lalitmail@intnet.mu

## **INFO INFO INFO**

Alokazyon Zurne Internasyonal Fam,  
Muvman Liberasyon Fam pe fer enn

### **Reynion Uver Fam**

Dimans 8 Mars.

Pu invitasyon, kontakte Rajni lor 5 253 4378

---

Fim K-Lib

Prosenn Fim Mars:

### **City 24**

par Jia Zhang Ke, 2008

GRNW. Kontakte Alain pu invitasyon

---

Ledikasyon pu Travayer & Immedia

### **Lansman**

**liv**

*Ti Bato Papye in 55 languages*

+ Mauritian Sln Language

+ Braille

Kontakte Lindsey pu konfirm dat

---

### **Lakey LALIT**

Merkredi 4 ek 11 Mars

4:00 -5:00 pm

Samdi 14 Mars

12:30 - 1:30 pm

kontakte Ram

---

Prosenn Reynion

### **BDS Mauritius**

Boykot, Dezinvestisman, Sanksyon

kont Israel

Vandredi 27 Fevriye

GRNW

Kontakte Kisna pu detay

---

**KOZRI lor**

**“Podkarst”**

par Helga

Merkredi 25 Fevriye

kontakte Lindsey

lor 208 5551

# GUVERNMAN LEPEP, FAS-A SOMAZ

Pandan dernye kanpayn elektoral, tu dimunn finn tann lalist promes ki Lalyans Lepep ti fer. Lerla kan finn ena Diskur Program ki Prezidan Repiblik ti lir, plizyer sa bann promes elektoral finn konfirme, e kan pu ena Diskur Bidze le 23 Mars, nu pu konpran ki mezir konkre guvernman pe propoze pu realiz so Program politik, ekonomik e sosyal.

## Serten Mezir deza applike

Li vre ki Guvernman MSM-PMSD-ML finn deza aplik serten mezir kuma ogmantasyon pansyon vyeyes e lezot alokasyon sosyal, kuma zel Permi-apwin, uver lanket lor iregularite ki ti arive su rezim Ramgoolam, me ena osi serten lezot size lor lekel zot paret pe met aryer ubyen buz fiz.

## Kart Idantite?

Lor kestyon Kart Idantite Biometrik, apre ki Lalyans Lepep ti anonse ki pu detrir Baz Santral kot stok tu linformasyon kuma lanprint dimunn, aster zot paret pe atann zizman lakur avan azir: deza zizman dan sa 2 ka kont Kart Biometrik finn retarde buku. An atandan dimunn ki pe tir kart pe oblize donn lanprint, e seki pe proteste kont donn lanprint pa kone ki pu arive apre le 31 Mars.

## Best Loser?

Pandan kanpayn elektoral, Lalyans Lepep ti deza anonse ki zot anfaver mintenir sistem Best Loser kominal: enn sistem ki reprezant enn veritab perversyon nu sistem demokratik. Ziska ler li pa kler ki zot pu fer pu konturn sa problem ki Komite Drwa Imin

Nasyon Zini finn sulve: pa kapav oblize kandida dan enn eleksyon zeneral deklar kominote si kalkil pu nom Best Loser baze lor sif resansiman 1972. Travayis ansam ek MMM avan eleksyon, ti vot enn mini-amandman tanporer pu permet fer eleksyon mem si ena kandida pa deklar kominote: anfet zis enn tyer kandida pa ti deklar kominote. Seki Duval ek Depite Selvon paret pe propoze se pu re-aktualiz klasifikasyon kominal dan resansiman, e lerla kapav gard Best Loser kuma li ete. Sa li pu reprezant enn rekil istorik pu demokrasi, e an memtan, li pe expoz sa stratezi legalist e bankal ki Rezistans ek Alternativ finn swiv pandan preske 10 an lor sa size la.

## Prodiksyon

Me se sirtu lor politik ekonomik ki Program Lalyans paret ena plis febles: dan Diskur Program pena okenn mansyon kriz grav ki Lindistri Sikriyer pe traverse: pri disik finn telman degradingole ki Guvernman pe oblize sibvansyon planter pu zot kontinye plant kann: sa sibvansyon la pu plis ki 200 milyon rupi par an. Kuma nu dan LALIT pe dir depi plizyer lane: disik e kann pena enn lavenir a long term, se pu sa rezon la ki nu pe propoz diversifikasyon agrikol ek prodiksyon manze. Guvernman pa paret konsyan sa problem la ditu, ek Minis Agro-Indistri finn mem dir ki disik ek kann pu rantab dan lavenir!

## Somaz

Pu kreasyon lanplwa, Guvernman paret pe depann buku lor sektor PME: me nu tu kone ki lanplwa dan ti e mwayin

lantrepriz, li byen instab, mal peye, e preker. Apre 4 an, 80% ti e mwayin lanrepriz fer fayit: alor pa zis sa sekter la reprezant enn gran gaspiyaz resurs, me li pa kree lanplwa stab.

Kriz ekonomik dan Lerop pe kontinye: lindistri turist pu kontinye geyn problem, lindistri textil parey. Ek depresyasyon Euro, mem sekter informatik pe kumans ralanti.

## Enn nuvo politik ekonomik

Si sa nuvo Guvernman pa pran konsyans gravite sityasyon ekonomik, si zot pa pare pu reflesi lor nesessite enn Politik Ekonomik Alternativ, alor byen vit zot pu truv zot mem dan problem: somaz pu kontinye ogmante, lanplwa pu vinn de plizanpli preker e sezonye, lekar ant ris ek pov pu kontinye agrandi.

Prodiksyon ki garanti anlwa LALIT pu kontinye amenn kanpayn pu enn sistem prodiksyon ki garanti lanplwa stab, asir sekirite alimanter. Nu pu kontinye lite pu sa sistem sosyalist ki kapav garanti enn meyer lavenir pu lamas dimunn.

## Diego

Avan eleksyon Lalyans Lepep ti propoz amenn Britanik divan Lakur ICJ, Lakur Nasyon Zini dan La Hay. Lerla, dan Diskur Prezidan, pa mansyon sa. Okontrer, Guvernman vinn propoz "koz-koze" ar Britanik ek Amerikan. Sa pu reprezant enn volt-fas.

# KI NUVO LOPOZISYON? MMM ek TRAVAYIS SORTI AFEBLI

Dan Lopoziyon ena Travayis ek MMM, tulde afebli gravman.

## Parti Travayis

*Parti Travayis* an lanbo: Ramgoolam finn arete, large lor kosyon. Tu dimunn finn soke ar so kofor ek valiz ranpli ar biye Rs2,000, Dolar US, Liv Sterling ek Euro. Li finn “step down” kuma lider, telman sarz ki pe pez lor li, li grav. Travayis ena zis 4 depite. Tu so sef-defil finn gayn enn bate bef. Sa larme swiver ki ti pe flat Ramgoolam lor MBC inn al kave par la.

Depi 7 an, LALIT pe averti lor danze Ramgoolam so inpinite, so reyn depli-zan-pli monarsik (Get nu lartik lor “Inpinite”). Zordi so bann abi expoze. Kan voler vizit so kanpman Ros Nwar, li kasyet so lavi prive ki li-mem li onte, e li ris enn seri dimunn rant dan so senario. Kan lapolis al fer lafuy kot li River Walk, sann kut la, zot dekuver enn veritab kavern Alibaba. Asterla, so ansyin Guverner Labank, li osi, lor kosyon, so ansyin Sef Servis Sekre, so ansyin Sef VIPSU, zot tu lor kosyon. So fam inn sibir interogatar 6 ertan. So metres inn sove, al Litali kot pena Trete Extra-disyon ar Moris.

Parti Travayis pa finn disosye li ar Ramgoolam. Okontrer, zot pe tuzur donn li benefis di-dut. Arvin Boolell nuvo port parol sa Parti Travayis konpletman diskredite la.

## MMM

*MMM*, li osi, an debandad: Bérenger, antan ki Lider, ti amenn MMM dan sa lalyans katastrof la. Si zame zot ti pu gayn elektyon, se limem ki ti pu sarye responsabilite prolonz sa reyn innyob Ramgoolam. Bérenger ti pu a blame si Ramgoolam ti gayn iminite kont purswit o-kriminel pandan 7 an. Ramgoolam ti pu kontiyn reyne ar inpinite parey kuma li finn fer deza plis ki 7-an.

Depi avan zot reysi konklir zot Lalyans modi, LALIT finn amenn kanpayn lannwit-lizur kont sa Lalyans ek so 2yem Repiblik la.

Tu zot simagri lor “2 pli gran parti”, tu zot manigans pu partaz puvwar dan kad enn 2yem Repiblik danzere, tu finn kraze kuma enn gran bokal vid ki elekter finn kud-pye le 10 Desam.

Kan kawnting fini, Bérenger azir vit pu kas lalyans, blam Ramgoolam.

Malgre zot 12 Depite, MMM byin afebli. E parmi, ena pe menas pu demisyone, kuma Barbier ek lezot. Klerman Steeve Obeegadoo ek Kavi Ramano inn byin ankoler, avek rezon. Ena posibilite ki MMM efrite pandan bann prosenn mwa.

## Guvernman

Me, Lalyans Lepep, ki finn eli, li pa enn veritab alternativ politik. Li enn lalyans kolmate vit-vit pu desann “Lerwa Lion”. E, la, par exanp, ena Raj Dayal, avek tu so lepase, pe rod monte. Ena PMSD ek MSM, ki pa tro diferan depi Travayist Ramgoolam, e dayer zot ti alye ar li ziska fek la. Zot pena enn program reyel pu sorti pei dan sa kriz sistem kapitalist finn kree. Zot ena zis enn-de “mezir”. Sertin zot mezir plito bon e zot dir zot “sosyalist inovativ”, me zot mezir napa konstitute sa kalite vizyon, sa kalite program an antye, ki sa lepok kriz dimande.

## Extra-Parlmanter

Buku nuvo parti ki ti gayn ponpaz lapres paret finn fonn, kuma Parti Sheila Bunwaree ek Roshni Muneeram. Parti Jack Bizlall ek Ashok Subron pe sibir konsekans lefet ki zot finn koltar sime pu Ramgoolam so Rolls Royce rule ver so 2yem Repiblik; setadir zot finn ale-mem avegleman avek zot politik pu enn “2yem Repiblik” ek pu reform elektoral kot “pa

deklar kominote”, respektivman, san remarke ziska tro tar ki Ramgoolam ti pe servi zot. Antretan, Bizlall so EDP anonse ki li “pena program” ditu. Alor, li ni agos, ni adrwat. Kant-a Subron so Rezistans, li finn dir li pe mars dan mem sime ki Parti Travayis, e sa paret vre, kan get so program santrist. Li pa viz “sosyalism” ditu.

Alor, LALIT ena enn gran responsabilite pu kontiyn devlop sa Program ki pu anfet chalennj sistem kapitalist, pu kontiyn kree vizyon sifizaman pratik pu sorti dan sa kriz profon dan lekel sosyete Moris finn rantre, e pu konvink klas travayer, dabor, pu dibut pu sa program la.

## ID KARD: Ver Destriksyon Data-Base Santral?

Kan LALIT ti demar petisyon enn 20-enn lorganizayson kont Kart Idantite Biometrik an 2013, nu ti krwar li enn batay vo lapenn amene kont sa “leta sirveyans” ki Ramgoolam ti pe instale, me nu pa ti krwar nu pu gayne. MSM ek MMM ti anfafer Kart la; tu dimunn ti paret kurbe divan Ramgoolam. Me, dusman-dusman, nu finn batir enn lafors imans kont kart, e asterla Guvernman Jugnauth inn angaz li pu detrwir data-base santralize avek so lanprint ledwa ek foto biometrik ki stoke Ebenn. Amizir sa vinn enn viktwar, nu bizin gard presyon pu ki: Lalwa osi amande pu ki li pa obligatwar pu ena enn Kart Idantite, ni li pa obligatwar prezant li a lapolis.

Pu kopi  
**PROGRAM LALIT**  
get nu websayt  
[www.lalitmauriti.us.org](http://www.lalitmauriti.us.org)  
dan seksyon  
“Manifestos and Programs”.

# DERIV RAMGOOLAM VER REYN MONARSI

## INPINITE: WARNING REPETE DEPI LALIT

Depi byin lontan LALIT pe averti dimunn ki Ramgoolam pe azir kuma enn “monark”. Nu finn donn warning lor manyer li pe akimil puvwar dan so biro Premye Minis (PMO); nu finn mem akiz li azir kumadir Louis XV ki ti dir “L’Etat c’est moi”.

Kan dimunn reyne kuma enn monark, kuma lerwa, kan li akimil puvwar dan so lame, ki sa prodir?

### Inpinite

Dabor, li prodir inpinite. Sa vedir Ramgoolam pa ti krwar zame li pa pu gayn naryin. Lalwa inn fer zis pu lezot dimunn, li krwar, pa pu li. Li kapav fer seki li anvi. Se sa ki bann monark lontan ti pe fer. Akoz zot ti benefisyee “inpinite”. E dan so Proze 2yem Repiblik ansam ar Bérenger, li ti pu gayn 7 an iminite depi tu purswit, mem o-kriminel. Sa kalite iminite la ti pu garanti inpinite. Anfet avan eleksyon DPP finn atir latansyon lor sa problem la.

### Hording

Answit, enn reyn monark prodir tandans “hording”. Reyn lerwalarenn, tu rezim monarsik, finn karakterize par ramas larzan, ankes li dan kofor, ramas li dan susold.

### “Classe”

Ramgoolam, kuma lerwa, krwar ki lefet li ena loto Rolls Royce enn siyn ki li ena “classe”. Anfet li selman sinifye ki li ena kas. So Rolex, so Astin Martin, so Rolls Royce, tusala ansam ti viz pu montre so klas, setadir ki li enn seyner feodal.

### “Scratch a liar, find a thief!”

Me, ena lezot zafer ki inportan. Kan kikenn koz manti, sirtu kan li viv manti lor letan, kuma Ramgoolam finn fer otur so lavi prive, sa vedir li pe vinn enn labitid. E



Desin Escher, Kib, Extre

kuma Angle dir: “*Scratch a liar, find a thief*”. Kan kikenn koz manti, si u grat sirfas la, ki u pu truve? Li enn voler. Setadir, dimunn koz manti avek enn bi pu kuver enn lot kiksoz; u pa koz manti pu naryin, pu naryin. Alor, mansonz li enn siyn extern enn tandans. La, lapolis Moris inn grat sirfas enn mansonz; lor zafer kanpman Ros Nwar, Ramgoolam fer Gooljaury dir ki li ti dan kanpman ler voler ti pase (sirman akoz Ramgoolam pe rod maske so lavi prive ki li onte), e kan lapolis al fer lafuy kot li pu rod prev, zot al dekuver enn kantite larzan, ki pu byin difisil explik so provenans.

### Lavi Prive ki li onte

LALIT finn suvan ekrir lor manyer ki lavi prive enn zom (suvan li enn zom, parski sa konsep “lavi prive”, li enn konsep patriarkal, enn abi ki enn desandan depi “droit de cuissage” lepok feodal), fode pa li vinn enn dub lavi, parski sa antrenn mansonz, cover-up, etc. Ramgoolam, akoz so dub lavi, finn inplik enn seri dimunn avek mwins puvwar ki li repet so mansonz: so sofer, gard kor, sekreter, so kamarad,

mizisyin ki zve pu li, bann ki fer ketering, bann Brinks. E tu sa pu kuver enn dub lavi, pu lekel li, Ramgoolam, santi laont.

Buku dimunn avek puvwar abiz tu dimunn otur zot, e sa li suvan inkliir tretman abizif pu fam. Alor, dusman-dusman, nu pe realize ki Ramgoolam so lavi “prive” ti pe kasyet lyin sexyel ki li onte. Isi, li enn la-ironi ki Dominique Strauss-Khan, ki ti pu vinn Prezidan Lafrans, an disgras anmemtan ki Ramgoolam, ki ti pu vinn Prezidan Moris; DSK an-tray pu “proxenetism agrave”, kot prostitye zordi pe vinn dan lakur, dekrir fet organize pu, e petet par li, kuma “carnage” ek “boucherie”.

### Intox “Lerwa Lion”

Ramgoolam finn orkestre enn kanpayn otur enn limaz “lerwa lion”, *king of the jungle*. Sa osi LALIT finn kritike. Nu finn kritik tu sa bann Minis ki finn flat li, nu finn kritik MBC ki finn mont li kuma enn lerwa, nu finn kritik sindikalist ki finn akord li puvwar ki pa pu li, e nu finn kritik dimunn ki organiz sa bann grup fam ki ti pe vinn anbras li pu kamera MBCTV.

Zordi, tu sa flatratri, tu sa inpinite, tu sa hording, tu sa mansonz otur

so lavi prive expoze. Zordi tu dimunn get spektak enn ansyin Premye Minis su arestasyon, pe dibute kuma enn bechara kan lapolis pe kont par santenn milyon larzan likid, ki ti kasyet dan kofor ek dan valiz dan so lakaz. So fam pe sibir interogasyon. So metres finn al Litali zur kawnting ek 12 valiz, e Interpol pe rod li. So ansyin kamarad Rakesh Gouljaury paret pe vinn temwin Leta. So Guverner Labank Moris, R. Bheenick, li osi ferme. So ansyin sef Servis Sekre finn arete pu konplo ansam ar so ansyin sef VIPSU.

Tu dimunn pe dimande ki-manyer enn tel inpinite ti kapav kontiyne. Repons sinp li sa: buku dimunn ti konplis. A kumanse, dirizan so parti, dirizan so Guvernerman ar li, so bann alye kuma MSM, PMSD, MMM, so bann kamarad, tu sa bann swiver ki ti pe rod nominasyon, kontra, tennder, faver. E lezot dimunn pli etonan: Ashok Subron ek Jack Bizlall ki ti pe viz “drwa poz kandida san met kominote” ek “2yem Repiblik”, san zame truv zot rol dan ranforsi politik Ramgoolam, kan zot pe rant latet-bese dan zot “single issue”; e pa zis MBC, ki pli responsab, me lapres dan so lansamb pa finn reysi expoz so bann abi dan enn fason konsistan.

#### LALIT so Warning Klas IV

Zis avan eleksyon, setadir 30 Oktob 2014, nu ekrir, su tit: “*Elections X: The Ramgoolam-Bérenger 2nd Republic: A Toxic Bundle*”, “By contrast, Ramgoolam is not really interested in proportional representation [as he claims in order to rally support], except as a bait for drawing Bérenger into an alliance, which is what he did do. So, Ramgoolam’s priority has been, and will be, to use electoral reform so as to introduce what he is really after: a brand new semi-Presidential system that will accord him monarchic powers. Already, when he was Prime Minister in 2005, he started acting more like a king than a Prime Minister. He

even has mini-ministries inside his own Prime Minister’s Office: a *Culture et L’Avenir* cell, and a Diego Garcia cell, impinging directly on the territory of his Culture Minister or Foreign Affairs Minister, respectively.” <http://www.lalitmauriti.us.org/viewnews.php?id=1671>

Mem argiman lor “toxic bundle” ti pibliye dan video LALIT lor Youtube clips e dan nu program MBC/TV pu eleksyon.

#### Warning LALIT: “ Presidentialization” of the PMO

Avan sa, 4 Ziyet, su tit “The Bourgeois State in a Mess about Compulsory Fingerprinting” nu ekrir ki State Law Office “at the last moment, withdrew Government lawyers representing the Data Protection Commissioner, Ms. Madhub, leaving her stranded.... Initially, the State Law Office did not represent her, then they did, and as of yesterday, they don’t anymore ... This case is one of the absurd and infernal, yet logical, results of the autocratic process of ‘Presidentialization’ of the Prime Minister’s Office (PMO) under Navin Ramgoolam. Even without his dreaded ‘Second Republic’ that he is cooking up with Opposition Leader Paul Bérenger, his grabbing of more and more powers into the PMO itself, is finally producing indomitable conflicts. At the same time, the State Law Office has to defend the Prime Minister’s Office and the MNIC (Mauritius National Identity Card) which falls under the PMO, and which is putting duress on citizens to give fingerprints for ID cards, while also having to defend the Data Protection Commissioner, who is both ‘independent’ and in the PMO, and who has found the compulsory fingerprinting of employees ‘illegal’ and asked the Police to act against the bosses in two private enterprises.”

<http://www.lalitmauriti.us.org/viewnews.php?id=1622>

#### Warning LALIT:

##### “Like a monarch”

6 Zin 2014 su tit “Repressive Labour-MMM Coalition Orchestrated by the Capitalists Nears”, LALIT dir, “In fact, the electoral reform ... is nothing more than a hollow means of enabling this alliance to come true. It is an alliance desired by the bourgeoisie. It is an alliance that corresponds to the political and personal needs of the two leaders. But, it was very difficult to bring it about. They had to find a power-sharing formula. The electoral reform, itself a retrograde hodge-podge, is the means towards this. ... All in all, with Ramgoolam acting like a Monarch and Bérenger dictating to his party, the coalition means the threat of a very repressive Government.”

Source: <http://www.lalitmauriti.us.org/viewnews.php?id=1603>

#### Avertisman par Lindsey Collen: “Formule monarchique”

*Week-End* 31 Mars, 2014, dan enn lartik su tit, “Réforme électorale: Totale déception de Lalit”, enn manb dirizan LALIT Lindsey Collen dir, “Au lieu d’un renforcement de la démocratie, nous constatons que des mesures dans le document Ramgoolam vont dans le sens contraire, notamment le silence du Consultation Paper au sujet du choix du Pm en remplacement de la formule monarchique en vigueur.”

<http://www.lemauricien.com/article/reforme-electorale-totale-deception-lalit>

#### Avertisman par Ram Seegobin: “Style monarchique”

Enn manb dirizan LALIT Ram Seegobin dir dan enn intervyu *Week-End* su tit: “Les jeux politiques ne sont pas encore faits”, ki “Navin Ramgoolam a

*développé un style monarchique qui convient à ses ministres, qui ne peuvent ouvrir la bouche sans le féliciter de son talent, de son génie, des décisions qu'il prend."*

<http://www.lemauricien.com/article/ram-seegobin-les-jeux-politiques-ne-sont-pas-encore-faits>

### **Warning LALIT dan trak: "Ramgoolam took the Diego Garcia dossier [from] Foreign Minister"**

Le 31 Ziyet 2013, LALIT ti distribye enn trak an Kreol kont akimilasyon puvwar dan lame Ramgoolam. "Navin Ramgoolam took the dossier out of the hands of his Foreign Minister Arvind Boolell, and set up a Unit in the Prime Minister's Office to look after the issue."

<http://www.lalitmauritius.org/viewnews.php?id=1514>

### **Lindsey Collen: "Enn espes monark"**

An Mars-Avril 2013 dan Revi ek lor web, nu dir klas kapitalist reyne atraver "enn sistem demokratik moyon kot nu elir enn espes monark, enn Premye Minis".

[http://www.lalitmauritius.org/resources/documents/208-Magazine\\_revi\\_lalit\\_number\\_108\\_\(creole\\_version\).pdf](http://www.lalitmauritius.org/resources/documents/208-Magazine_revi_lalit_number_108_(creole_version).pdf)

### **Warning depi LALIT: "Abject flattery of the 'monarch'"**

Dan bilan 2012, le 3 January 2013, LALIT koz lor, "generalized abject flattery of the 'monarch', Navin Ramgoolam. Men and women fawn to him in public. This bizarre feudal ritual is then broadcast over the MBC TV. Ministers, trade unionists, political agents, women, all bow down, cow-towing. All that's missing is for a tailor to sew an invisible suit for the emperor."

<http://www.lalitmauritius.org/viewnews.php?id=1475>

### **LALIT servi limur pu expoz Ramgoolam**

Dan Revi LALIT Nov-Des 2012, personab fiksyon koz lor the two fictional clownish commentators, Jabaljas & Bulbak, say:

**"Jabaljas:** "Bann Britanik zot exper lor zafer monarsi.

**"Bulbak:** Tole dir kapav et li finn al zwenn Larenn Elizabeth, pu gayn enn-de tiyo lor rol monark.

**"Jabaljas:** Aret fer to futan, Bulbak. De tut fason, mem si Ramgoolam suvan pa dan peyi isi, so vizyon pu Moris kontinye parey. To pa finn tann tu bann Minis dir ki tu devlopman ki fer, se gras a vizyon nu Premye Minis Navinchandra Ramgoolam."

[http://www.lalitmauritius.org/resources/documents/207-Magazine\\_revi\\_lalit\\_number\\_107\\_\(creole\\_version\).pdf](http://www.lalitmauritius.org/resources/documents/207-Magazine_revi_lalit_number_107_(creole_version).pdf)

### **Ramgoolam servi isyu Best Loser "pu proklam limem kuma enn monark"**

Revi LALIT Nov-Des 2012, su tit: "Danze Nuvo Konstitisyon ek 2yem Repiblik a-la-Ramgoolam" LALIT dir ki Ramgoolam "kont BLS me ena fwa li kont zis klasifikasyon kandida. Li servi sa isyu la pu proklam limem kuma enn monark. Par examp, kan Privy Council statye ki Rezistans bizin pey kost, ranburs depans ki Leta finn fer pu so defans divan Komite Drwa Imin, Ramgoolam personelman dir li pa pu klem sa depans ki Leta Moris finn fer. Seki Lerwa Ramgoolam dir, samem – PTr pena pozisyon lor BLS, Guvernman plis na pena enn pozisyon, Leta ancor plis pena enn," kot nu dir li pe vinn "enn repiblik fuka a-la Alice-o-pei-de-mervey."

### **Warning Klas III depi Editorial Revi LALIT**

An Sep-Okt 2012 "Li reysi ranforsi li, mem kan li pe rod vinn enn "monark", mem kan li kareman konfese ki li anvi vinn

Prezidan avek buku puvwar. Mem kan travayer lindistri sikriyer pe menas lagrev kont tablisman, tu evennman mars dan enn sel direksyon ki paret "inevitab", depi premye zur konfli, pu ki Navin Ramgoolam sorti "gaynan" – avek enn ti kudme Nita Deerpalsing, Shakeel Mohamed, Patrick Assirvaden, ek enn-de sindikalist. Parey kuma apre mem konfli an 2010. Setadir, samem Parti Travayist ki finn vot bann lalwa ki pe oprim laburer ek artizan zordi, samem Parti Travayist ki finn donn patron Tablisman sa bann milyar rupi kapital ki Lerop finn verse kuma konpansasyon, li sorti "gaynan" apre enn konfrontasyon travayer kont patron."

[http://www.lalitmauritius.org/resources/documents/196-Magazine\\_revi\\_lalit\\_number\\_106\\_\(creole\\_version\).pdf](http://www.lalitmauritius.org/resources/documents/196-Magazine_revi_lalit_number_106_(creole_version).pdf)

### **Avertisman par Alain Ah-Vee**

Manb dan ladireksyon LALIT Alain Ah-Vee, 6 Fev 2012 dan Revi LALIT ek lor nu websayt, su tit: "Trajectories of parties in the National Assembly" dir: "Navin Ramgoolam, ki ena enn fason byin partikilye diriz so parti, enn fason byen partikilye azir kuma Premye Minis. Li tultan pe viz ena plis puvwar dan desizyon, inpe kuma enn monark, enn stil ala prezidansyel, avek so bann diskur, so bindeful ar so lafil madam ki vinn anbras li 2 kote lazu. Dan rapor lor Reform Elektoral ki Ramgoolam finn komandite (Carcassonne) e kot li personelman finn donn brief, nu finn truve kuma Premye Minis pu ena puvwar, par exanp, pu nom enn serten nomb minis. Navin Ramgoolam pe fer Premye Minis vinn enn lot zafer net – li koz zis pu li, lor so prop nom; suvan pena Kabine Minis nanye ladan. Li tusel ki deside, par exanp, ki Leta pa pu reklam 'costs' ar Blok 104 apre ki zot finn perdi zot ka Privy Council, e li tusel ki finn anonse ki li pa an-faver deklarasyon



kominote – pa so parti, pa so Kabine, nanyen. Parey pu introdiksyon langaz Kreol dan lekol, li zis koz-koze ek enn-de dimunn, kuma Dev sipa Legallant, ki li dir finn konvink li, e lerla ep! li deside pu introdwir langaz Kreol!”

<http://www.lalitmauritius.org/viewnews.php?id=1350>

### Avertisman par Rajni Lallah

Dan enn lartik lor web, baze lor so kozri, Rajni Lallah, enn dirizan LALIT an Zanvyé, 2012 su tit, “The Political Situation in Mauritius, 2011 and early 2012”, dekrir manev Ramgoolam an detay otur muvman sindikal e ka lor Best Loser, “E [sa muv a] li azut dan sa prosesis kree enn “monark” depi enn Premye Minis ki Navin Ramgoolam pe fer. Ashok Subron so reaksyon a sa, se ki li enn desizyon “lozik”. Purtan zame Guvernman, ni mem Parti Travayis, finn anons so pozisyon lor konteni zot ka. Zis monark ki finn fer sa.”

<http://www.lalitmauritius.org/viewnews.php?id=1340>

### Avertisman par Rada Kistnasamy

Manb dirizan LALIT Rada Kistnasamy ekir lor nu websayt su tit, “Economic Crisis and the Trade Union Response”, ki malgre ki “Lalwa travay ERiA ek EReA, de lalwa [Ramgoolam] ki viz pu rann lisansiman fasil ek revandikasyon travayer pli difisil. ... Ena osi negosyater ki azir politikman pu ranforsi Navin Ramgoolam dan so rol enn monark ki li pe aspir devini. Nu rekonet fasilman ki ena negosyater ki fer apel suvan suvan a Navin Ramgoolam pu li intervenir ...” Rada Kistnasamy dir bizin “denons bann birokrat sindikal ki travay dapre azanda burzwazi ek azanda Navin Ramgoolam dan so rol enn apranti monark.”

<http://www.lalitmauritius.org/viewnews.php?id=1344>

### Avertisman par Rajni Lallah

Dan Revi LALIT Mars 2012 e lor nu sayt, lafin 2011 kumansman 2012, Rajni Lallah dir:”Onivo politik dan ka legal Rezistans ek Alternativ ek Blok 104 dan Privy Council, se pa avoka Leta ki anonse si pa Leta pu reklam costs ubyen non, se ... Navin Ramgoolam anpersonn. Ondire Leta se li. ... E muv la azut dan sa prosesis kree enn “monark” depi enn Premye Minis, enn prosesis ki Navin Ramgoolam pe met an-aksyon.

*Surs: Revi LALIT,  
No.103 Mars 2012. [http://www.lalitmauritius.org/resources/documents/193-Magazine\\_revi\\_lalit\\_number\\_103\\_\(creole\\_version\).pdf](http://www.lalitmauritius.org/resources/documents/193-Magazine_revi_lalit_number_103_(creole_version).pdf)*

### Avertisman par Ram Seegobin

Le 17 Zanvyé 2011, Ram Seegobin ekir lor websayt LALIT website, su tit, “Political Situation this fortnight”, ki “Increasingly everyone mainstream in the country from bosses to unionists, politicians to businessmen, mouths support for the Prime Minister and his ‘vision’ as an introduction to everything they say on any subject, as though he is the infallible emperor.” Sa montre kimanyer prosesis kree “anperer”, li pa zis Ramgoolam ki partisip ladan. Enn enn kantite dimunn ek mem institisyon ki partisip aktivman ladan.

<http://www.lalitmauritius.org/viewnews.php?id=1153>

### Avertisman par Ram Seegobin

Le 9 Avril 2008, setadir 7 an desela Ram Seegobin ti deza averti dimunn. Dan enn lartik su tit “Fas a kriz sistemik, Guvernman kimanyer pe azir, ki kalite lopoziyon pe leve?”, li dir: “Su presyon sa kriz la, Premye Minis pe vinn plis kuma enn monark. Li rul pei parey kuma enn lerwa rul

so rwayom. So Minis ek Depite, kuma senyer feodal, pa kapav koze san ki zot bizin rann omaz a sazes zot lider Navinchandra Ramgoolam, sanki zot zir obey-sans a li. Vizit Premye Minis a Bihar resaman ti enpe enn sinbol so reyn rwayal, kan li pe get vilaz so anset. Antretan, so Minis Finans Sithanen li kontinye so politik “bes latet, fonsé” ver katastrof neo-liberal. Li pe aplik mem politik ki Paul Berenger ti aplike kan li ti Premye Minis fek-la. Sithanen kontiyn ankuraz burzwazi dan so 4 klester otur mulen, biznes bayant later ek nasyonalite Morisyen, so ofshor, so turism frazil. E antretan travay kontiyn vinn pli preker. Sa tigit anlwa ki kree, li pa neserman pu dimunn ki bizin li. Li bon ena travay dan Saybersiti, me li pa ed 40,000 laburer kann ki finn e pe kontiyn lisansye, li pa ed 10,000 artizan, ni li pa ed 50,000 travayer lizinn tekstil ki finn e pe kontiyn met deur. Sa stratezi ti-antrepener ki Guvernman pe kontiyn, li plito amenn dimunn ver larwinn dan det. Anmemtan, pri prodwi de baz kontiyn monte, peniri alimanter pe kumans santi. E Guvernman azir, asontur, par vinn pli monarsik ankor?”

*Surs: <http://www.lalitmauritius.org/viewnews.php?id=722>*



Desin Escher, *Lib, Extre*

# DEMOKRATIZASYON LEKONOMI

## FROD, KORIPSYON, BLANSIMAN LARZAN

Depi byen lontan nu dan LALIT pe met an gard kont sa politik ki Ramgoolam ek so Parti Travayis ti apel “*Demokratizasyon Lekonomi*”. Guvernman Travayis (ansam ek PMSD, e parfwa MSM) ti mem ena enn “*Komisyon pu Demokratizasyon Lekonomi*” su responsabilite depite kuma Cader Syed Hossen e Nita Deerpalsing.

### Favoritism Institusionalize

Nu ti denons sa politik la parski li ti baze lor prinsip ki Guvernman pu favoriz serten kapitalist pu anpes burzwazi istorik akapar tu sektor ekonomik: nu ti denons maner ki finn inklir sa term “demokratizasyon” pu fer dimunn krwar li enn bon zafer, pu fer dimunn krwar ki pu ena kontrol demokratik lor devlopman ekonomik. Anfet sa politik “*demokratizasyon lekonomi*”, li finalman sa mem ansyen politik Travayist pu favoriz formasyon enn “burzwazi deta”. Me nu ti sirtu denons sa politik la parski li baze lor enn Guvernman Travayist servi puvwar diskresyoner ki Minis ena pu distribye kontra, pa zeometrik, permi devlopman ek morselman, pu donn enn lavantaz bann ti ek mwayin kapitalist ki pros ar Parti Travayis. Apre ki Navin Ramgoolam reysi instor enn spes “leta Travayis”, nu finn truv rezilta anterm koripsyon e favoritism: Ramgoolam ti kumans azir ondire li kapav distribye tu dibyen Leta, ondire pu li sa.

### Donan-donan

Finalman sa kalite politik la devlop enn laspe *donan-donan*: kapitalist ki pu benefisy gran faver depi Guvernman pa ezite pu kontribiye enn pursantaz pu ki “Leta Ramgoolam” kontinye apre eleksyon. Kareman kapav kuver “komisyon” ek “brayb” osi.

Kestyon ki nu bizin poze zordi se dan ki mezir PMSD ek MSM ki ti dan Guvernman ansam ek

PT finn konplis sa politik ki finn produr sa kaskad koripsyon, favoritism, frod, ek kontra bidon. Anu pa bliye ki kan MSM ti opuvwar, finn ena Sun Trust ek so batiman, finn ena konpansasyon 45 milyon ki Leta ti pey lafami Jugnauth, finn ena biye ar Aneerood Jugnauth so prop foto, ek Rs20 avek foto so Madam: tu sa pa tro lwin avek seki pe expoze zordi zur.

Kestyon ki nu bizin poze zordi, se dan ki mezir MMM finn

konplis ek sa kalite politik la kan Bérenger ti propoz Remake ek MSM, ubyen *Lalyans Linite e Modernite* ek Ramgoolam. Finalman nu bizin konklir ki ladireksyon MMM depi lontan nepli ena sa integrite politik ki nesese pu permet li truv politik “*demokratizasyon lekonomi*” pu seki li ete: sel priorite politik pu MMM ek so Berenger se ki maner pu ariv dan puvwar.

### LANKET LAPOLIS LOR NAVIN RAMGOOLAM

## MANIPILASYON LOPINYON PIBLIK

Depi ki lapolis finn uver lanket ek met sarz provizwar kont N.Ramgoolam pu “Konplo ek Blansiman Larzan”, buku dimunn dan peyi pe swiv derulman lanket, ek sirtu pe abazurdi ek sa som larzan ki finn dekuver dan lakaz ansyen Premye Minis.

Dan lagazet ek lor radio ena tu kalite spekilasyon melanze ek linformasyon ki parfwa vre ek parfwa invante.

Sa ti lartik la se pu fer nu rapel ki tu kontrandi lor derulman lanket lor lagazet ek lor radio, zot baze lor bann fwit linformasyon ki organize konzwinman par lapolis e media. Malerezman pena sa tradisyon kot polisye ki an sarz lanket fer enn pwin de pres pu inform piblik lor kot lanket finn arive. Linformasyon byen selektif, parfwa vre ubyen fos, transmet par serten polisye a serten zurnalist, e sa li uver sime pu lapolis e media fer enn manipilasyon lopinyon piblik.

Alor kan nu swiv derulman lanket ki lor lagazet ubyen radio, nu bizin tuzur gard antet ki sa kalite kontrandi la zot pa nesese man reflekt laverite, me zot kapav reprezant enn laspe laverite ki lapolis ubyen media ule servi pu manipil lopinyon piblik.

### DEFANS LEGAL RAMGOOLAM

## TU KALITE DIMUNN TOM DAN PYEZ

Milan Meetarbhan, reprezantan Ramgoolam UN, finn donn enn apersi defans legal Ramgoolam: Kapav li pu dir sa Rs220 milyon pa pu li ditu, me pu Parti Travayis. Dayer, Ramgoolam dir li pa finn pran komisyon, ni brayb. Kan li dir, “Pa pu mwa sa larzan la, pu Parti Travayis!” li zis defans Ramgoolam. Difisil mazinn ki li ena enn lot.

Purtan, ena dimunn pas tu zot letan tom dan sa pyez la. Zot fer krwar ki sa larzan la vreman pu Parti Travayis. E, li ilozik net pu fer sa, e sa pu 2 rezon. 1. Avek tu sa larzan la, li finn perdi eleksyon; lepep inn kondann li demokratikman. 2. Seki Ramgoolam inn fer deza riske ilegal: Financial Intelligence & Anti-Money-Laundering Act dir ki tranzaksyon plis ki Rs500,000 likid li ilegal de tutfason. Me, kontrol birokratik par Leta lor parti politik byin vit pu vinn kontrol par “rezim” opuvwar. Li danzere pu opozan politik. Samem kifer LALIT tultan pronn kontrol demokratik. e.g. Revok depite.

# DEGRINGOLAD RAMGOOLAM & MEGA-PROZE FIASKO

Apré ki nuvo Guvernman “Lepep” finn instale, finn kumans ena lanket apré lanket lor tu sa mega-proze guvernman Ramgoolam ki finn fer fizet. Sa bann lanket-la finn kwinsid avek arestasyon Ramgoolam lor sarz konspirasyon ek blansiman larzan, apré ki finn dekuver Rs220 milyon an likid kot so lakaz. Li pa etonan si tu dimunn kumans poz lakestyon eski sa 2 ka-la liye? Ramgoolam finn deklare ki zame dan so lavi li pa finn pran okenn komisyon, ni fer okenn transfer fon deor. Ramgoolam pe pretann ki tu sa larzan-la sorti depi donasyon a PT. Sa so defans. Larzan la pa pu li; li sanse zis pe gardyin li pu so Parti!

Me kimanyer Ramgoolam gayn otan baking finansye? Eski li depi biznessmenn isi ek lot pei ki ti pe anvì gayn enn baking guvernman pu zot proze uswa gayn enn par kontra dan gran-gran proze? Kifer guvernman Ramgoolam finn amar li avek enn seri gran-gran proze fizet ki kut par milyan rupi e lerla vinn enn surs lapert pu pei? Anu gete ki finn arive.

**Sime Terre-Rouge-Verdun fele**  
Nuvo sime Terre-Rouge/Verdun, ki finn bizin ferme telman ena felir ladan, finn kut Rs4 milyar. Lanket montre ki ena posibilite kover-ep: ti deza ena felir avan ki livre sime, 10 mwa avan ki sime-la uver. 2 inzenyer ki ti ansarz kordinasyon sa proze-la avek Colas finn sispann. Minis Bodha, ki finn ranplas Minis Bachoo, finn dir ki *Road Development Authority*, enn institisyon ki semi-privatize, (dan lesans ki Minis ek Minister Travo nepli direkteman responsab pu sime) ena buku responsabilite ladan. E ex-Minis Bachoo pe dir vit-vit ki li pa ti okuran ki ena felir.

Sa katastrof dan sime kot Valton, li vinn azute avek

katastrof Ring Road, ki li osi, sipoze enn premye proze pu dekonzestyon Port Louis. Sa osi ti enn gro proze Rs1.2 milyar, e sime la finn efondre.

Pa zis larzan publik finn dilapide, me anmemtan, sa 2 sime rwine-la reprezant enn gran lapert dan lesans ki rezon ki ti fer zot se pu dekonzestyon Port-Louis, e Port Louis tuzur bloke granmatin tanto. Plis, kantite larzan ki pu nesese pu reparasyon kapav imans.

## Dream-Bridge abandone

Apré ki zot ti anons bel-bel proze Rs8 milyar *Dream Bridge* Lasalinn, guvernman Ramgoolam ti finalman desid pu pa al delavan. Selman li ti fini depans Rs194milyon dan fiz “konsiltan” dan sa proze-la.

## STC sibvansyonn *Betamax*

Guvernman Jugnauth finn kas kontra avek *Betamax* pu aprovizyonnan prodwi petrolye. Kan zot finn get kontra-la byin, zot finn truve ki *State Trading Corporation* (STC) ti pe pey 11 milyon dolar anplis sak lane pu fret. *Betamax* so prinsipal aksyoner se klan Jeetah/Bhunjun ek li ti gayn monopol lor transpor prodwi petrolye Moris depi Lenn. Sa kontra la ti siyne an Novam 2009 su guvernman Ramgoolam-


Duval, kan MSM ti pe fer lopoziyon “Iwayal” dan Parlman apré ki PT ti sutenir P. Jugnauth dan eleksyon parsyel Mars 2009. Antretan, komye kas inn perdi?

## Proze Neotown ek Jin Fei fonn

Guvernman Jugnauth finn osi rebran bay 58 arpan Neotown, enn bay 99 an kot Lasalinn ki guvernman Ramgoolam-Duval ti donn konpayni Patel an Desam 2009. Zame sa proze-la finn demare. Sanse sa proze-la ti pu kree 10,000 anplwa. Aster, ICAC pe demar lanket lor Neotown. Proze Jin Fei ti sipoze kree 30-40,000 anplwa, me li osi pa finn demare. Purtan guvernman Ramgoolam fini depans Rs100 milyon Rupì pu met sime, sistem dilo ek drin lor sa 172 ektar la. Guvernman Jugnauth paret finn desid pu respekete bay-la malgre sa, e li pe re-negosye lakor-la. Alor 2 imans but later otur Port-Louis ki ti kapav servi dan enn fason prodiktif, ki ti kapav servi pu kree anplwa, finn res dezer pandan 5 an. Ala lefe sa kalite koripsyon.

## Proze Metro-Leze antere pu lemoman

Guvernman Ramgoolam ti pe fini al delavan avek proze metro-leze avan eleksyon. Sa li enn kontra plis ki Rs22 milyar. Konpayni



Desin Picasso, *Toro*

"INPINITE" DIRIZAN INPE PARTU DAN LEMOND  
**SASSOU NGUESSO, PREZIDAN CONGO**

Indyin Afcon ki ti pu gayn sa kontra-la ek guvernman Lenn ti pu avans kredi pu sa proze la. Pandan kanpayn elektoral, Berenger, alye Ramgoolam, ti dir piblikman ki plivomye kontra la alwe apre eleksyon. Apre eleksyon, Jugnauth finn avoy Soodhun degaze al negosye avek guvernman Lenn pu ki sa laliyn kredi-la servi pu finans lot proze. La osi, enn gro proze ki ti ena kom bi pu truv enn solisyon pu anbuteyaz agrandisan transpor lor sime, enn problem ki byin irzan, finn fonn.

### Kart ID biometrik obligatwar

Guvernman Ramgoolam-Duval so proze kart ID biometrik so ku li Rs1.2 milyar. Sa osi finn fini par enn fiasko. Ziska nuvo guvernman Jugnauth finn bizin angaz li pu detrir databeys avek linformasyon biometrik ki finn pran avek dimunn ki finn tir nuvo kart ID. Remarke ki MNIC ti form parti biro Premye Minis Ramgoolam kan anfet sete Minis ICT Pillay Chedumbrum ki ti sipoze ansarz. Guvernman Ramgoolam ek guvernman Singapur ti siyn enn lakor ki ena kloz konfidansyalite sekivedir so konteni res sekre. Samem rezon ki Ramgoolam ek Pillay Chedumbrum ti pe refiz reponn keston Parلمانter lor ki konpayni finn benefisye kontra ID kard. La osi, pa zis ena dilapidasyon larzan piblik dan sa proze-la, me finn osi met a risk linformasyon biometrik enn popilasyon preske antye.

### Konklisyon

Remarke ki dan buku sa bann bel-bel proze-la, swa guvernman pa rann lakor piblik (kuma dan ka Neotown ek Jin Fei, ki zis aster finn vinn piblik) swa ena kloz dan lakor pu ki li res sekre (kuma dan ka kart ID biometrik), swa lakor fer par enn institisyon privatize u semi-privatize, kuma RDA. Sa kalite prosedir kot lakor res sekre, uswa pas par institisyon "semi-privatize" opak-la dan enn gran mezir permet ki kasyet koripsyon.

Avek bann dernye evennman lor dekuvert Rs220 milyon dan lakaz Navin Ramgoolam e ka otur kanpman Ros Nwar, li interesan pu get lezot dirizan politik dan lemond ki koni pu zot frask ek abi puvwar an tut inpinite. Ena plizyer parmi ki finn bizin kit puvwar apre sulevman popiler, ubyin apre kondanasyon par lazistis. Parmi ena Sylvio Berlusconi, Ben Ali, Khadafi, Mubarak, Jayalalthaa, Dominique Strauss Khan (DSK). Me, ena ki ankor opuvwar e pe kontiyn zwir. Parmi ena Denis Sassou Nguesso, prezidan Congo ki byin koni Moris, kan li ti vini an 2011, invite Ramgoolam.

An 2011 N'Guesso ti vizit Moris avek enn delegasyon 65 dimunn. Inkrwayab, me vre. Bi vizit se pu etablir relasyon dan kad enn lakor triangiler, sa osi ase etonan, "Moris-Congo-Singapur". Li pu interesan get ki ena deryer sa lintere pu rezim Ramgoolam devlop lyin ar N'Guesso ki byin koni pu so abi puvwar ek so trenn de-vi exazere. Eski ena bann kareteristik similer ant Ramgoolam ek N'Guesso lor manyer zot fonksyone kuma dirizan enn pei?

N'Guesso inn vinn opuvwar atraver enn ku deta. Li finn opuvwar ant 1979 a 1992 e avek presyon internasyonal finn organiz eleksyon lib an 1992. Apre enn labsans 5 an, li finn revinn opuvwar an 1997, e depi lerla li finn diriz Congo. Anmemtan li finn batir enn lanpir pu limem ek pu so pros. Dayer, *Transparency International* finn akiz N'Guesso ek so fami pu dilapidasyon reset petrol. Zot dir li finn servi sa larzan la pu aste par dizenn batiman dan Paris, aste loto de lix e uver par santenn nuvo kont labank. An 2006, FMI finn sispann led a Congo akoz tro buku koripsyon. An 2013, rapor lor index koripsyon, *Transparency International*, klas Congo lor nivo 154 lor 177 pei. Sa vedir li

truv parmi pei pli koronpi dan lemond. Purtan, Congo enn pei kot plis ki 50% popilasyon pe viv dan lamizer, malgre tu so resurs. Sassou N'Guesso osi koni pu akord tu kalite faver an-esanz pu relasyon extra-konzigal. (Numéro 329, Afrique Education).

Sa lax Congo-Moris-Singapur pa zis ekonomik, li osi ena pu fer avek 'lwayote' ant bann frer dan loz Franmason. Li pa enn sekre ki Navin Ramgoolam ek Denis Sassou N'Guesso tulde dan franmasonnri. Anfet lor Youtube, (<https://www.youtube.com/watch?v=5ejfRqi9a70> or), date Zanvye 2011 ena seremoni intronizasyon N'Guesso kuma Franmason. Dan sa mem lozik la, finn ena lapel Navin Ramgoolam pu N'Guesso sutenir kandidatir Jean Claude De L'Estrac, enn lot 'frer', dan so kanpayn pu vinn alatet Lafrankofoni. Zordi nu pa etone pu tann pozisyon ki J.C De L'Estrac finn pran kan li dir ki li pa etone ki finn truv tu sa larzan kot Ramgoolam. (*Le Defi* 17 Fevriye 2015), ondire li normal.

Zordi kan nu get sa proze repiblik ki MMM/PT ti pe prope, li kler ki Ramgoolam ti ena plan pu ki prosenn 7 an, vinn Prezidan enn nuvo repiblik avek plis puvwar, e sirtu avek iminite depi tu purswit. Sa resanble lintansyon Sassou N'Guesso, ki pe fini so 2yem ek dernye manda 7 banane an 2016, me ki, li usi, ena lintansyon sanz konstitisyon pu enn nuvo Repiblik ki pu permet li kontiyn res opuvwar pu tultan apre 2016!

Sa diktatir dan Singapore, ki ti met dibut par Lee Kwan Yew, enn zom Britanik, e ki zordi ena kuma Premye Minis so prop garson, ek Tony Tan, ki ti ansyin sef Singapore National Corporation. Ramgoolam ti akord kontra sekre Rs1.2 milyar a Guvernman Singapur, ki finn sukontrakte li atraver enn korporasyon nasyonal.

# NUVO GUVERNMAN E SEKI LI REPREZANTE

Sa lartik la baze lor papye ki Alain Ah-Vee ti prezante dan enn Seminar LALIT Zanvyé.

Li finn adapte pu inklir komanter par lezot manb LALIT prezan dan deba ki ti swiv so papye, e li finn met azur ziska 23 Fevriye 2015.

Li inpe boner pu nu konn oryantasyon sa nuvo Guvernman ki finn opuvwar selman 10 semenn, me kapav li vo lapenn get so natir, so konpozisyon, plis natir ek konpozisyon so bann konpozant. Nu bizin osi zet enn kudey lor so program ek so fason prosede deza vizavi problem ekonomik ek sosyal. Sa kapav donn nu enn lide, tuzur kot li pe ale.

## Eleksyon

Anu get kontex post-elektoral, swit a sa rezilta ki buku dimunn pa ti pe atann. Numem, dan kumansman kanpayn nu pa ti ditu predir enn tel rezilta. MSM, ki ti sipoze reprezant opizale 3%, PMSD otur 1% ek Muvman Liberater, fek ne, literalman 0%, finn ansam dan Lalyans Lepep defye tu pronostik. Dan enn kanpayn ki ti apenn 10 semenn, Lalyans Lepep finn gayn sutyin elektoral 51% popilasyon, e finn rafle 3/4 syez. E sa, kan Paul Bérenger ek Navin Ramgoolam ti pe predir enn viktwar pu zot mem, 60-0, ziska lafin kanpayn. Mem Aneerood Jugnauth dir li pa ti pe atann enn tel viktwar, ziska byin tar dan kanpayn.

Kimanyer zot finn reysi fer sa?

Dabor Lalyans Lepep, an pre-tandan li pe reprezant “tu klas” (setadir “lepep” an antye), li finn anfet gayn sutyin aktiv, mem parfwa surnwa, enn imans seksyon ti-burzwazi, sirtu preske totalite ti-burzwazi dan komers. E Moris, ena enn long listwar enn klas komersyal ki byin for, depi lepok Franse-mem. E sa bann klas otur ti-komers la, zot konn lev enn sertin listeri, e galvaniz enn sutyin (mem siperfisyel) byin vit parmi lamas dimunn, e ris enn

bon parti klas travayer, sirtu sa lamwatye ki travay pu sa-mem proprieter ti-komers ek ti prodiksyon la. Lor la, klas ti-burzwa birokatik, travayer sekter piblik e sirtu polisye, finn osi aktivman sutenir Lalyans Lepep, ankor enn fwa dan enn fason surnwa, byin surnwa mem.

Answit, kanpayn Lalyans Lepep ti byin koeran. Kan zot ti adopte slogan, “Vire mam!”, li ti enn slogan ki ena lafors dan so verasite, dan so lonete. Slogan la vedir ki Lalyans Lepep pe anfet aksepte lefet ki plis ki lamwatye popilasyon, mem 80%, ar Parti Travayis ek MMM (alor li pa pe kuyonn lepep, ni limem, ki li for, kan li pa for), e li pe dimann dimunn *sanz parti*. Sa finn donn so kanpayn enn perkitans inkrwabyab. E li finn vinn for. E byin vit.

Trwazyem fakter ti so 12 mezir popiler, kot li finn vremen etidye seki pe trakas dimunn, e li finn vremen vini avek mezir ki kapav fer dimunn anfet “Vire”. Dabor, so ogmantasyon pansyon par Rs1,300 par mwa pu retrete, dimunn ar andikap fizik ek mantal, pu vev. Li pre 200,000 dimunn. Zot finn “sulaze”, pu servi mo ki Guvernman finn adopte, setadir “sulaz” sa sufrans ki rezim Travayis finn provoke. Me, egalman inportan, sa fer Rs260 milyon ki pu al plizumwin direk dan pos ti-komersan. Dimunn mizer, kuma pansyoner, depans zot larzan anplis ar ti-komersan. Anplis, bonis 13yem mwa pansyoner pa ti kalkile pro-rata, me ti Rs5,000, li osi. Sa vedir enn lot Rs250,000,000 anplis dan pos ti-komers, otur lane. Alor, zis sa enn mezir la, li afekte tu pansyoner, tu dimunn dan ti-komers, e li

permet bann azan politik fer travay pli efikas, dan enn kanpayn elektoral kurt.

Enn lot seri “mezir” ki finn byin ed zot kanpayn, e sa li afekte sirtu, me pa inikman, proprieter taxi ki enn lot seksyon ti-burzwazi: permi apwin ti finn return 0 pwin e osi vinn mwin represif; dyezel ek lesans ti pu bese; nuvo masinn pu taxi sipoze dyutifri.

Me, 4yem fakter, e sa li pa grasa Lalyans Lepep, ti klerman inpopilarite Rezim Travayis. Apre 10 an, PT finn kit pei dan enn kriz anplwa, avek somaz byin ot. Kriminalite paret pe monte. Kriz lozman finn telman maske ki nepli ti kapav maske li. Transpor ek vwayaze finn vinn ser ek inefisyan. Ena koripsyon preske partu. Kominalism ti monte avek rol exazere bann “sosyo-kiltirel”. Ena kriz furnitir dilo. Alor, Guvernman sortan ti inpopiler net. Minis pa ti pe kapav al dan zot sirkonskripsyon. Travayis ti kupe net ar realite lavi dimunn ordiner dan pei. E ti ena tu kalite fwaye kontestasyon ki finn inplik buku dimunn. Kote nuvo ID Kard biometrik, dimunn ki finn tire osi byin ki seki’nn refize, finn ankoler. E finn ena manifestasyon lor dilo inpe partu. Ti ena lagrev dan lindistri sikriyer e ti menase dan transpor. Ti ena protestasyon kont CT Power. E Ramgoolam so favoritism anver so serk pros otur de li finn rann li partikilyerman inpopiler.

Tusala ti azute pu fer eleksyon vinn enn “eleksyon koreksyon”. Setadir, lurder “*incumbent*”, kuma zot apel li dan Lend.

Kan PT-MMM ti vinn prezant zot 2yem Repiblik, sa finn provok enn reze total dan popilasyon.

Pu kumanse labaz Parti Travayist napa dakor, ni avek enn Prezidan ar puvwar, ni ar Bérenger kuma Premye Minis. Kote Reform Elektoral, Travayis finn viseralman kont nerport ki form proporsyonel, pu rezon istorik. Ti ena enn gran muvman “*Down with PR!*”. Dan kumansman, PR ti ena enn move repitasyon net, avek rezon, parski li ti ule dir “rezi elektoral separe pu elekter sak kominote”. Answit, li ti ule dir, dan kad enn pei kot politik ti liye an-parti ar kominote, ki bann “minorite” ti pu res pli for. E, a lepok sa ti ule dir bann “elit” – Jules Koenig PMSD e reprezantan tablistman, Mohamed CAM e reprezantan gran komersan, Ah Chuen PMSD e reprezantan gro komersan, li osi. Alor, ena spes enn reze kont konsep “reprezantasyon proporsyonel” dan labaz Travayis, ki finn reste depi sa lepok la. PMSD ti mem amenn kanpayn (avek enn slogan ase vilger, anfet) pu fer enn kominote separe pu “Tamil” pu ki Da Patten, ankor enn reprezantan gran komers, azute dan sa kan “minorite” la.

Labaz MMM, li osi, pa finn dakor ni ar lalyans ar Travayis, ni ar 2yem Repiblik, sirtu kan sa ti pu akord zot lennmi prinsipal, Navin Ramgoolam, sa kantite puvwar la. Labaz MMM zame pa finn tro konvinki lor reprezantasyon proporsyonel. Zis Bérenger ki finn ale-mem ar sa, depi li finn vinn reprezantan kuran “ex-UDM”, enn prosesis ki kumanse zur eleksyon 1976 dan Quatre Bornes, kan Maurice Lesage kareman deziste anfafer Bérenger.

E lerla, MMM afebli ankor kan Ivan Collendavello, enn lider MMM, demisyone, form so ML, e li ena enn rol kle dan met Lalyans Lepep dibut.

Antuka, tu sa bann pwin lao la finn azute ansam pu fer mam vire. Tusala, finn fer bul vire net. E ver lafin kanpayn, SAJ pe predir enn viktwar 40-20. E anfet, viktwar la ti 47-13.

Alor, malgre baking sekter prive pu sa Lalyans PT-MMM, malgre ki sekter prive ti dezespereman anvi enn Guvernman for pu aplik losterite, ubyin kapav anparti *akoz* sa baking la, sa Lalyans la finn tonbe.

#### Konstitisyon Guvernman MSM-PMSD-ML

Alor, apre eleksyon ek nominasyon Best Loser ek nominasyon Kabine, nu gayn:

MSM 34 depite

19 Minis

5 PPS

PMSD 11 depite

4 Minis

2 PPS

ML 6 depite

2 Minis

2 PPS

OPR 2 depite

1 PPS

Bann Minister kle finn res ar MSM. SAJ inn gard linteryer, plis ena finans, ledikasyon, infrastruktir piblik ek zafer etranzer ar MSM.

#### Ki lintere diferan Parti dan Guvernman reprezante?

MSM ek PMSD partaz enn karakteristik an-komin: zot bann parti *dan puvwar*. E zot pa tro kone kimanyer opere dan Lopoziyon. Pa zis zot finn dan puvwar pandan buku letan dan zot listwar respektiv, me zot tulde ti dan puvwar ansam ar PT resaman.

#### MSM

Nu rapel ki MSM li enn amalgamasyon kasir depi MMM ek PSM, kot nu truv dimunn ki ti la odebi kuma Lutchmeenaraidoo, Coonjoo, Soodhun, Seesunkur, Bodha. Ena osi sertin ex-PT kuma Rughoobur, Boygah, e ex MMM kuma Sawmynaden.

MSM so reyn finn marke par seki dimunn ti apel “reyn SAJ”, 1983-1995. Dan LALIT, nu ti kalifye so reyn kuma “Bonapartist” dan sans ki parti la, par enn konkur enn ta sirkonstans disparat, ena kapasite inpoz so

volonte lor tu klas sosyal, mem lor klas kapitalis, ki pu divers rezon fek sibir enn defet e tuzur konvalesan, e kan klas travayer pa ase for ni organize pu li pran puvwar.

Anfet klas kapitalist ti deryer sa Lalyans PT-MMM, alor klas kapitalist finn anfet sibir enn defet, parey kuma li ti sufer kan Bérenger kit Guvernman Jugnauth an 1983, akoz Jugnauth ki pe konfront FMI-Bank Mondyal, alor ki Bérenger ti pe sede anver zot. E anfet, zordi, klas travayer inn byin afebli par sa reyn kapitalist finansye aktyel. Alor, kondisyon mir pu enn lot reyn “Bonapartist”.

MSM ena enn listwar antan ki Guvernman represif, nu bizin rapel. Li finn aboli Konsey Vilaz, siprim eleksyon vilaz; li finn atak sindikalis, ferme dan Alcatraz, lerla rekrit zot; li finn vot POTA; limem ti responsab interdiksyon enn roman nu manb, Lindsey.

Alor, ki klas MSM reprezante asterla? Li reprezant sirtu klas komersan (tipti sirtu), e nu finn mem truv enn mobilizasyon dan tit-burzwazi Chinatown kuma zame avan. Li osi reprezant burzwazi indistriyel, sirtu tekstil, e so baz li sa bann ti-sef PME. Remarke ki Guvernman inn anonse ki li pu akord Rs10 milyar pu bann PME. E, kuma nu finn dir, larzan ogmantasyon pansyon, li enn larzan ki byin vit fini dan pos ti-komers. Li finn osi reprezant polisye, e so promes pu permet sindikalizasyon finn galvaniz sa sutyin la.

MSM tultan finn privelezye lyin ar Lasinn, ek Sid Est Lazi. E sa pu kontiye. Mem si finn ena luvertir sa biro pu akseler komers ar UK.

SAJ tultan finn deklar limem enn “legalist”, alor li finn kas kontra ar Betamax me lor baz bann detay legal; li pe reget CT Power me anterm legal; li pe gard Purryag Prezidan, sanse akoz lalwa dir bizin. Me, remarke ki kapav li ena lezot vre rezon pu sa bann desizyon la. Par exanp,

kapav li ule fer plezir sa burzwazi Lazi deryer CT Power, kapav li ule gard plas Prezidan pu nom enn lot kikenn, dizon Bérenger, ubyin pu limem, li re-al laba.

Antuka, SAJ finn anonse ki “*Tout le monde est satisfait*” ar Diskur Program. Sa enn koze tipik enn reyn Bonapartist. Me, klerman dan sosyete de klas, swa li deza pa vre, swa li pa pu dire.

Antuka, Vincent d’Arifat, Prezidan MEF, dir Program Lepep anbisyé, e li pu donn tu so sutyin. R. Makoon anfafer IPP pu lenerzi, Prezidan JEC Ahmad Parkar dir Program la for ek pozitiv, e li kontan ki sektor prive pu ena rol dan kreasyon anplwa. Sen Ramsamy, Lindsay Riviere, Michael Atchia, mem Steve Obegadoo truv li globalman pozitiv, Shakeel Mohamed dir li pu veye ki tu bon promes realize, e mem dimunn kuma Eddy Sadien ek Vinod Seegum truv Diskur Program la bon.

## PMSD

PMSD aktyel li nepli sa PMSD Gaetan Duval, fasizant, avek so taper, so laliyn kont Lindepandans, pro-Lafrans, pro-burzwazi, reprezantan Legliz. Anfet sanzman la finn vini kan, dan bann lane 90 li kas an but, Xavier Duval, Maurice Allet ek Elizier Francois, e Rama Valayden, sakenn separe. Zordi Xavier Duval finn regroup tu le 3 but, otur bann teknokrat, biznessmenn, etc sirtu dan lavil. Anfet Xavier limem li enn exper kontab. Plis tuzur ena inpe lumpenn ar PMSD.

Me, so ansyin reflex ankor refer sifras tanzantan. So kominalism vinn aparant otur Festival Kreol, kan X. Duval Minis Tourism, e kot sa kuran idantiter prime. Mem nu retruv so ansyin reflex fasizant osi, par exanp, kan Beach Authority al met lakrwa nwar lor lafis partu kote.

## ML

ML li sirtu enn lel anti-Parti Travayis ki ti dan MMM. Collendavello limem ti sirtu koni kuma avoka patron. Li enn parti

ti-burzwazi lavil, avek Gayan, Boisseson, Rutnah.

### Program Lalyans Lepep

Bann lax prinsipal so bann “mezir” dan so program, ki pa tutafe enn “program”:

- Ogmant pansyon vyeyes ek tu lezot pansyon
- Ogmantasyon saler lor enn som fix Rs600 par mwa.
- Konbat lamizer – ar enn espes Plan Marshall
- Li viz diminye fardo lor seki pli anba dan lesel sosyal
- Li viz kree 15,000 anplwa par an.
- Li promet meritokrasi.
- Li pu met enn saler minimum vital.
- Sidsid iniversel pu lexame SC/HSC
- 10,000 nuvo lakaz dan 5 an pu dimunn mizer
- Li pu interdi sezi e lavant alabar lakaz dimunn par Sale-by-Levy, pandan 2 an akoz pa pe reysi ranburs peyman ar labank.
- Youth Employment Program pu garanti enn plas travay stab pu 2 an.
- Pu al ver 9-year schooling.

E, si get Program Lepep, u pu truv ki tu repoz lor PME kapitalist. Li so kolonn vertebral. Pena rol ni Guvernman ni koperativ ladan, apar dan enn fason plito marzinal. Alor, an parol zot kapav dir li “*innovative socialism*”, me li sertenman pena naryin de sosyalist ladan. Si li ti “*socialist*” tu patron pa ti pu dir kimanyer li enn bon program. Okontré, Guvernman Lepep ule remet lekonomi kapitalis anmars. Li ule profi ogmante, e li ule larises ogmante atraver plis explwatasyon. Guvernman propoz kolabore ar Sektor Prive pu kree larises nasyonal. Burzwazi ule, e pe gayn, enn Guvernman *for* e li inkarne par SAJ, SAJ ki finn deza inkarn sa kalite Guvernman for la avan. Rapel ki Bonapartism, li zwe ala-long anfafer burzwazi, mem li dornt burzwazi, kuma li dornt tu klas.

### Difikilte pu Guvernman Lepep

Asterla nu pe get fakter ki kapav amenn konfli dan Guvernman.

#### A. Kote lekonomi

Kan SAJ propoz enn “2yem Mirak Ekonomik”, nu bizin rapel

ki “Premye Mirak Ekonomik” li ti benefisyé sertain sektor lekonomi. Pa tu. Alor, ena sektor pa pu satisfé.

E si nu get kad zeneral dan lekel Lutchmeenaraidoo pe prezant so Bidze 2015, nu pu truve ki FMI ek Labank Mondyal pe met buku presyon. Nu kone Jugnauth finn deza reziste dan lepase (sa ti konfli ant li ek Bérenger an 1982-3), me sa pa ule dir presyon pa la. Par exanp, su *Konsiltasyon Lartik IV* (so nom sa) lane deryer, FMI finn dir bizin “reform” sistem pansyon. Sa vedir fer li sible. Alor, sa presyon la tuzur la. E dan lepase Guvernman Jugnauth finn deza fer pansyon vinn sible. Sa finn kut li eleksyon, dayer. Apre eleksyon, an Zanvyé, FMI finn sipozeman avoy enn delegasyon pu konfirm avek nuvo Guvernman sipa oryantasyon inn sanze depi so konsiltasyon an Fevriye 2014 ar ansyin Guvernman.

E kote Labank Mondyal, ena *Mauritius Systematic Country Diagnosis* ki finn deza sumet a Guvernman Moris e ki form baz pu enn nuvo *Country Partnership Framework 2015-2020* ant Labank Mondyal ek Moris. Sa lakor la ti pe diskite depi lane deryer ar Xavier Duval kan li ti dan Guvernman PT-PMSD. Zot pe anvi dan prosenn 5-6 an ki Moris rant dan klib pei “*high income group*”. Labank Mondyal truv “*social protection system*” dan Moris pa ase dan mul kapitalist, sirtu so sistem pansyon ek so led sosyal an zeneral. Zot pa dakor ek MSM-PMSD-ML so “*pro-social agenda*”. Zot pa dakor ki 20% bidze Guvernman al dan proteksyon sosyal, pu kumanse. Zot pa dakor ki permet sa 3.2% PIB lor pansyon miltipliye par plis ki 3 ziska an 2050, kot li pu anfet pu plis ki 10%. (Remarke ki mem zot “ekonomist” ar gran gran diplom, zot pa get komye plis marsandiz mem nomb travayer Moris pe prodir, non!) Antuka, zot gran preokipasyon dan FMI ek


Labank Mondyal se pu fer Welfare State vinn kadik. Zot mem truv pwa bidze pu lasante kuma tro lur, sirtu servis lasante gratis ki zot pa dakor! (Anfet, zot ule kapital prive gayn akse a investisman profitab dan lasirans, klinik prive ek medsinn dan lafarmasi. Tanki ena enn bon servis lasante gratis, sa 3 sektor kapitalist la natirelman pati.) Xavier Duval enpe pli pro-FMI, a premye vi, ki Lutchmeenaraidoo, ki finn siksed li. Sa kapav re-amenn mem zar problem ki an 1982-3 ant Bérenger, enn kote, ek Jugnauth/Bhayat lot kote.

Tuzur kote konfli otur lekonomi, kan ena kriz dan zonn Euro, diferan sektor afekte, e Guvernman ena tu kalite desizyon pu pran lor ki sektor li donn pli led finansye.

E, pu terminn seksyon lor konfli kote lekonomi dan Guvernman Lepep, kimanyer sa Guvernman la pu azir pu sey met fin a sa lagrev investisman lokal ki burzwazi finn deklanse depi plizir lane? Pu li rasir bann kapitalist, li pu bizin fer kit konsesyon. Me, a ki seksyon, ankor enn ku. Sa kapav kree disansyon dan zot lalyans ki finn kolmate osi vit avan eleksyon zeneral.

### B. Kote politik

Lalyans Lepep, li ant 3 konpozant. Me, get sa foto la (Alain montre foto), ena 4 lider ladan. Ki exakteman rol Pravind Jugnauth ladan? Sa kekyon la, li leker problem dan Lalyans. Li montre enn minmiz ase for par MSM lor Lalyans. Lerla sa, asontur, fer PMSD ek ML sey fer blok ansam pu ogmant zot pwa, par exanp, dan enn dine lane. E problem la vinn pli kler otur fitir Prezidans Dr. Ameenah Gurib-Fakim. Nuvo Prezidan, dapre lakor ant 3 konpozant, li pu ML, e zot ule Gurib-Fakim nome deswit. Collendavelloo dir, e li vre, ki si Ramgoolam ek Bérenger ti eli e ti pu met zot 2yem Repiblik, evidaman Purryag ti pu demisyone trankil; alor kapav fer



li demisyone. Me, Aneerood Jugnauth dir ki li, antan ki enn legalist, li ena respe pu Prezidans, li finn deza pas ladan kan li ti Prezidan, li pa pu met presyon lor Purryag. Me, anmemtan, li evidan ki li anvi gard sa nominasyon pu enn Prezidan an 2017 kuma enn “kart” sper dan so lame. Li kapav, par exanp, anvi retir li, re-al Redwi, kan so garson fer Premye Minis. Dayer, Vis Premye Minis Soodhun pe dir bizin enn rol pli gran pu Pravind Jugnauth. (Sirtu avek lanbisyon Raj Dayal, ki klerman pa satisfes res enn sinp Minis.) Ubyin SAJ kapav anvi ena posibilite nom Bérenger Prezidan, dan kad enn nuvo Lalyans dan enn-an, dizon, ant MMM-MSM avek enpe myet kokin depi PMSD ek ML. Sa li pa zis spekilasyon dan vid. Tu sa kalite senaryo finn arive avan. E li ti arive kan pa ti ena otan debandad kuma ena zordi dan Travayist ek MMM.

### C. Kote Nominasyon Pos Kle

Enn lot plas kot abitye gayn konfli, e pu gayn konfli, li lor nominasyon ki fer dan bann plas kle, kuma MBC, Lapolis, Labank Moris, Lanbasad. E sa bann nominasyon la mars de-per avek politik “netwayaz”, ki lepok Ramgoolam ti apel “lev pake, ale!” Lor la, osi ena problem. PMSD ubyin ML kapav ena enn dimunn ki zot byin ule nome par la. Me, fode SAJ dakor pu “netway” plas la, par tir seki ladan deza!

### D. Kote grup Sosyo Kiltirel

SAJ inn donn lord so depite ek Minis napa al koze dan okenn fonksyon sosyo-kiltirel ubyin relizye. Me, Minis Bholah fini al pran laparol dan enn. Remarke ki Pravind Jugnauth, MSM so espes Premye Minis *in waiting*,

ansarz sa bann sosyo kiltirel la, olye Minis Kiltir. E, li finn fer tir latant VoH Gran Basin.

### E. Politik Etranzer

Raprosman avek diferan pei li kapav kree disansyon dan lalyans, li osi. Deza ena 3 raprosman ki finn fer: enn nuvo lanbasad dan Larabi Saudit, ena sa Trade Mission UK, e ena enn luvertir ver Lafrik ek ver Lasinn ki byin kler. Ena osi Premye Minis Lend, Mahendra Modi, ki pe vini pu Lindepandans.

### Konklizyon

Asterla, kan nu gete ki klas sa Guvernman Lepep reprezante, nu truve ki li pu byin pros ar enn ti-burzwazi dan komers, e petet burzwazi komersyal an antye. Sa vedit bann but dan burzwazi deta pu sorti plis kote komers ki dan plantasyon kann, par exanp, su enn nuvo reyn SAJ. Alor, nu bizin gete kimanyer diferan seksyon burzwazi pu pozisyon zot pu gayn zot lavwa dan Guvernman la.

Ansyin Blok Istorik su Parti Travayis klerman menase. Blok Istorik Travayis\* li ti otur *kann*. E kann limem menase. Blok Istorik PT li ti konstitye par burzwazi deta, dan ladireksyon, sirtu but ki sorti dan gran plantasyon kann, me ti osi tultan ena 2-3 proprieter mulin, ti tultan ena enn gran nomb ti-planter ki ti so bann azan dan vilaz, e li finn tultan ena birokrasi sindikal – dan kumansman PWU ek AGWU, lerla SILU, UASI ek AGWU ki ti dan ladireksyon. Zordi sa Blok Istorik la pu evidaman gayn difikilte sirviv.

\* Pu manb ki interese konn plis lor “Blok Istorik” ek lor “burzwazi deta”, kapav servi nu serch-ennjin lor sayt LALIT. Kapav osi lir text Antonio Gramsci ki ti devlop sa konseps Blok Istorik la.



# NUVO GUVERNMAN SAJ & BURZWAZI DISIK & KANN

Tutswit apre eleksyon, zeneral guvernman Jugnauth ek Minis Soodhun finn byin vit met gro “skandal” lor azanda kot bann pros PT finn benefisy bay later piblik pu zot biznes. Byin bon. Me anmemtan li inportan gard antet ki sa guvernman Jugnauth-la pa pe met ankestyon pli gro skandal later: ki tablisman ankor pe monopoliz laplipar later kiltivab dan Moris. E li pe kontiyn fer sa dan enn lepok kriz ekonomik kot li finn detrir plis ki 40,000 anplwa dan lindistri sikriyer, bayant later kiltivab avek so IRS ek komers imobilye, e kot li finn aret pey “tax sorti lor disik” ki ti pe servi pu rul servis sosyal.

## Kriz dan lindistri sikriyer

Nuvo Minis Agro-Indistri ek Sekirite Alimanter Seeruttun pe pretann ki disik ankor ena lavenir Moris, e sindikalist Subron ek leres Joint Negotiating Panel finn kontinye repete san-ses ki lindistri sikriyer “*florissante*”. Me kan get byin, lindistri sikriyer an-kriz, e sa kriz-la pe aksantye: kota ki ti limit prodiksyon disik betrav/ izoglikoz dan Lerop pe disparet an Oktob sa lane-la. Deza ena previzyon ki montre pri disik Moris kapav bese par plis ki 42%.

Avan eleksyon, li ti kler ki burzwazi istorik ti pe fer enn “lagrev investisman” dan Moris. Olye zot met zot kapital dan Moris, zot pe miz buku lor delokalizasyon zot aktivite andeor Moris pu ogmant zot profi. Zordi ena buku-buku sanzman kote burzwazi istorik.

## Delokalizasyon

Zordi, tablisman finn regroupe dan 4 gro grup konpayni. Kann ek disik ankor res enn parmi zot prinsipal aktivite, me sa bann konpayni disik dan sa kat gro grup-la pe delokalize, inplante dan lezot pei, sirtu dan Lafrik.



Desin Escher, *Sirkel in Stab*

Omnicanne, Terra, Alteo, Grup Mon Loisir (GML) zot finn vinn aksyoner nuvo tablisman dan Tanzani, Kenya, Mozanbik, Kotdivwar, Swaziland. Ena enn nuvo realite net kot par 20,000 travayer dan plizyer pei Lafrik pe travay pu “tablisman” Morisyin, parey kuma travayer tablisman isi. Alor anmemtan ki finn detrir 40,000 anplwa stab dan Moris, sa bann konpayni disik-la pe kree nuvo travay, suvan travay sezonye dan lezot pei. Dan Kenya, sif somaz estime a 40% e lapey laburer dapre Award travayer agrikol laba, li otur Rs1,800 par mwa. Dan Tanzani, lapey minimem pu travayer agrikol, li osi li Rs1,800 par mwa. Dan Kot Divwar, lapey minimom par mwa li otur Rs3,500. Alor, zordi, li sir-explwatasyon travayer dan Lafrik par proprieter tablisman ki Morisyin, ki pe fer konpayni disik Moris deklar profi. Me, lindistri sikriyer Moris li dan enn gran kriz. Guvernman pe mem bizin servi Rs200 milyon larzan piblik pu sibvansyonnn ti-planter, pu li furni mulin ase kann.

## Nuvo aktivite dan “lindsitri sikriyer”

Avan 1996, tablisman se samem sa plas kot plant kann, avoy kann kraze mulin, transport disik VRAC lerala livre li kot rafinnri UK. Apre 1996, lindistri “sikriyer” kumns vinn lindistri “kanyer”: tablisman kumans mont so bann IPP ki vann elektrisite avek CEB

ek li demar proze rafinnri ek etanol. Asterla, sa bann konpayni disik ek kann-la pe rant dan lezot aktivite liye avek prodiksyon disik. Seki apel “lindistri sikriyer” zordi, li inklir nuvo kalite aktivite ki pa ti ena avan, kuma rafinnri ek distribisyon disik dan Lerop. Par exanp, Omnicane posed rafinnri ek li ena 28% aksyon dan enn konpayni UK apel *Real Good Food* ki enn distribiter disik pu tu kalite deser ek sokola.

## “Kapital disik” rant dan lezot sektor

Lot gran sanzman dan sa sekter-la se ki lindistri sikriyer ek kann li finn vinn zis enn parmi plizyer aktivite ekonomik sa 4 gro grup konpayni ki finn gain zot kapital atraver lindistri sikriyer. Zordi sa 4 gro grup-la finn etann zot aktivite ek rant dan lezot sektor. Zordi, zot ena konpayni dan lotelri, dan IRS ek imobilye, dan labank ek lezot servis finansye, dan prodiksyon lenerzi, dan tekstil, ek enn seri lezot sektor ankor. Buku sa bann aktivite-la pe derule pa zis dan Moris: zot ena lizinn dan Lenn, Bangladesh ek Madagascar, ena nuvo lizinn pe monte pu fer elektrisite dan Rwanda, ena lotel dan lezot pei Losean Indyin.

## Guvernman Jugnauth v/s kriz

Lalyans “Lepep” ti apiy buku lor “mirak ekonomik” ki Jugnauth ek Lutchmeenaraidoo ti sipoze finn “kree” dan bann lane 1980-90. Me nuvo guvernman klerman pena plan, pena program, pena stratezi apart enn seri slogan vid fas a kriz ekonomik. Dayer an Zanvy 2015, enn mwa apre eleksyon, Kabine Minis finn pran desizyon pu met dibut enn komite ki asterla pu rod enn stratezi ekonomik pu li (*Vision 2030 High Powered Committee*). Sa Komite-la sipoze get sirtu ki-

manyer pu devlop sekter finansye, lizinn, ICT, duty-free, hotel ek imobilye, servis rezyonal ek lindistri Losean. Li pe osi reget itilizasyon later, me san dir avek ki bi li pe fer sa.

### PME moter lekonomi?

Aprè eleksyon, Minis Finans Lutchmeenaraidoo finn dir ki li pu fer tipti ek mwayin antrepriz finn “kolonn vertebral” lekonomi. Li pe met Rs10 milya dan enn nuvo labank PME. Sa, dan enn lepok kot gro konpayni mem pa pe kapav fer fas a kriz ekonomik. 8 lor 10 tit-antrepriz pe deza bankrut dan lespas 3-4 an. Purtan, guvernman byin okuran lanpler ek danze landetman: sitan problem landetman finn agrave ki guvernman finn anonse dan diskur-program ki li pe friz “Sale by Levy” lakaz sezi aköz det. Tu dimunn kone PME pa enn sekter sa. PME pu prodwir kwa? Li zis enn fason pu degiz sif somaz tanporerman. Dayer, deza sa proze-la fini mal-demare: 2 labank Indyin ki ti pu partner dan nuvo labank PME finn fini kile, ale (*L’Express* 23.01.15).

Nuvo guvernman Jugnauth pa pe montre okenn siyn ki li pu fors burzwazi istorik investi dan Moris ek kree anlwa. Alor kot sa 15,000 anlwa ki guvernman finn anonse li pu kree par lane pu sorti?

### Kanpayn LALIT pu Politik Ekonomik Alternativ

Fas a kriz ekonomik, LALIT ena enn program pu politik ekonomik alternativ. Bizin ena reform later kot ena plis kontrol kolektif lor later kultivab. Bizin fors tablisman plant manze lor gran lesel ek kree lizinn transformasyon manze. Se sa ki pu amenn kreasyon anlwa par milye dan Moris, amenn plis sekirite alimanter ek amenn nu ver enn plan pu devlop veritab lenerzi renuvlab lor gran lesel. Dan kad bidze, LALIT finn avoy enn let zisteman lor sa size-la a Minis Finans ek Minis Agro-Indistri ek Sekirite Alimanter ki u kapav lir dan Revi.

# LALIT AN AKSYON

## LALIT DAN ELEKSYON

Kuma tu lekter kone, LALIT ti met 28 kandida dan dernye eleksyon lor baz nu program ki ti sorti kuma enn edisyon spesyal Revi LALIT. Nu kanpayn ti fer atraver sirkilasyon nu program, nu websayt, nu chanel Youtube lalitmauritius, trak lor lagar, kot lafwar, sayt travay ek kartye, lafis, reinyon ek port-a-port, e lor program MBC. Me, zuti santral ti nu “program nasyonal”, enn lagazet ki introdri program e kandida tu sirkonskripsyon. Aprè eleksyon, nu finn tir kominike pu komant nu rezilta. Ala enn extre:

“LALIT finn marzinalize kote elektoral, ankor enn fwa. Me ankor enn fwa, li *pwin politik lor nu program* ki finn responsab, an gran parti, pu provok sa lam de-fon parmi lamas dimunn dan pei dan sa eleksyon la. Li vo lapenn gard an-tet ki zot viktwar li an-gran-parti rezilta lefet ki zot finn rebran *bann pwin dan program* LALIT e dan kanpayn politik LALIT, e se sa ki finn galvaniz zot kanpayn. An partikilye:

- LALIT ti opoz “parsel anpwazone” bann mezir otur sa “2yem Republic”, e nu ti prodri e propaz bann argiman kont sa proze diktatir PT-MMM, depi kumansman.

- LALIT finn opoz Kart Idantite biometrik e so data-beys, e finn batir enn gran kanpayn kont, mem kan MSM-PMSD ek MMM ti an-faver.

- LALIT finn kritik Travayis ek MMM pu zot refi pu amenn ka Diego/Chagos a ICJ (Lakur Internasyonal dan LaHay) E plis ki tu:

- LALIT finn kritik mank total enn program ekonomik Guvernman Travayis ek so partner MMM, e nu finn konstaman chalennj zot lor la.”

## Kart Identite: Nuvo Petisyon

An Desam, LALIT ansam avek CITU, CTSP, MLF, ACIM, Sant Idriss Goomany, Playgroups ek Labaz Intersindikal finn avoy petisyon PM Jugnauth ek Minis ICT Pravind Jugnauth pu dir zot detrir databeys ID kard kuma zot finn dir zot pu fer, ek pa fer li obligatwar pu prezant li uswa ena li, ek antretan, aret inpoz ki pran lanprint pu nuvo ID kard.

An Fevriye, LALIT finn met divan zot responsabilite 3 Minis ek enn depite Guvernman Lepep ki ti aktif dan batay kont nuvo kart ID. Enn let finn fer zot rapel zot responsabilite spesyal pu asire ki guvernman azir.

## Aksyon dan kad bidze

LALIT finn avoy enn dosye Minis Finans ek Minis Agro-Indistri ek Sekirite Alimanter dan kad bidze pu ki guvernman al ver enn nuvo oryantasyon politik ekonomik pu ki kree anlwa ek asir sekirite alimanter atraver devlopman agro-indistriyel ek lindistri transformasyon manze. (Kopi dan Revi ek lor nu sayt.)

## Aksyon lor Diego

An Desam, LALIT ti adres enn let lor Diego a nuvo Minis Zafer Etranzer pu dir li kumans galvaniz sutyin internasyonal pu met ka ICJ lor Diego, kuma zot finn promet. Dat pu inskri rezolisyon Lasanble Zeneral UN, ti deza pre. Paret Guvernman pa finn azir ditu. An Fevriye, apre ki guvernman kumans montre siyn ki li pe kile e kumans koz “dyalog diplomatik” avek UK ek US olye met zot Lakur, LALIT finn adres let uver a Premye Minis pu proteste.

## Kreol langaz Parlman?

An Desam, LALIT ti fer apel a Spiker Lasanble Nasyonal ek Lider Lasanble Nasyonal pu dir ki bizin sanz Konstitisyon pu langaz Kreol vinn enn langaz ofisyel Parlman lor mem nivo ki Angle. Spiker finn ekrir pu dir ki li finn byin resevwar nu let.

## Trak nasyonal LALIT

Militan LALIT pe distribye trak dan tu lagar, lor sayt travay ek dan kartye vandredi 27 Fevriye, sirtu dan kad Bidze. Fer nu kone si u ti pu kontan gayn kopi pu donn u bann kamarad.

# FEB LOPOZISYON PARLMANTER

Apré enn Eleksyon Zeneral, nerport kan, dan nerport ki pei,  
ena pa zis enn *Guvernman* ki sorti,  
me ena osi enn nuvo *Lopozisyon*.  
E, sa eleksyon Desam 2014 finn kree enn Lopozisyon Parlmanter  
ase bizar, inatandi, inprevizib.  
Ondire, sa eleksyon zeneral,  
li ti kuma kan kikenn finn kase enpe tro brit kumansman karom,  
strayker inn fann pyon dan tu direksyon,  
e tu dimunn pe rode partu lor bord la vit-vit;  
telman zot pa pe futi konpran ki'nn arive,  
zot bizin vers deryer get dan bann pos la.

## Lalyans Travayis-MMM eklate

Depi moman an Avril kot Navin Ramgoolam ek Bérenger kumans zot rankont Clarisse House lor kestyon reform elektoral ek 2yem Repiblik, avek enn lalyans PT-MMM kuma twal-defon, tulde lider ansam al deklans enn proses ki pu vinn devaste zot prop parti: zot labaz inn firye; me lider finn deklar pli kone ki zot labaz.

E, lider finn al delavan konklir zot Lalyans, malgre sa rezistans for dan tulde zot labaz: ena manb ek elekter ki ti pe fer rebelyon uver dan MMM ek PT, ena ti pe bude, e buku buku kareman finn rant dan eksitasyon "Vire, mam!"

Tulde lider ti res bet, enn kote, e finn panike, lot kote. Me, zot ti tase. Zot ti oblize res *atase ansam*. Antretan, mem burzwazi, ki ti aktivman sutenir formasyon sa Lalyans la, paret finn abandonn li pandan kanpayn.

E Lalyans PT-MMM finn gayn sa bate bef la ansam. Zot prop labaz, zot prop azan finn al konverti sa "60-0", ki Ramgoolam ek Bérenger finn promet, an enn defet 13-47. Zot inn gayn zis 13 eli lor 60, malgre ki zot adverser ti anfet enn ramasi ki finn reysi amalgame pu galfat *Lalyans Lepep* lavey ki larg eleksyon. Wi, Lalyans Lepep ti tap 47 syez lor 60 first-past-the-post. Alor, Lalyans Lepep, li o-puvwar avek sutyin OPR ki ena 2 depite. Avek best loser, zot ena mazorite 3/4.

Lopozisyon Parlmanter, pandan de-trwa minit apre rezilta le 11 Desam, ti kiksoz apel "*Alliance de l'Unité et de la Modernité*". Mo pa mem sir mo pe dir li byin. So nom mem, nu tu finn deza bliye, afors sa Lalyans la ti modi. E bann ki finn kree li, zot osi, zot *ule* bliye li net.

Tutswit kan li realiz lanpler zot defet elektoral, zot imilyasyon ki enn 60-0 sir inn vinn enn 13-47, Bérenger kareman anons riptir definitiv zot Lalyans. Lafot Navin Ramgoolam, li dir.

Antuka, par buz vit kumsa, Bérenger asire ki li anfet *MMM* - avek so 12 syez dan Parlman (9 eli + 3 Best Loser) - ki reysi vinn Leader Lopozisyon, sirtu kan PT ena 4 eli, plis 0 Best Loser.

Alor, Bérenger, li tuzur Lider Lopozisyon. Li finn reysi ranport eleksyon nuvo Komite Santral MMM, mem si ena buku tirbilans intern ki pe swiv. Anfet, li ti premye fwa ki elir enn nuvo Komite Santral MMM depi 9 banane, malgre ki sipoze fer nuvo eleksyon sak lane.

Alor, ena MMM ki ena Lider Lopozisyon, enn kote, ek ena Parti Travayis, avek so mizerab 4 depite, li osi lor ban Lopozisyon.

An term sif: Lepep ena 51, OPR ena 2, MMM ena 12, PT ena 4. 69 an-tu, aköz *enn* dernye Best Loser pa ti kapav nome (tuzur ena problem ar Best Loser, alor 2014 pa enn exsepsyon, parski BLS tuzur lamem).

## MMM

Alor, anu get sa MMM la.

So leta mazor inn kanmem eli: So Bérenger, so Ganoo, so Bhagwan, so Uteem, mem si ena enn nuvo "Leta Mazor", ki pankor stabilize.

Alor, MMM, apar lefet ki li det santi kraze net, obzektivman li parey kuma li finn ete, enn dan lot, depi 1976: dan Lopozisyon.

Enn-de fwa, dan lepase, MMM pa ti mem ena pos Lider Lopozisyon. Ena fwa Bérenger pa ti mem eli. Me, zame la-direksyon MMM pa finn osi imilye. Zame avan, zot pa finn perdi otan plim.

Ladiferans zordi se MMM paret pa pe kapav zis dilye so program ankor enn fwa. Li deza telman dilye ki li pa existe.

E osi, pu premye fwa, Bérenger inn perdi kredibilite kuma lider. Sa pa ti pu telman grav, me pena vremen okenn lot dimunn ki kapav ranplas li, ziska ler. Li finn donn promosyon Ajay Gunnessh, Pradeep Jeeha, Deven Nagalingum ek Zouberr Joomey, odetriman e Ganoo, Bhagwan, e sirtu Obeegadoo ek Kavi Ramano. E, Obeegadoo ek Ramano partikilyerman ankoler, aköz zot ti gayn buku vot delege.

Kuma nu ti dir dan Program LALIT (Revi 116), kan nu ti koz spesifisite stratezi MMM, li finn depi lontan vinn enn parti ki viz naryin apar:

"gayne dan eleksyon, azir kont koripsyon, vagman reprezant swadizan

“minorite”, surf lor so leparse, depann lor popolarite Bérenger ti ena byin lontan (ant 1969 ek '80) kan li ti lider klas travayer. Parfwa MMM osi sof diferan “kastrol presyon” azut presyon ansam - kuma so sel vre taktik - sanki li swiv okenn prinsip ni program.”

Sirman Bérenger pu re-kumans al fer kozri piblik lor “Listwar Moris” dan Lasal Minisipalite, etan done so Lasanble Delege pa finn tay so kart tro buku. Samem li abitye fer, kan li truv li dan enn bafon san-fon. Me, zordi so bafon san fon, pli san-fon ki avan.

E, antretan, Ivan Collendavello ek so Muvman Liberater pe akeyir ex-manb MMM. Ondire enn prolongasyon “Vire manb!”

PMSD pe ranplas MMM, kote kominal, e pe ris ex-elekter MMM. PMSD ena 11 depite, MMM 12. Li premye fwa PMSD pe preske egalize ar MMM kumsa, depi ki MMM existe. Sa emorazi ver PMSD, li enn lot extansyon prosesis, “Vire, Mam!”

Lezot ex-MMM prefer al ar Jugnauth, ki li, li enn ansyin MMM, limem. Alor, prosesis “Vire mam!” pe kontiyne, la osi dan enn 3yem direksyon. E, nu pa kone pu komye letan sa anserkleman MMM pu kontiyne.

Alor, ki nu kapav atann depi MMM?

MMM finn vinn enn parti Bérengist, li vre. Me, Bérenger, limem, finn travers enn kanser lagorz, ki li minimize par apel “enn kumansman enn kanser lor lami-dal gos”, e ki finn geri. Li finn osi admet lor Radyo ki li (ti) ena enn problem lalkol, ki li pe (finn) adrese. Alor, ki pozisyon lezot dan lidship MMM? Bhagwan ti dir li pa ti pu poz kandida ditu. Li ti osi dir li ti pu bwar Lysol avan fer enn lalyans ar Travayis. Li finn poz kandida. Li pa finn bwar Lysol, malgre ki finn fer lalyans ar Travayis. Ganoo, li ti sef jaz dan organiz sa Lalyans modi ar PT la, alor li inpe dan bez kot li ete. Lor la, li finn reysi amerd Bérenger byin-mem, kan li finn dir li finn aksepte sa lalyans ar

PT kuma enn fason pu Bérenger finalman vinn PM pu 5 an! Alor, MMM so ladireksyon, mem enn parti finn eli, li an lanbo. Uteem feb. Lesjongard ek Ameer Meeah bann reaksyoner dextrem drwat (par exanp, zot krwar bizin ferm fam dan prizon pu lavortman dan nerport ki ka de figur.) Obeegadoo pa dan Parlman. Ramano ek Baloomoody pa finn disteng zot mem. Res zis Joomye, ki li osi ti enn agwa dan lalyans modi la. Telman ena enn vid ki dimunn kuma ideolog burzwa Lindsay Rivière ti pe suzantand ki ex-MMM, sirtu Jean Claude de L'Estrac, kapav fer enn comeback - malgre ki li pa mem dan MMM. Sa, li bizar. Me, li pa premye fwa tann zafer parey. Dan enn leparse pa tro lwintin, L'Estrac ek Bizlall finn deza zwenn, enn aswar Premye Me ancor, pu diskrit sa kalite senaryo la ansam. Lerla ki Bérenger ti al servi so puvwar pu al nom par dizenn nuvo manb Komite Santral ek Biro Politik. Anrretan, kan Barbier pe al ver kit MMM, li sit Bizlall kuma enn vre militan!

Me, anfet seki Bérenger finn organize, se promosyon Guness, Jeeha ek Joomye.

### Parti Travayis

Avek so lider Ramgoolam su arestasyon, ek lor kosyon, Parti

Travayis dan enn kriz san presedan. Li pir ki 1982. Me, anu kumans ek so defet byin grav dan eleksyon.

Kuma nu finn suvan analize dan LALIT, Parti Travayis finn reyne par enn dub-mekanism: li finn reprezant “burzwazi deta” ki tultan pe emerze depi klas kapitalist mwayin (sirtu depi gran planter kann) e li finn stabiliz sa reyn la par enn “Blok Istorik” otur kann: tablisman, gran planter, mwayin planter, ti planter e osi atraver sindika, artizan ek laburer. Sa blok istorik la finn kas an mil morso.

Li pa etonan, parski lindistri sikriyer pe al ver so larwinn avek bes kontinyel, dayer deza anonse me pa asimile, dan pri disik. (Zis investisman Tablisman dan Lafrik ki pe kuver so difikilte ekonomik ar lindistri sikriyer dan Moris.) Apre tu, li kann ki santral dan sa Blok Istorik la.

Pa zis parti Travayis inn gain selman 4 syez dan Parlman, me okenn so lidship pa finn eli.

Pu kumanse, enn seri Travayis ase sinnyor pa ti gain tiket ditu - Bunwaree, Jeetah, Abdoolah, Sayed Hossen, Rihun Howoldar, Jim Seetaram, Hervé Aimée, Deva Virahsawmy, Abu Kase-nally, e Tassarajen Pillay. Lerla, okenn manb sinnyor ki anfet gain tiket, pa eli: Ramgoolam inn perdi, Boolell, Baichoo, Bappoo, tu perdi. Mem bann “jeunes



Desin Natir mor, *Istansil lakwizinn*

*loups*”, espes relev, perdi: Assirvaden, Deerpalsing. Seki finn eli se Shakeel Mohamed, ki ti manke pa gayn tiket ditu, ek 3 zokris san lepxeryans e ki personn pa tro kone: Osman Mohamed, Ezra Jhuboo, garson so papa, ek Ritesh Ramful, zann Kailash Prayag, Prezidan Republik.

Travayis finn pas tu so letan gete sipa Ramgoolam pu step down. Anfet, li finn zis retir li tanporer-man, me pe akros ar pos la. Boolell zis enn port-parol, pa enn “lider”.

Me, lefet ki Ramgoolam pe kontiyne san demisyone, li pu amenn problem anplis lor ledo Parti Travayis: Ena tu kalite lake ferblan ki atase ar Ramgoolam, apar so larzan, so telefonn travay ki li pa finn rande: Deza, otur evennman dan so kanpman Roches Noires an 2011, ki finn deza provok arestasyon Jokhoo, ansyin sef NIU su Ramgoolam, ek Sooroojbally, ansyin sef VIPSU su Ramgoolam. CID pe mem rod liye evennman otur sa vol/agresyon Roches Noires ek enn lamor dan selil, lamor Anand Kumar Ramdhony. Ramgoolam so konportman surnwa otur so lavi prive pe pez lur kont li.

Asterla, Ramgoolam ek so ansyin Guverner Labank, tulde, ena gran problem e politik, e legal. Zot ena ka o-kriminal grav lor zot.

Alor, lavenir Travayist depann, an-parti omwin, lor eski Ramgoolam pu retir li. Buku dimunn Travayis pe espere ki li retir li dan politik pu de-bon, al res Langleter.

Dezyeman, bann proze infra-striktir ki ti fyerte Ramgoolam, osi byin ki Baichoo, finn literalman kolaps: mo pe fer referans a Ring Road ek loturut Terre Rouge-Verdun. Sa 2 tantativ pu dekon-zestyonn Port Louis, finn sede, kolaps fizikman. Sa kalite problem, kan li pa zis enn ka izole, li osi, li pez lur kont Ramgoolam. Azut lor la tu lezot mega-proze fiasko (Get nu lartik zis lor la.)

Me, kuma nu kone, li rar ki enn lider demisyone dan lintere so parti.

## LOPOZISYON EXTRA-PARLMANTER

Sa lartik la li lor “Lopozisyon extra-Parlmanter”, setadir lor tu parti politik andeor Parlman.

Sa distinksyon ant “Parlmanter” ek “Extra-Parlmanter”, li enpe fos,

dan lesans ki Lopozisyon ki Parlmanter, laplipar so travay politik, si li fer li byin,

li anfet andeor Parlman

e.g. sa ti vre pu MMM ant 1976 ek 1982.

### FSM

Cehl Meeah, ki ti aliyn 60 kandida, finn sorti byin afebli. Pa zis li pa finn fer okenn so kandida eli, kuma an 2010, me politikman so kanpayn pa ti perkitan ditu. Kan li ti vinn gele lor TV, nu ti kone li pe gele aköz li ti kone li pe perdi. Tan mye.

### Les Verts

Les Verts Fraternel -Aksyon kont Lamizer, Sylvio Michel, ti aliyn 42 kandida. Zot ti fer enn kanpayn byin reflesi lor TV. E zot klerman pe batir enn program buku pli solid ki zot zame pa finn ena. Lor terin osi, zot ti paret fer enn kanpayn ase diyn. An zeneral, zot mesaz pa ti ena osi buku suzantand kominal ki li ti ete dan leparse. Kote rezilta anterm vot, zot finn gayn byin tigit. Zot skor feb. Me, selman, sa pa pu neserman afebli zot, parski zot inn devlop enn program koeran, li paret zot ena sertin striktir Parti, e zot finn tini enn piblikasyon regilye.

### EDP

Bizlall so *Entente pour Democratie Parlementaire*, ti reyni literalman e dapre Bizlall, nerport ki lorganizayson ek nerport ki individi. Bizlall ti anons disolisyon so *Muvman Premye Me* dan enn zafer apel Muvman Larz, ki li, asontur, li finn met dibut sa EDP la. Asterla Dev Ramano anonse ki *Muvman Premye Me* tuzur existe, alor bondye kone. Taler zot pu anonse ki PMT osi tuzur existe. Antuka, pu rant ladan, dan EDP, zot dir, u pa bizin dakor ek naryin an-komin ar lezot dimunn

ubyin lezot lorganizasyon ki ladan. U kapav mem ladan, e dan enn lot Parti ki pa ladan. Anfin! An zeneral, zot pa finn gayn buku vot, apar Bizlall limem, kordilo, ki finn tir kosyon. Apre eleksyon, li paret Jameel Peerally fini separ li depi Bizlall.

Bizlall ti mal-ziz so proze politik avan Eleksyon. Klerman li ti viz pran lidersizip enn muvman pu opoz sa 2yem Republik PT-MMM ki li ti sir pu eli avek 3/4 mazorite. Li pa finn zis krwar bann-la pu eli, me li ti miz lor la. Kumsa li finn apel so rasanbleman “*Entente pour la democratie parlemanter*”. So Entente ti pu enn muvman linite nasyonal kont sistem “prezidansyel” (ubyin semi-Prezidansyel) ki Ramgoolam-Bérenger ti pe menas pu met dibut, “kan” zot eli 60-0! Kan Ramgoolam-Bérenger inn gayne enn bate bef, proze post-elektoral EDP, inn perdi so rezon-det. Me, Bizlall kondane pu kontiyn avek proze la tuzur: enn “entente” anfaver “demokrasi parlmanter”, setadir enn *entente* anfaver demokrasi burzwa. Kan demokrasi burzwa menase par ladrwat (par enn rezim prezidansyel) so proze preske tini. Me, sinon, li enn program proburzwazi. Parlman li enn institusyon burzwazi avek so demokrasi moyon.

Dan EDP, antuka, paret ena 3 federasyon sindikal - mo oblize dir “paret” parski li paret ki manb sindika dan sa bann Federasyon la pa finn pran sa desizyon la. EDP enn parti politik. Li mem anrezistre ar Komiser Elektoral

kuma enn Parti Politik. Abe, kimanyer bann federasyon sindikal kapav rant ladan. Li absird. (Sirman, pu maske sa konplo osi ridikil, zot pu sanz nom EDP an enn lot zafer.)

EDP so premye travay, li finn anonse, se pu fer enn “Parlman Paralel”, e zot pe fer sa ase alalezer. (Sa konsep “Parlman Paralel” ti enn lide LALIT, an okirans enn lide Ram, e pandan enn an dan Lagazet Dorad, par exanp, ti ena enn ribrik apel “Kestyon Extra-Parlmanter”.) Me Reeaz Chuttoo ek Jack Bizlall finn rebran lide la, e zot anprosesis rwinn li! Sa “Parlman Paralel” la, li pu organize par CTSP, zot dir, par enn Federasyon Sindikal, ki dan sa Parti Politik anrezistre apel EDP. EDP finn mem anonse ki zot Parlman Paralel pu ena bann “Shadow Minis”, silteple. Enn Lexekitif paralel. E zot pe planifye zot travay ziska 2019, ondire zot manda li 5 an! Selman zot pena enn.

Antuka, pu lans 2015, zot finn organiz enn deba dan Konsey Minisipal Port Louis dan kad sa stratezi EDP. Zot finn fer enn premye aktivite ki resanble enn espes Parlman paralel: CTSP finn konvok dimunn, CTSP pe prezide, akoz li CTSP ki ansarz Parlman Paralel dan EDP: Tem sa premye aktivite la li byin bizar: “*Bon ek Move Lefe Employment Rights ek Relations Act, lor Marse Travay*”. Anu analiz sa tit la. Dabor li sokan pu enn Federasyon truv inportan get lefe sa 2 lalwa la *pa* lor klas travayer, me lor “marse travay”. E li pli sokan kan zot truv imin ki so manb (travayer) kuma a-vann dan “marse travay”. Li osi absird pu truv “bon” ek “move” lefe sa 2 lalwa ki anfet enn nuvo kad explwatasyon kapitalist ki korbor plis ar lepok globalizasyon aktyel. Li enpe kuma si CTSP ti fer enn deba lor “bon ek move” lefe “Code Noir,” ki ti kad legal pu explwatasyon travay dan lepok esklavaz. Li enn tit absird. Li pa

zis kuma enn tit ese Form 3 (“*Advantages and disadvantages of cell phones*”), me li ule dir zot prizonye total ideoloji kapitalist, kot kapav ena enpe “lavantaz” dan sa esklavaz modern la.

Orater ki zot finn mazine pu invite donn enn lide zot Parlman Paralel, e devwal stratezi EDP, petet: Sheila Bunwaree (Parti emerzan Justice Social, ki EDP pe rod rekrite dan so proze politik - pa kone ki exakteman so expertiz dan Lalwa Travay) e ki pa ti ale; Bizlall (anfet EDP, me lor nom Observatoire de la Democratie, ki dan EDP); Jane Ragoo (CTSP ki anfet dan EDP) ki pa paret ti lor panel; Vasant Bunwaree (parti emerzan: PTM, plis li ti Minis Travay ki ti amenn ERA) ki pa ti ale; 2 sef patrona (MEF ek MEXA) dan lekel enn ti ale; enn reprezantan PT Patrick Assirvaden ki pa ti ale; Lider Lopozisyon Berenger ki pa ti ale; Minis Travay aktyel, Callychurn, pa ti ale.

Fransman, Bizlall pe kontiyn fer parey kuma tultan li finn fer: met dibut lorganizasyon ki limem, li kone, pu al disparet dan enn timama. Anmemtan, Dev Ramano finn ekrire 3 lartik Le Mauricien, paz Forum, kot li truv somaz kuma enn “malediksyon”, e kot li truv enn “fraktir sosyal”, setadir bizin zis met plak, tu korek. Tuzur, dan sa EDP la, zot latet dan enn konfizyon total, e zot pa mem kone. Zot pena okenn lide lor sosyalism, lor ki diferans ant sa garbej ki zot koze e ekrire, ek enn program sosyalist kuma pu LALIT. Dev Ramano ena tupe pu dir eski LALIT (ek lezot) pu “*permettront-ils encore, au nom des egos de certains, le luxe de continuer a patauger dans la mare de la division et de proceder en ordre dispersé dans les combats a venir ..?*” (Le Mauricien, 24 Zanvyé 2015). Li krwar li kapav fer enn invitasyon pu “linite lagos” atraver insilt. Li krwar li evidan ki EDP dan “lagos” kan zot pena mem enn

program. Dayer, dernye fwa nu fer lalyans ar Dev Ramano, li ti byin lontan, an 1987, li ti fer tret, li ti vande ar Bérenger kare-kare. Tu dokiman lor nu sayt: <http://www.lalitmauriti.us.org/viewnews.php?id=852>. Lerla so lorganizasyon OMT-FNAS finn fonn. Lerla, li ralye li deryer Bizlall. Kan nu pran pasyans sey retravay ar li, ek sann fwa la ar Bizlall osi, sa ti dan Parsyel Nimer 19, la osi zot fane. Apre rezilta, zame zot pa dakor pu fer enn reynion pu analiz rezilta! Zot zis kolaps, bude, kave anba ros, kuma angiy. Lerla, prosenn zafer nu kone, ariv 2009, Bizlall pe sirkil bann trak abiziv, anti-fam, kont manb LALIT, trak dan lekel Ramano 100% konplis. Zame Ramano mem kritik Bizlall so trak degelas la. Ziska zordi. Lerla, li vinn dir nu nu pe “*patauger dan la mare*”? Ala referans pu lekter chek sa trak lorer Bizlall la:

[http://www.lalitmauriti.us.org/resources/documents/165-Jack\\_bizlall\\_tirades\\_](http://www.lalitmauriti.us.org/resources/documents/165-Jack_bizlall_tirades_against_lalit.pdf)  
*against\_lalit.pdf*

Alor, prefer nu mars tuse, latet ot, ki *patauger* dan zot labu.

Seki inportan ladan se EDP, li pa “de gauche”, li pa “socialiste”, e li enn evidans ki sa vre parski li pena okenn program, e li dir li pena, e li fyer li pena. Li enn ramasi, par definisyon so bann prop fondater. LALIT pena so plas ladan. E ni EDP, ni Muvman Premye Me, si li existe, zot pena naryin “de gauche” ar zot. U pa “a gos” akoz u dir u “a gos”. U bizin ena enn program a gos. E u bizin ena aksyon a gos. U pa vinn san program, u pa vinn abiz fam, lerla dir u “a gos”. Non.

## Rezistans ek Alternativ

Bann RA ti anonse zot pe met 60 kandida. Lerla ep! zot aliyn 20. 13 RA plis 7 lezot. (Dayer, Bizlall ti fer mem fars anons 60 kandida, lerla trankil vinn aliyn 20.)

RA ti krwar zot pu gayn buku vot. Apre tu, medya inn ponp zot lider Subron pandan 9 an. Navin Ramgoolam inn fer travay donan-

donan ar li pandan 9 an. 2 pli gran lanpir lapres kapitalist, *L'Express* ek *Le Defi*, finn nom li "*L'Homme de L'Année*". E li pa tir kosyon okenn par? Abe, zot pu desi mem. Dr. Madewoo tir kosyon dan No. 13, kot Subron poze, Subron pa tire. (Dakor Madewoo, anpasan, dir li finn depans Rs4 milyon dan sirkonskripsyon!) Me, konsolasyon RA se zot anonse ki zot "3ieme force". Zot byin elektoralist, pu ziz lafors politik, par zot skor elektoral. Kumadir pe ziz intelizans kikenn par so rezilta CPE. Dayer, zot aritmetik bankal. Zot *4yem* fors: Lepep premye, MMM dezyem, PT trwazyem, ek lerla petet zot. Me, serye, ena enn paradox. Bann RA, zot elektoralist, zot, dan sans zot ule vot, e zot rod vot a tu pri. Zot kol foto kadrikromi, partaz leaflet kadrikromi lor kandida individyel, zot servi langaz Franse dan trak pu lamas dimunn, zot koz enn Kreol fransize absird lor radyo, zot anonse ki "*kapitalism ek sosyalism konplemanter*", zot mem al dan reynion kandida organize dan kad Legliz malgre Kod Kondwit ki zot finn siyne. Tusala pu dir ki zot finn fer tu pu gayn vot, me normal zot pu mari desi ar zot skor, parski zot finn vande lor tu prinsip, si zot ti ena prinsip, e la osi, zot pa tir kosyon.

Me, an realite nomb vot, li enn detay anterm problem ki zot ena. RA ena buku problem *politik*.


1. Ena konfizyon ki pu agrave ant zot mobilizason sindika e zot konstriksyon Parti. Sa li enn form oportinism ordiner. Me, li ena lefe ramenn RA plis dan sant, mem a-drwat, parski zot bizin reflet lopinyon dominan mazoriter dan nerport ki sektor travay, setadir ideoloji burzwa. E lapres burzwa, ki ponp RA, natirelman kritik zot pu sa oportinism la. Sa zar oportinism ki finn tultan afebli, mem detrir, tu proze politik Bizlall.

2. Stratezi RA otur best loser ek deklarasyon kominote finn rant dan enn kul-de-sak. Zot pu gayn difikilte met aryer. Zot pu sirman fons ladan, malgre ki li enn kul-de-sak. Zot ti krwar laplipar kandida pu eleksyon pa pu met "zot kominote" si lalwa pa obliz zot, alor sirman zot finn desi ki 2/3 ti anfet deklar "zot kominote". Parmi ena mem kandida EDP, Justice Social Bunwaree, etc. Me, pli grav pu RA: Best Loser tuzur la. Tu zot fla-fla dan lapres, tu zot bla-bla-bla lor "*page d'or de l'histoire*", finn tom plot. Mem mini-amandman orib anfet tanporer; li fini fonn. 9 an "viktwar" lor "viktwar", e zot lamem, tuzur dan kazye depar. Me, sityasyon pli pir ki kazye depar. Zot finn akimil pale-bulfer lor zot lipye pandan sa 9 an: Ramgoolam ti pey Fre Lakur Privy Council. (Remarke ki zot pe donn Ramgoolam benefis didut, par aksepte ki larzan kot li, li

donasyon pu Parti Travayis). E lor lot lipye, zot ena pu ris enn zizman Nasyon Zini ki anfet apel pu Leta fer enn nuvo klasifikasyon kominal popilasyon si li kontiyne obliz dimunn met enn kominote. (Mme. Selvon dan so repons a Diskur Prezidan finn dir bizin refer enn nuvo resansiman kominal.)

Alor, eski RA pu kontiyn zot stratezi al Lakur, al Lakur? Eski zot pu kontiyn kriye "viktwar" pu sak defet? Eski zot, parey kuma Bérenger, pa kapav admet kan zot finn fer erer? Dayer, zot tuzur ena enn ka Lakur Siprem. Sann fwa la, finalman, li enn ka kont Best Loser, apre 9 an. Me, eski zot pankor realize ki sa isyu la, li *pa kapav* regle par sime legal? Non. Li enn dosye *politik*. Li pa bann ziz isi, swa ziz Lond, swa ziz Zenev, ki bizin tir Best Loser. Sa li anti-demokratik. Sa li danzere. E, zot ena enn lot problem politik grav pu fer fas: pandan premye 15 an apre Lindepandans, Best Loser ti sel vre "kominalism institusyonalize" grav, alor ti bizin atak li, mem si li ti viz protez kominote sipozeman "minoriter"; me, asterla, finn gayn lezot form kominalism institusyonalize byin virilan, suvan dan kominote sipozeman "mazoriter", dan enn seri diferan institusyon sosyo-kiltirel, swa kominalo-relizyez, ki finn devlope, nuri e finanse rekta par Leta. Alor, li politikman difisil pu milite pu tir BLS san anmemtan truv enn stratezi politik pu diminye puvwar bann grup sosyo-kiltirel. Malgre SAJ finn sey interdi depite ek minis pran laparol dan zot rasanbleman, Minis Koperativ S. Bholah, fini al pran laparol dan enn. E sibsid tuzur anplas. Mem MSM pe akil VoH, VoH pa sel organizasyon kominalo-relizye. Nu krwar bann RA pa pu kapav analiz avek presizyon kot zot stratezi finn amenn zot; zot prefer fonsse, latet bese.

3. Elektoralism inn fini rant andan dan zot parti, e pu ris li a-drwat. RA pa ti tro "degos"



Desin Escher, *Depth*

zame. Rapel zot ti dir saler travayer li sakre aköz li “*propriete prive*”, zot koz “valeurs” anplas Program ubyin prinsip organizasyonel. Zot koz “mezir” ki zot pu pran, ondire zot pe viz Minister, avek zot 20 kandida! Lor langaz Kreol, RA anfet propoz stati ko: 3 an medyom. Regulation su *Education Act 1957* deza donn Minis Ledikasyon puvwar servi langaz maternel pu 3an! Tusa konsesyon ver Sant, li vini ar presyon konstan ki elektoralism exerse.

Zot Program kareman santrist de tut fason. Zot per mansyonn “sistem kapitalis”, kare-kare, ubyin “klas kapitalist”, ubyin mem “klas travayer”. Zot bi se pu atak plito “stati ko”, san tro definir li. Zot referans istorik se Parti Travayist. Zordizur, sa enn la-ont, kan nu gete kot li ete. Zot dir alepok Travayis ti atak stati ko, parey kuma RA. Zot 2yem referans se MMM. Li osi, zot dir, ti atak stati ko. Me, RA buku plis a-drwat ki MMM ti ete dan so premye 12an. Pu ki RA evit fer referans a “klas kapitalist”, li koz bann “nanti”, “elit”, “dirizan”, ek opizale “diverses bourgeoisies”. Term vag ek kuyoner. Telman zot per pangar kikenn dir zot enn marxist, ki zot ekrir fraz inkoeran kuma: “*Les sociétés humaines au sein de l’actuel modèle économique ont toujours considéré la nature ...*” Bi RA se pa ditu pu ranvers sistem kapitalis. Zot pa mem ule chalennj li. Zot dir, “*Rezistans ek Alternativ a toujours dénoncé la disparité entre riches et pauvres, qui ne cesse de s’agrandir, aussi bien que la mauvaise répartition de la richesse*” (sic). RA deplor ki CSR pa fonksyon byin: “*La Responsabilité Sociale des Entreprises (CSR) introduite quelques années de cela ne fonctionne pas.*” Ondire ti pu bon si sa kalite proze paternalist la ti fonksyon byin!

E, kuma Guy Ollivry, zot ule, “*Permettre aux travailleurs d’élire trois représentants au conseil d’administration de*

*toutes les entreprises qui ont plus de 100 employés*” (!).

Li kler ki zot pena lakorite dan RA lor enn laliyn mem anti-kapitalist. K. Parapen mem truv lekonomi kapitalist ek sosyalist “konplemanter”. Program RA sey kuver zot pese par dir person pa kapav dir avek sertitid ki sistem ki pu pli bon. Zot pa kritik kapitalism, me selman “move” kapitalism. Get sa fraz la, kan zot pe koz lor manyer sistem aktyel rwinn lanatir: “*S’écloigner de ce modèle suicidaire ne sera possible qu’à travers un éloignement des points de vue conservateurs qui guident le capitalisme d’aujourd’hui ...*”

Inkrwayab, me vre: Zot pena okenn program pu emansipasyon fam. Zot finn bliye li. Zot dir, kuma tu parti dan pei, bizin fam lor lalist proporsyonel. Plis “*Il faut organiser des espaces et des moments de participation pour les femmes*” pandan komisyon uver ki zot propoze otur kosey vilaz ek lavil. *Mersi*.

Lor Chagos ek Diego, zot pa pip enn mo. Samem sirman zot finn bizin tir kominike *apre eleksyon* pu dir li enn priorite: aköz zot ti kompletman bliye li.

Pa zis term “kapitalism” ki zot per pu mansyone. Zot per pu koz “internasyonalism”. E, pli gran prev zot pa degos, zot pa mansyonn term “socialism” dan zot program. Pa ditu. Mo finn fer enn “letid Algoritmik” (pu sit fraz pretansye enn zot manb servi), setadir enn serch dan Word, e “socialisme” pa mansyone ditu dan zot program. “Socialiste” mansyone enn sel fwa. E pa pe koz lor zot-mem. Ena enn vizyel lor enn lafis enn ONG apel CARES dan zot Program, e ladan ena nom enn invite internasyonal, “Brian Ashley, eco-socialiste”. Par kontras, Prezidan Repiblik Purryag, lor nom SAJ, dan Diskur Program anonse ki li pe amenn “innovative socialism”.

Alor, RA, kuma EDP, zot pa buku pli degos ki, dizon, Guy Ollivry, Dan Bundoo, Michael Atchia.

## Sheila Bunwaree ek Parti Justice Social

Sheila Bunwaree so rol dan politik inpe difisil predir. Li enn akademik, ki ti demisyone depi so pos liniversite, kree Parti Justice Social, fer lalyans ar Collendavelloo, kas Lalyans ar li enn semenn plitar, e lera vreman lite pu gayn so 20 kandida, malgre lanons ki li ena 60. So program vag, e san okenn vre pwin ki diferansye li depi MSM, MMM, Travayist ubyin PMSD – apar bonn intansyon. E kuma tu dimunn kone, sime ver lanfer ki ena pavaz bonn intansyon. Petet li pu fini dan EDP. Petet li pu rod enn lot karyer, andeor politik. Antuka, so parti, kuma buku lezot, li ti batir otur enn lider tu-pwisan, e kan eleksyon fini, pena siyn parti la.

## Roshni Mooneeram ek Ensam nu Kapav

So *Ensam nu Kapav* ti pe met Roshni Mooneeram kuma Premye Minis. Me, selman li ti ena 4 kandida. Li ti reprezant enn demars inpe “lakaz zuzu”, pa tro serye. Pli gran deba ki li ti provoke ti otur kimanyer eple “Ensam”. 10 semenn apre eleksyon, e so parti pa montre siyn ki li finn sirviv kanpayn elektoral.

## Georges Ah-Yan, Percy Yip Tong, Hurdoyal, Dr. Madewoo

Bann individi kuma Georges Ah-Yan, Percy Yip Tong, Hurdoyal, Dr. Madewoo, finn montre kimanyer kapav gayn ase buku vot, si u res dan politik “santrist”, mem san enn vre parti ni okenn proze politik, e si u fye zis lor enn melanz ant popilism, metod advertayzing, travay sosyal dan sirkonskripsyon. Kapav kikenn kuma Hurdoyal pu truv li lor lalist kandida enn bann gran lalyans dan lavenir.

Alor, apre Eleksyon Zeneral, ena 2 parti dan Lopozisyon Parlamter (MMM ek PT), ek enn seri extra-Parlamter.

Kimanyer LALIT sitye li dan sa terin extra-parlamter la?



## LALIT

Nu Program, nu lalist 28 kandida, nu program MBC, nu klip youtube, nu biltin nasyonal, anfin nu kanpayn an zeneral, li ti enn surs fyerte, mo krwar, pu nu tu. E nu kanpayn ti enn plezir osi. E, li finn form parti nu politik onn-going, dan enn fason integ ek integral. Buku plis dimunn konn LALIT asterla. Nu ena nuvo kontak partu. Nu dan enn pozisyon pu expansi distribisyon Revi LALIT e pu rekolte lartik depi pli buku dimunn. Nu finn devlop nuvo fason distribye trak. Ziska ler, nu pe gayn felisitasyon ase inatandi pu nu bann Program MBC. Nu partisipasyon dan eleksyon finn gard koerans nu program politik. E nu finn sorti plito ranforsi apre eleksyon zeneral.

Tem LALIT finn res lor azanda:

- ID Kard: pe al ver destriksyon databeys santral; me laspe represif so kad legal bizin tire.
- Diego Garcia: lor azanda net; mem si li paret SAJ fini kaptile lor ICJ.
- Lekonomi alternativ: lor azanda tulezur; plantasyon kann pe expoze kuma "gurma later agrikol", kan lindistri sikriyer nepli rantab san sibsidi masif Guvernman.
- Problem lozman santral aster: bann fos sis Leta lor nomb proprieter lakaz, e nomb somer, finn expoze par Rada Kistnasamy dan Program LALIT lor TV.
- Britalite polisyer lor azanda avek re-uvertir ka "swisid" Anand kuma Ramdhony.
- "Lavi Prive" v.s Prayvesi, enn dosye LALIT, lor azanda.
- Emansipasyon Fam -
- Reform Elektoral -

Me, eski eleksyon zeneral finn reysi kontribiye pu ranforsi nu striktir parti? Eski li finn ed nu batir nu parti? E si wi, dan ki fason? Eski nu ena ankor travay politik divan nu puki sa vinn vre? Li difisil pu zize. Me, eleksyon pa paret finn fer nu okenn ditor, sa li sir. Konstriksyon Parti LALIT li pu kle apartir asterla. E se sa ki nu pu fer nu priorite. Deza depi eleksyon, LALIT finn fer enn seri aksyon.

E, nu kapav asir lekter, an konklizyon, mem si Arvin Boolell

dir Parti Travayis pu travay ar LALIT, ki zame dan listwar nu pa finn travay ek Travayis, e pa asterla ki nu pu kumanse.

Sa lartik la baze lor enn kozri Lindsey Collen dan enn Seminar

LALIT an Zanvye. Me, lartik la finn integre komanter par lezot manb LALIT pandan deba apre, e finn met azur pu Revi.



**Jabaljas:** To finn tande, Bulbak: lapolis finn expoz enn nuvo Ponzi.

**Bulbak:** Kot to finn tann sa twa. Mo pa finn truv sa dan lagazet ubyen tann sa lor radio.

**Jabaljas:** Eta Bulbak, tulezur sa lor premye paz tu lagazet. Finn mem montre lamone Ponzi la lor MBC TV.

**Bulbak:** Mo krwar to pe fer konfizyon la.

**Jabaljas:** Laverite mo dir twa. Sa ti kumanse lane dernyer. Finn dir dimunn amenn enn gro som larzan dan enn tant bazar, ek depoz li dan enn lakaz dan Floreal.

**Bulbak:** Abe to kone, Jabaljas, dan bann Ponzi, pu atir larzan dimunn, bizin promet zot bann retur mirobolan. Dan sa Ponzi to pe koze, ki ti promet dimunn?

**Jabaljas:** Zisteman ti dir dimunn ki zot lamone pu duble apre eleksyon zeneral, le 10 Desam. Me selman investisman la ti bizin an larzan likid, rupi ubyen deviz.

**Bulbak:** Abe ki lapolis finn dekuver kan zot finn expoz sa sipoze nuvo Ponzi?

**Jabaljas:** To pa pu krwar: zot finn truv plis ki 200 milyon, an rupi ek deviz. Tu sa dan 2 kofor ek 2 valiz. Sa kalite larzan la, zis gro kapitalist ki ena sa!

**Bulbak:** Ankor enn fwa, Jabaljas, mo dir twa to pe fer enn erer: pa enn Ponzi sa.

**Jabaljas:** Ki to kone twa? To enn ekonomist twa? Taler to pu dir mwa sa li enn plan pu eponz sa likidite anplis ki ti an sirkilasyon!

**Bulbak:** Mo truve ki to o-kuran warning ki ansyen Guverner Labank Santral Bheenic ti fer lor sa zafer eksedan likidite.

**Jabaljas:** Me dan tusala, ena enn zafer ki trakas mwa: kifer sa misye ki an sarz sa Ponzi la finn gard tu sa larzan la dan kofor ek valiz dan so lakaz.

**Bulbak:** To ule dir kifer pa finn kasyet larzan la dan enn tru dan zardin?

**Jabaljas:** Ekzaktaman: mo pe rapel enn ansyen Minis Finans ti dir ki dan enn tru, kapav kasyet ziska 700 milyon rupi.

**Bulbak:** Jabaljas, mo byen krwar sa bann gro som larzan la pe fatig to latet. To pe melanz tu kalite zafer.

# LESON NIMERO ENN

## “LAVI PRIVE”, MANSONZ, KONPLO OTUR

### VOL DAN KANPMAN RAMGOOLAM ROS NWAR

Kan laktyalite ti domine net  
par zafer Kanpman Ramgoolam Ros Nwar,  
nu dan LALIT ti sezi lokazyon  
analiz enn-de lesan ki kapav tire depi sa evenman la.

Anu gete ki finn arive otur sa kestasyon kanpman Ros Nwar, ki ti premye ka lapolis kont Ramgoolam, kan li perdi eleksyon zeneral.

Ansyen P. M. Ramgoolam ti viktin enn kanbriolaz (e li posib kikenn finn anmemtan agrese) laba enn lanwit an Ziyet 2011.

Lerla, kan rezilta eleksyon deor e Ramgoolam inn perdi, li finn arete, li, dan siyaz lanket lor sa kanbriolaz la.

#### Kimanyer viktin vinn akize?

Kimanyer viktin finn ariv vinn akize? [*Sa lartik la ti ekrir e pibliye avan dekuvert kofor kot Ramgoolam River Walk, e kot li finn gayn lezot sarz kont li.*]

Enn kanbriolaz dan kanpman Premye Minis ti bizin enn sinp lanket pu rod voler. Me, sa kanbriolaz la, si Ramgoolam ti zis al donn depoziyon ordiner, ti pu riske expoz so lavi “prive” – li ti pe res dan so kanpman avek so metres – e li ti ule gard sa sekre, akoz limem li onte. Ala seki paret lapolis pe krwar inn arive.

Lesan inportan ki nu kapav tire se sa zafer ki dimunn apel “lavi prive” li pa ti bizin proteze par sosyete, parski li ule dir protez enn dub lavi. Par kont, “*privacy*” (an Kreol nu dir *prayvesi*) li enn lot kitsoz – enn drwa ki sakenn ena e ki lezot dimunn bizin respekste. Enn lavi dub, par definisyon, li inplik enn trale mansonz, e li inplik enn seri lezot dimunn dan mintenir sa mansonz la. Lavi etan seki li ete, “lavi prive” sirtu pu bann misye, li rarman enn kitsoz “prive”, setadir zis pu li. E, avek tu so mansonz, li lekotrer

integrite. E li pa konpatib avek enn sosyete uver, modern ek demokratik. Lavi prive enn zom\*, tan ki li res kasyet, suvan antrenn sufrans enn seri fam otur li: so madam konstaman imilye, so metres ek so zanfan bizin viv zot lavi net dan lonb. Sosyete pa ti bizin donn kudme dan sa maskarad la.

#### Lanturaz bizin viv mansonz ar zom pwisan

Parey kuma buku zom ki ena puvwar, Ramgoolam pa zis inn gard so lavi sekre, li, me enn trale lezot dimunn pe bizin fer tu kalite kitsoz pu gard so lavi prive “sekre”: M. Gooljaury dabor finn dir ki li ti dan kanpman Ros Nwar, pa Ramgoolam; Ramgoolam so bodigard, bann NIU ek VIPSU, lezot gran sef lapolis; gard konpayni prive kuma Brinks; anplwayed mezon; Ramgoolam so bann kamarad ki ti vinn dan fet; so madam ki finn det remarke ki li pa ti lakaz avek li sa swar la; madam ki ena “long seve” li mem, tifi sa madam la e so fiyanse; konpayni katering, sofer, ant ot. Tu dimunn ki finn partisip dan sa “cover up” la, zot bann potansyel konspirater, avek enn sarz konplo kont zot. Bann konsekans sa “cover-up” la telman inportan ki de sef lapolis, ansyen top responsab National Intelligence Unit ek ansyin gran sef VIPSU finn anfet arete pu “conspiracy”.

Alors, premye lesan se ki nu tu, sirtu lapres ek media, bizin petet aret kasyet “lavi prive” bann zom, sirtu seki ena kit puvwar. Li pa rann zot servis, kan byin gete. Dub lavi li merit expoze kom tel,

e sertennman pa maske. Pa zis pu Ramgoolam, me tu lezot.

Mem si kapav dir pena nanyen grav si enn zom ena metres, li sertennman vinn enn problem byin grav kan li komans koz manti, e kan tu dimunn otur li bizin koz mansonz lor letan, zis pu kuver so mansonz. Li pa inportan pu kone kisannla ena enn komeraz avek kisannla – sa ki inportan pu kone se enn lavi net ki pe kasyet dan lonb. Li danzere kan tu dimunn dan enn sosyete – ikonpri zurnalist – pe konplis ar mansonz enn zom pwisan. Byin suvan sa kuver osi so azisman abiziv ek predater anver fam. Sa konplisite la riske byin vit form parti enn konplo, enn konspirasyon. Kan nu kontiyn kuver sa dub lavi, li donn lokazyon lezot dimunn fer santaz ar zom la. Sa kalite sekre ki tu dimunn bizin garde kapav nuri konportman pli vyolan anver fam, e donn zom la enn degre inpinite.

Li ase kler ki li dan lintere piblik pu nu tu kone si enn zom piblik ena enn metres. Lakur dan UK inn truve ki li pa fezab pu Lemer Lond krwar li kapav gard enn metres ek enn zanfan san ki personn kone. Miterrand napa ti bizin reysi kuver “so” sekre – de metres ek de zanfan – ziska li lor so kanape.

#### Relasyon sekre e deklarasyon assets

Lor enn plan pli banal, ki serti nu koz gran gran koze lor “konfli dintere” dan kontra, tennders, nominasyon, si zom ki ena puvwar ena tut enn dezyem lavi ki li gard an sekre – e sa dezyem lavi la kapav prezant konfli dintere, si

lavi la ti revele? Ki lobzektif ki enn politisyen deklarat so bann “assets” kan li kapav ena enn metres ki kontrol sa assets la? Sa kalite “sekre” la pa pu ankuraz santaz, “blakmel”? Sa lespresyon “lavi prive”, par li mem, li implike ki ena enn dub lavi, enn lavi ki finn kasyet, ki limem li onte pu dekuver. Se sa laont la ki ankuraz blakmel. Anfet, nu kapav poz nu lakestyon si pa blakmel ki alabaz insidan kanpman Ros Nwar, e pa vol ordiner. Dan sa sityasyon la, ninport ki aksidan ubyin problem kuma kanbriolaz kapav antrenn pli buku mansonz, avek tu kalite konsekans inimazinab. Par egzanz, eski enn sityasyon “dub lavi” pa pu riske antrenn plis “hit and run”? Si kupab la aret so loto, sipa al direk istasyon, so dub lavi kapav vinn piblik, setadir ki li ti ansam avek enn madam, ki li pa ule dimunn kone? Tusala pu dir ki lasosyete pa ti oredi ankuraz e mintenir sa kalite mansonz la ek sa kalite dub lavi la. Kan nu vot pu enn dimunn, nu kontan kone si li malonet, si li koz manti, uswa si li uver ek onet.

Problem la asterla, lapolis ek zidisyer bizin esey konpran si ena enn lyen ant saki finn arive dan kanpman Ramgoolam ek lamor dan selil Misye Ramdhony. Zot pu bizin sey kone si sa lamor la rezilta enn “cover-up” ki finn pran bann proporsyon enorm. Uswa, li kapav pa sa ditu, me pu liye zot li zis enn taktik depi Ramgoolam so bann adwerser politik pu fors li avwe so lyezon: so silans kapav fer krwar ki ena kitsoz byen pli grav ki sa dub lavi ki li ti pe kasyet. Sa dezyem senaryo la ti anfet lanse lor *Facebook*, alepok. Uswa, eski li enn melanz sa de senaryo la?

Eski li pa ti pu pli bon pu tu dimun konserne, si sosyete ti kritik uvertman e kondann sa kalite dub lavi la? Sirtu kan li ti konsern dann zom piblik. Sa ti pu evit en tel “cover-up” ek enn tel derapaz, ki kapav fini byen mal. Anu fer enn rezolisyon pu lane pu rann lavi prive bann zom ki ena puwar

buku pli piblik. Anu desid pu aret konplis dan enn lavi prive ki so akter prinsipal, limem, li onte, e ki ankuraz mansonz ek derapaz de so par e depar tu so lanturaz. Par kont, seki nu bizin respekse se “prayvesi” tu dimunn. Pa zis sa, Leta bizin protez prayvesi tu dimunn.

Orizinal ekri par LC, LALIT, 22 Zanvye, 2015; tradir EW; met a zur par Komite Redaksyon 23 Fev 2015.

Note: Nu pe servi term “zom” par expre, parski nu pe analiz enn fenomenn “patriarkal”, enn restan “droit de cuissage” feodal dan Lerop.

---

## LESON NIMERO DE LYEN ANT KANPMAN ROS NWAR *ek* LAMOR DAN SELIL?

Sa lartik la ti pibliye dan *L'Express* Merkredi 28 Zanvye. Asterla nu pe repibliye li.

Ki linportans enn nuvo lanket lor lamor an Ziyet 2011 M. Anand Kumar Ramdhony kan li ti dan kaso ?

Mazistra Shefali Ganoo ti fer enn Lanket Zidisyer lor kimanyer li ti mor dan kaso. Mazistra ti truve ki ti enn ka swisid pandi. Dapre reportaz dan lapres, sipozeman li finn met pandi ar pwayne laport kaso ki oter so lazam. Lapolis dir zot inn truv li “pe alonze dan kaso”. Enn drol kalite pandi.

### Swisid?

Aster kan pe seye amar so lamor dan kaso ek vol (plis agresyon?) dan kanpman Ramgoolam dan Roches Noires dimunn pe kumans poz kestyon lor sa verdik “swisid”. Lakoz buku ofisyete Leta (lapolis, dokter lapolis ki fer lotopsi, zidisyer, mem amplwaye lopital, sofer transpor guvernman) dan lepase finn kasyet laverite lor bann lamor dan kaso, person dan Moris napa truv sa drol ki, apre ki enn Mazistra inn fini deza rann so zizman, lotorite pe reuver enn lanket zis kan ena enn sanzman dan Guvernman. Kumadir tu dimunn panse ki lanket lor lamor dan selil ti tultan enn fars detut fason. Leson ki nu tire depi saga Roches Noires, li depann lor kestyon swivan: *Eski bann lanket zidisyer lor lamor dan kaso zis enn fars?*

Parey kuma buku bann zenom depi Lendepandans, M. Anand Kumar Ramdhony finn perdi so lavi alor ki li ti dan lamor lapolis. Parey kuma lezot, li osi, pa truv kupab okenn deli ni li pa finn met pas divan Lakur. Li paret ki pa ti mem bizen ferm li. Enn so kamarad, enn nome Bigaignon, ti admet li finn koken mont so prop madam (li pa fasil met sarz si zot ti marye *korebyen*) e ti pretann li ti vann mont la ek Misye Ramdhony pu Rs200. Lapolis ti al fer lafuy dan lakaz M. Ramdhony me pa ti truv naryen. Alor, be kifer ti bizen ferm li dan kaso lapolis? Me pa pu li tusel ki kestyon poze. Kifer ti ferm Kaya? Kifer ti ferm M. Rajesh Ramlogun? Sa mem premye problem. Pu ki kalite ofans kapav ferm enn dimunn dan kaso? Paret ki pandan derulman ka, pa poz sa zar kestyon kle la.

Aster, kom dabitid dan bann ka lamor dan kaso, se dokter lapolis ki fer lotopsi. Sa napa bon ditu. Pena dut ena konfli dintere parski dokter lapolis napa selman koleg polisye (dan mem sistem lapolis), me zot egalman responsab lasante sa bann mem polisye ki zot mem sispe potansyel pu krim u bate-tuye. Lapolis vinn get bann *dokter lapolis* pu konsiltasyon si zot ena problem gayn somey, par egzanz, kan zot dan lekip ki perpetre tortir lor deteni. Li kler ki dan lavenir pu bizin ena enn lekip separe patolozis indepandan pu fer lotopsi dan sa kalite kes la.

E sa napa sel problem dan bann prosedir. Dan lanket zidisyer ki fer kan ena enn lamor dan kaso, Mazistra napa fer 'lanket' kuma lalwa paret pe ekzize. Dan bann ka kumsa, anfet Mazistra nek asize kumadir pe tann enn ka ordiner kot lapolis fer lanket, istil "teat adverser", kot lapolis pe fer lanket kom dabitid, avoka defann akize kom dabitid. Dan lapratik, anfet li lapolis ki pe rode sipa ena fawlple, ubyin non. E, li difisil parski zis zot prop koleg dan lapolis ki ti kapav inn fer sa fawlple la. Bizin enn lekip apar pu fer lanket pu sa kalite ofans. E Mazistra bizen *fer* inpe lanket.

E, polisye bizen gayn drwa organiz zot dan sindika pu protez zot kont bann lord ilegal. Lord ilegal kapav nuri tortir e nuri konspirasyon dan Leta pu kasyet tortir la.

### Kisannla pe rod enn sispe?

Si enn zur u pran enn demi zurne pu al asiste enn lanket zidisyer, enn lexperyans dezolan, lor enn kes lamor dan kaso kuma bann kamarad LALIT suvan fer, aturderol nu absan travay depi lamor Serge Victorine an 1979, depi kes lamor Kaya an 1999, apre lamor Misye Rajesh Ramlagun an 2006, u pu truve ki non selman Mazistra na pa met lame dan lapat, non selman lapolis napa rod enn sispe kuma zot sipoze fer, u pu truve ki lapolis ek reprezantan DPP fer tu kalite kustik pu pruve ki napena fawple. Klerman zot krwar ki li zot rol pu *diskilpe* bann polisye. Zot fer parey kuma bann State Law Officers ki defann bann fonksyoner servis sivil. U pu truve osi ki laplipar Mazistra finn rekrite direkteman depi biro DPP u State Law Office, e zot ena tultan enn mayndset an faver lapolis, mem kan lapolis, e sirtu kan lapolis, ena akizasyon britalite lor zot.

Lerla u truve ki Mazistra pa pe rod enn sispe e lapolis usi pa pe rod enn. Sa ki Leta fer se zis lav so lame lor kes tu sa bann zenom

ki mor apre ki zot finn britalize par bann fonksyoner Leta li mem. Zot fami abazurdi par enn lamas prosedir birokratik, e suvan pa reysi reazir atan.

Me ena fwa, fami la gayn sifizaman sipor e zot ena ase mwayen pu pey enn avoka, ki lerla gayn enn rol pu swiv derulman lanket (*watching brief*). Donk, suvan lafami ek enn avoka dan enn pozisyon mari feb pu bizen sey fer sa lanket la! Se avoka prive ki anpratik bizin sey truv enn kupab parmi polisye ki ti ena responsabilite vey sa deteni ki finn mor la.

Si ena pu eksplik sa enn lot fason, bann lanket zidisyer ki fer lor dese dan kaso, tultan paret enn fars. Ala kifer tu dimunn panse ki li normal ki enn sanzman dan Guvernman kapav remet ankestyon konklizyon Mazistra. Ala sa-mem Leson Nimero De ki nu kapav tire depi Saga kanpman Roches Noires.

Dan LALIT nu panse ki lamor dan selil ki fayle kuma "swisid" se zeneralman konsekans britalite polisyer, konsekans bate/tortire swa pu fer kikenn avwe enn ofans uswa inplik enn lot dan sa ofans la. Sa bann lamor ubyin krim degize an swisid pandi uswa kuma pa kone kot inn al tap kuttet lor sali ubyin tom sek dan kaso. Enn-de bann rezon ki sa kalite lamor dan kaso inn les kontinye se parski okenn Guvernman napa finn ena volonte politik pu aret tortir ek bate. Bann parti ki opuvwar ferm zot lizye lor la ek bann parti dan Lopozisyon demann pu aplik plis lalwa ek met plis lord, zot kriye pu *law and order*. Lerla bann ofisye ki fer lanket panse ki bizin ena plis bate ankor. Nu ki swiv bann kes lamor dan kaso nu panse ki sa mank volonte politik se parski ena enn konplisite malsin ant dimunn ki ena puvwar kuma Minis, enn kote, ek polisye, lot kote. Sertin polisye kasyet *lavi prive* bann Minis, zot bann metres ek zot sezur dan lotel; zot "perdi" bann papye pu Minis so

bann kontravansyon lor volan ; zot reysi pa met sarz lor zanfan Minis kan li fim gandy, etc. Lalis la kontinye. An retur Minis ek lezot politisyen ferm lizye lor ka lamor dan kaso, e napa fer naryen pu anpes dedizen e dedizen swisid ki sipozeman bann zenom ki ti an parfet sante inn komet.

### Byin Bizin Re-Uver Lanket

Asterla pe reuver lanket dan lamor dan kaso dan kes Roches Noires. Byen bizen sa. E personn pa truv sa drol. Li enn fe ki ni Leta ni personn dan pei an antye napa krwar ki swisid finn koz lamor. E sa li enn siyнал ki nu dan LALIT nu krwar ki bizen ena enn reuvertir lanket dan tu bann kes kot finn ena lamor kan dimunn ti su responsabilite lapolis, e kot so fami ena dut lor ki finn koz zot lamor. Dan ka lamor M. Ramlagun, samem premye ka kont bann polisye su *Anti-Torture Law* 2003 (Criminal Code Amendment Act Section 78). Ka kont bann gard ti perdi dan Lakur Intermedyer, me DPP inn fer lapel baze lor argimantasyon solid. (<http://www.lalitmauriti.us.org/viewnews.php?id=857>).

Me, kes la kumadir inn disparet. Li pa paret lor *Cause List* Lakur Siprem. E finn ena 9 long banane depi ki misye la inn mor.

Kan nu reget lamor M. Ramdhony ek M. Ramlagun ek osi lamor Kaya, dan nuvo lanket, kitfwa nu kapav kumans prosesis pu anpes ankor lamor dan kaso. Sa bann zom ki truv lamor, zot reprezant en ti-nomb ban ka tortir ek bate par anketer. Laplipar anfet sirviv, zot sap lwin. Me, zot ena sekel sikolozik grav pandan zot lavi net. Donk plis ki tu, li enportan ki tortir arete net. LALIT inn fer 10 propozisyon pu aret sa, ki kapav al lir:

(<http://www.lalitmauriti.us.org/viewnews.php?id=443>)

LC, tradir VN.  
u LALIT, 25 Zanvye, 2015.

# LALIT SUMET PROPOZISYON A MINIS FINANS

LALIT finn sumet enn seri propozisyon a Vishnu Lutchmeenaraidoo pu bidze ki pe prezante le 23 Mars 2015. Bann propozisyon LALIT santre lor neseseite enn lekonomi alternativ ki repoz lor diversifikasyon agrikol ek prezervasyon e transformasyon manze lor baz indistriyel, pu konsomasyon lokal ek eksportasyon. Se sa kalite devlopman la ki pu amenn kreasyon lanplwa masif e anmemtan asir sekirite alimanter dan sa moman kot disik ankri ek lezot sekter kuma BPO, turism pa stab ditu.

Depi 2008, anplin kriz alimanter, LALIT ti deza adres enn dosye avek bann demand dan sa direksyon-la a Minis Finans. Me, Rama Sithanen ki ti Minis Finans finn kontiyn persiste avek enn politik ekonomik ki kontiyn donn serom sekter kann ek disik, malgre kriz dan sa sekter la. 2 Minis Finans ki finn swiv apre, Pravind Jugnauth ek Xavier Duval finn kontiyn mem politik, ki zordi responsab pu amenn destriksyon anlwa par milye ek agravasyon kriz sosyal.

Nu finn osi sumet nu demand a Minis Agro-Indistri ek Sekirite Alimanter, M. K. Seeruttun pu li kapav pans enn devlopman agrikol andeor disik ek kann.

Nu propozisyon finn depoze kot sa 2 minis la Zedi le 5 Fevriye 2015 ansam avek nu program *Pu enn Lekonomi Alternativ*, nu fim nu ti fer an 2008 lor kriz dan sekter disik ek sart lor sekirite alimanter ki finn enndors par 10 lorganizasyon dan Moris.

Link (I) Program pu enn Lekonomi Alternativ (2005);<http://www.lalitmauritius.org/index.php>  
Link (II) Sart lor sekirite alimanter;<http://www.lalitmauritius.org/index.php>

## KOPI LET KI NU FINN ADRES MINIS LUTCHMEENARAIDOO

Dear Sir,

We are writing to you in the context of the forthcoming 2015 Budget, with suggestions regarding measures for agricultural diversification and food production.

On 16th April 2008, in the context of a grave international food crisis, we addressed a letter and a voluminous dossier to the then Minister of Finance. Our suggestions do not appear to have produced the necessary response. Instead the then government plunged deeper into allocating resources to transform the sugar industry into a "cane industry", with massive job destruction. At the time we argued that the sugar/cane industry did not have much of a future, with the price of sugar on a slippery slope, hence the need to consider diversifying agriculture.

The price of sugar has continued to plunge to levels where cane planters are giving up cultivating their land, without there being any strategic planning for alternative crops. Government is at present having to subsidise cane plantation to the tune of over Rs. 200 million a year: resources that should be allocated to alternative crops, transformation and preservation of food crops, development of a sustainable fishing industry.

We are suggesting that in the next Budget, special attention should be given to development that will create stable employment on a large scale:

1. Financial and logistic support for planters of food crops, animal rearing, sustainable industrial fishing.
2. The University of Mauritius should organise Seminars and Conferences to integrate traditional knowhow with modern scientific farming.
3. Development of industries for foodstuff transformation and preservation, for local consumption, price stabilising, and export.
4. Resources allocated to studying potential export markets for food products, and the promotion of such exports.
5. Bring about legislation that aims to reserve a sufficient, and increasing, proportion of agricultural land for food crops and animal rearing.
6. Resources to encourage co-operative production of food crops, meat production and fishing.

The above measures, if integrated into the economic development agenda, could create stable employment, assure food security in the long term, have a positive effect on the balance of payments & decrease dependence on sugar which has very limited viability.

We hope you will consider the above suggestions when preparing the next Budget Speech.

We are including a number of documents to support our proposals.

- a) LALIT's booklet on alternative politics for the economy.
- b) Food Security Charter
- c) 19 Minute LALIT video film on sugar and agriculture.

Yours sincerely,

Ram Seegobin, For LALIT, 4 February, 2015.

# KI MEZIR PU RODRIG?

Minis Finans, Vishnu Lutchmeenaraidoo finn anons enn seri desizyon dan kad so vizit Rodrig, an preparasyon bidze 2015.

Li finn anons ki Marketing Bord pu asir marse ek pri garanti pu zinzam, lay, zariko ruz ek safran ki prodwir dan Rodrig. Sa mezir la par limem li paret bon, me li insifizan pu ed planter ki fer fas a buku difikilte.

An Ziyet 2013 dan Revi LALIT Nimer 109 nu ti finn met enn lartik andetay lor Plan Stratezik pu Sekirite Alimanter 2013-2015 pu Rodrig. Li ti enn plan Minister Agro-Alimanter kot ti anons enn seri mezir pu ankuraz plantasyon ek elvaz dan Rodrig, me nu an 2015 e buku kitsoz pa finn realize dan sa plan la. Plan stratezik la ti koz lor nesosite devlop enn bon sistem pu ramas dilo lapli, me li res enn mezir ki pankor realize. Zordi Minis Lutchmeenaraidoo admet ki ena problem dilo dan Rodrig, me so propozisyon ase vag: li dir ki Moris pu ofer so *savoir faire* pu rezud problem dilo.

Konsernan dilo potab, proze desalinizasyon finn enn fiasko malgre bann gro investisman. Lor 4 plant desalinizasyon dilo ki finn instale, ena enn sel ki pe fonksyone ek an operasyon dan Bay Lascar, leres pa pe fonksyone akoz problem teknik ubyin akoz mank dilo somat dan landrwa kot zot ete.

Minis finans finn osi anons afretman enn bato pu ranplas Mauritius Pride ki finn fini vande pu Rs30 milyon rupi. Enn lot problem ki finn trene pu enn but letan. Transpor maritim ant Moris ek Rodrig pe fye zis lor Trochetia ki pe pa resi transport sifizaman marsandiz pu Rodrig. Anfet otur peroyd lane ti ena peniri bann konsomasyon debaz.

Pu zenn an somaz, li finn re-anons plan existan *Youth*

*Employment Program*, sa zis pu kol-mat problem somaz dan Rodrig.

Pu bidze 2015, ti bizin alwe larzan pu devlop bann sekter

aktivite kot dimunn dan Rodrig deza ena gran konesans kuma lelvaz, plantasyon ek lapas!

## ENN POEM an 2 langaz

### Kontrol Uvriye: "Konn to Lennmi!"

li byin *fupamal* kuler u lapo purvi u *travay pu li*;

li byin *fupamal komye* u tuse purvi u *ogmant so rant* pu li;

li byin *fupamal* kisannla abit *pli lao* purvi batiman la pu li;

li donn u liberte *parol pu kritik li* purvi zame u pa *azir* kont li;

li sant eloz grandyoz lor limanite mem li byin *kone masinn* kut pli *ser* ki travayer;

negosye ar li,  
li riye;  
enn dan lot,  
li gayne;

*me*,  
met li o-defi,  
*la*,  
li *tuye*.

Pu li pa perdi pozesyon ki li finn akimile,  
li byin *fupamal*  
si li detrir lemond antye.

*Tradir par Lindsey Collen*

### Workers' Control: Know Thy Enemy

he does not care what colour you are

provided you work for him;

he does not care how much you earn

provided you earn more for him;

he does not care who lives in the room at the top

provided he owns the building;

he will let you say whatever you like against him

provided you do not act against him;

he sings the praises of humanity

but knows machines cost more than men;

bargain with him he laughs and beats you at it;

challenge him

and he kills;

sooner than lose the things he owns

he will destroy the world.

*Orizinal an Angle, depi "Readings and Witnesses for Workers' Control", edite par Ken Coates ek Tony Topham (1970)*

# KART IDANTITE

## LALIT MET “ELI LEPEP”

### DIVAN ZOT RESPONSABILITE

Ser Lonorab Pravind Jugnauth,  
Ivan Collendavelloo, Roshi  
Bhadain ek Sanjeev  
Teeluckdharry,

Nu pe adres zot sa let uver la sirtu parski zot tu finn pran pozisyon ferm piblikman kont sistem Kart Idantite Nasyonal biometrik obligatwar ki ti introdri par dernye rezim Ramgoolam. Ena buku parmi zot finn mem aktivman angaze dan bann aksyon kont sa: Hon. Collendavelloo ti enn parmi sa 25 personalite ki ti siyn deklarasyon inisye par LALIT pu kontre introdriksyon nuvo sistem kart idantite biometrik: Hon. P.Jugnauth ek Bhadain ti loz enn premye ka Lakur siprem pu chalennj databeys kart idantite; ek Hon. Teeluckdharry ti piblikman asosye avek dezem ka Lakur Siprem pu chalennj abi drwa imin koze par sistem kart idantite biometrik kan Leta inpoz li lor popilasyon an antye. Zot tu aster swa Minis u byen depite. Enn parmi zot finn mem ranplas ex-Minis ICT Pillay-Chellumbrum ki ti responsab pu sa sistem kart ID biometrik la ek ti osi so defanser politik ek institusyonel. Asterla lefet ki Minis ICT li anmemtan plenyen ek defander pe kree enn sityasyon konplike dan ka kart ID dan Lakur Siprem

Dan sa dernye 18 mwa la, nivo konpreansyon dimunn lor ki sa sistem obligatwar kart idantite nasyonal biometrik vedir fas a sa nuvo realite ki sa sistem MNIC finn inpoze:

Dimunn finn bizin fer fas menas pu refiz pey pansyon, donn sertifika moralite, travay dan sekter piblik, akse a kredi, paspor, drwa pu vote kan kart NIC finn retenir par enn lot dimunn pu lezot demars;

Dimunn finn travers sa lexperts kot ofisye MNIC pran done biometrik ar zot;

Dimunn inn realize ki lalwa MNIC li kuma enn lalwa ‘pass’ kot enn individi bizin sarye so NIC an permanans an ka enn ofisye dimann li prezant li;



Dimunn finn truve kimanyer konpanye prive egziz prezantasyon NIC pu tu tranzaksyon avek piblik;

Dimunn finn vinn pli konsyan menas lor prayvesi kote informasyon personel ek konsyan danze pu sekirite done popilasyon an antye ki kapav mal utilize par Leta, pirate, kokin ubyen vande;

Dimunn ti deza trakase par sa gro bidze 1.5 milyar rupi lamone piblik pu fer sa proze la ek asterla, dan kontex aktyel, pe poz kestyon ki vre rezon guverman Ramgoolam finn siyn enn lakor sekre ki kasyet konpayni prive ek individi ki finn resevwar su-kontra ek enn parti dan fon piblik pu mont sa sistem MNIC.

Tusala, azut lor seki ti dir dimunn dan kumansman: dapre lalwa riske pey Rs100.000 lamann ek 5 an prizon si pena nuvo kart ID ek osi sa gro som sak individi pu bizin peye pu ranplas enn kart ki finn perdi.

Sistem MNIC plis inpopiler ki zame.

Sa reflet nuvo tandans onivo internasyonal kont sirveyans Leta stil ‘Big Brother’ amezir plis dimunn ek plis Leta rekonet menas a liberte ek lanpler abi drwa imin ki ena avek sistem kart idantite nasyonal biometrik obligatwar ek lezot sistem sirveyans par Leta. Dan Leta Zini, Bush so *Real ID program*, Lostrali so *Access Card*, proze kart ID obligatwar dan Canada ek Lafrans, kart ID UK, zot tu finn aboli ek dan Lend, Lakur Siprem finn tir Lord Lakur 2 fwa pu anpes Leta obliz dimunn tir kart ID (Aadhar card) pu ki sitwayin gain akse a servis Leta.

LALIT satisfé ki guverman finn reafirm so langazman dan diskur Prezidan, pu “detrir” tu “labank done ki kontenir lanprint ek foto biometrik sa nuvo kart idantite nasyonal la”.

#### Demand

Aster nu demand vizavi u antan ki Minis ek/u swa Parlemerter se pu asire ki amand lalwa Kart Idantite Nasyonal pu li nepli obligatwar:

- a) pu ena enn Kart ID,
- b) pu prezant enn Kart ID a ninport ki ofisye lapolis u lot ofisye ki dimann u prezant li, u prezant li ninport ki plas ek ninport ki ler ki ofisye la dikte;

**Antretan**, ziska ki amandman lalwa, pu institiye 2 mezir interimer pu ki premyeman, ninport ki dimunn fer aplikasyon pu nuvo Kart ID pa bizin sumet so lanprint, ek dezyeman, ki dimunn kapav servi lezot dokiman idantite pu ninport ki demars ofisyel parey kuma dan dernye eleksyon zeneral.

Salitasyon,

Rajni Lallah, pu LALIT,  
12 Fevriye 2015

# LALIT CALLS ON SPEAKER of NATIONAL ASSEMBLY KREOL AS OFFICIAL LANGUAGE

LALIT has written to the new Leader of the House, Sir Aneerood Jugnauth,  
and Speaker, Hon Ms Hanoomanjee,  
calling for a constitutional amendment  
to allow Kreol to become medium in the National Assembly,

Dear Sir, dear Madam,  
Since the *Alliance Lepep* has come to power, and since the new Government intends that, when appropriate, the National Assembly be broadcast live on MBC TV, and

\* Since Kreol is the main language of “lepep”,

\* Since *Ledikasyon pu Travayer* had a Survey conducted by SOFRES in 2009 which showed that 67% of the people are in favour of using Mauritian Kreol in the National Assembly, only 18% are strongly against, and 9% somewhat against. This was despite the survey also showing, in another question, that only 20% of people knew there were Kreol dictionaries in existence!

\* Since Kreol is now taught as a subject in its own right, in schools, and has been for three cohorts,

\* Since Court Transcribers have led the way by following a course in written Kreol, organized by the *Institute for Judicial and Legal Studies*,

\* Since the MIE has a Kreol Unit headed by Dr. Nita Ragoonundhun, preparing text books in Kreol,

\* Since the University of Mauritius and the Open University offer courses in and on Kreol at graduate level,

\* Since the theoretical linguists, in particular Prof. Dany Adone and Dr. Fabiola Henri, have done the groundwork on elucidating the Mauritian Kreol grammar we all already use naturally,

\* Since there is a national orthography prepared by, inter alia, Dr. Vinesh Hookoomsing and Dr. Arnaud Carpooran,

\* Since there is a growing body of literature in Mauritian Kreol,

\* Since *Ledikasyon pu Travayer* was in 2013 awarded the UNESCO Linguapax Prize for promotion of the mother-tongue, Kreol,



Desin Picasso, The Frugal Repast, 1904

\* And since there are full-length dictionaries, and a grammar handbook prepared by Dr. Daniella Police,

We call on your Government, which, together with the OPR, now has a 3/4 majority, to introduce a Bill for a Constitutional Amendment at the first Sitting of the National Assembly, so that the Official Languages of the National Assembly become both English, as it is at present, and Mauritian Kreol, while French can still, as it is now, be used for addressing the Chair.

This means, in technical terms, amending the Constitution to add the letter and words in square brackets:

*Section 49: The official language[s] of the Assembly shall*

*be English [and Mauritian Kreol] but any member may address the chair in French.*

We believe that, if approached in good faith, that the political parties in the Opposition will agree to the Amendment.

In practical terms, the Hansard Stenographers will need a one-week training course. The Open University, MIE, LPT, or the University of Mauritius, can probably organize one, or the Speaker can perhaps call on an individual pedagogue to run such a Course.

We suggest that the Minister of Justice calls for volunteers (like the Kreol Speaking Union, academics, associations) to translate *The Constitution*, immediately, and *Erskine May: Parliamentary Practice*, over the next 6 months (all 500 pages), into Kreol. The Speaker and Deputy Speaker will need to set up a small committee of lexicographers with knowledge of both English and Kreol, to discuss “Parliamentary” and “unParliamentary language”.

This process of decolonization and further democratization will also be a unifying factor for “the people” of the country.

We thank you for considering this.

Yours sincerely,

*Rada Kistmasamy, for LALIT, 29  
December, 2014*

Copy to: Minister of Justice, Hon.  
Ravi Yericadoo.  
Leader of Opposition, Hon. Paul  
Bérenger.  
Head of Labour Parliamentary  
team, Hon. Shakeel Mohamed.  
The Press.



# LANGAZ MATERNEL KUMA MEDYOM

REVI LALIT finn resevwar kopi sa “let uver” a Minis Ledikasyon  
ki lasosyasyon LPT finn adres a li.

Ser Madam,  
Nu pe ekrir u antan ki nuvo Minis Ledikasyon pu partaz avek u nu inkyetid lor lefe destriktif kan pe kontiyn siprim lang maternel dan lekol, enn pratik ki finn persiste depi lepok konlonyal.

Nu lasosyasyon, kuma u devet okuran, finn konstaman, depi plis ki 30 an, revandik itilizasyon lang maternel kuma medyom pu montre dan lekol pu rezon byin sinp ki li meyer pratik edikatif, spesyalman pu manye avek fasi-lite konsep abstre ot nivo ek pu reflexion kreatif, me osi pu literesi debaz.

Selman, depi dernye 10 an u plis, nu finn realize, apre buku reflexion ek letid, ki li enn isyu buku plis profon ki sa.

Zis nu ki panse ki pe infliz ditor konsiderab lor nu zanfan.

An 2009 nu ti organiz enn Hearing Internasyonal lor ditor ki zanfan sufer kan siprim zot lang maternel dan lekol. Li ti enn “tribinal” internasyonal ki nn met dibut spesifikman pu gete eski efektifman pe fer ditor nu zanfan dan lekol kan pe kontiyn siprim zot lang maternel.

Hearing ti konklir ki “apartig bann lexanp ki finn prodir pena okenn dut ki pe infliz domaz emosyonel ek sikolozik grav lor zanfan avek reperkisyon aflizan lor lafami antye.”. Ti truve ki devlopman kognitif zanfan osi pe afekte. NU ti avoy enn kopi sa fayndings la Minis Ledikasyon alepok ek lezot linstitision edikatif.

Dan enn deklarasyon ki u finn fer dan lagazet antan ki nuvo Minis Ledikasyon, u finn dir ki lekol bizin enn plas kot zanfan epanwi. Sa ti pu vremerm merveye. Me selman, li pu res nek enn rev si nu zanfan ancor oblize anprann atraver enn ubyin

plizir lang, ki pu zot paret natirelman kumadir Latin, enn langaz mor.



Desin August Renoir

Anplis, nu atir u latansyon lor lefet ki SOFRES ti fer enn sondaz pu nu lasosyasyon an 2009 lor latitid dimunn vizavi itilizasyon Kreol pu anseyn size syantifik, ek selman 38% ti swa kont ubyin plizumwin kont, alor ki 53% an-faver. Sa sif elve sirprenan an-faver la ancor plis etonan kan dan mem sondaz demontre ki selman 21% dimunn ki finn intervyue kone ki ena enn diksyoner Kreol-Angle, selman 20% kone ki bann lekol Prevok servi Kreol kuma medyom, ek selman 7% okuran ki ena kur kreol dan liniversite.

Nu pre inklir enn kopi Rezime Fayndings Hearing LPT la. Anplis, nu pe kit kopi 1 liv 200 paz lor sa size la, ki inklir rezilta sondaz ek rapor Hearing limem.

Nu panse ki sanzman nesaser pu asire ki politik ofisyel langaz Leta aplike dan lekol opizale, protez efektifman zanfan Repiblik Moris kont ditor kognitif, intelektuel ek emosyonel. Antan ki premye fam Minis Ledikasyon, nu panse ki u pu dan enn bon pozisyon pu sweyn langaz “maternel”. Nu realize ki anpartikilye, pu amenn sanzman ki nesaser, bizin inform piblik, sirtu paran ek profeser, osi byin ki ofisyer Minister, lor resers existan lor

Kreol Morisyin. Plis desizif ancor, byin sir, enn fe mwini koni, seki aprantisaz atraver lang maternel amenn ot nivo konpetans dan 2yem ek 3yem lang.

Lepok pu sanzman ideal, Lingwist teorik kuma Prof, Dany Adone ek Dr. Fabiola Henri, finn abat enn travay fondasyon imans lor gramer ek syntax Kreol Morisyin dan liniversite prestizye kot zot travay dan Lalmayn ek Lafrans respektivman.

Lortograf Kreol finn standardize par diferan lingwist enn apre lot. Akademi Kreol Morisyin finn prodir enn gid gramer Kreol pu profeser. MIE ena so prop Yunit Kreol. Ena profeser par santenn ki kalifye pu anseyn kreol kuma size, e ki finn metriz kreol ekrit. Par milye zanfan pe deza etidye Kreol dan lekol, Linstiti pu Letid Zidisyer ek Legal finn fer so premye kur transkrayber Lakur, ki klerman transkripir prinsipalman an kreol. Liniversite ek Open University ofer enn varyete kur lor Kreol.

Nu sigzere ki fason swazir ki ‘meyer pratik’ pu enn pei kuma Moris se pu swazir pu aprann depi politik lang maternel bann pei avek relativman tigit popilasyon ki ena parmi meyer rezilta akademik onivo mondyal. Par exanp Norvez, Finland ek Laoland zot pa bann gran pei, zot servi lang maternel kuma medyom, ek zot realiz parmi bann meyer rezilta dan lemond.

Nu pare pu ena enn rankont avek u ek bann ofisyer u Minister ninport kan pu plis detay ki u kapav bizin lor sa size krisyal la.

*Sinserman,  
Alain Ah-Vee,  
pu Ledikasyon pu Travayer, 22  
Desam, 2014*

# MLF CALLS ON NEW MINISTER PERRAUD PRIORITIES FOR WOMEN'S EMANCIPATION

LALIT is publishing a letter sent by Muvman Liberasyon Fam to the new Minister of Gender Equality, Child Development & Family Welfare.

We are also publishing one of the attachments to the letter, the Government's "Protocol" which allows victims of sexual assault the possibility of going to the *hospital* first, and then having the police called in if requested, into the caring atmosphere of the hospital. It is not necessary to go to the Police, first, as people keep repeating.

Dear Madam,  
The long-standing women's association, *Muvman Liberasyon Fam*, would like to put on record, for your information as new Minister, some of the changes that we would like to see for all women.

## **1. Cabinet needs to be informed on Women's Problems being in large part the result of not enough Jobs and not enough Housing**

The MLF knows from experience in the women's movement over nearly 40 years, and having learnt from the generation of women before us, too, that women's emancipation and liberation, and even our protection from physical violence in a male-dominated, very hierarchical society, depend largely on plentiful, good jobs for women, reasonable wages and conditions for women, and on the freedom and capacity for women to lodge themselves and their children *independently*. Work and housing are not the responsibility of your Ministry, we realize, but what we request is that these *women's issues* be thrashed out at political level, and at Cabinet level. We call on you to raise the issues.

## **2. Name of your Ministry**

We request that the Ministry revert to its previous name: "Ministry of Women's Rights". We believe that the concept of "gender equality", which has replaced the more profound

concepts of women's emancipation and women's liberation, was introduced, not as a result of women's struggles, but in order, rightly in a way, to begin to put women's rights on the agenda in societies where women are so oppressed that they are not able to use terms like "emancipation" and "liberation". But in Mauritius terms like these had already been household words for 25 - 50 years, respectively, before the name-change. So, the name-change to "Gender Equality" for the Ministry was thus a step backwards in the case of our own country. We realize that this demand, too, is not in the realm of what is directly your prerogative, but debate on the issue would, in itself be important.

## **3. Violence Against Women**

We suggest two immediate actions on the issue of violence against women, which has rightly been in the news a great deal over the past few years. As background, for your perusal, we enclose the Charter Against Violence Against Women, endorsed by the women's movement.

a) That your Ministry publish the Thea Mendelssohn Report on domestic violence. This could then be the point of departure for a national debate. The Report, which dates from the 1990's, was the document used by your predecessors while preparing the 1997 Domestic Violence Act. It was our Association that called on the Ministry to get an expert

in from Australia in order to advise on best practices from the State, on laws against domestic violence and on other measures against domestic violence. Her Report has never, however, been published, let alone debated. It is perhaps the "other measures" that have been left hidden "*dan tirwar*". But whatever it is that has remained secret, we have no idea "*why*".

b) That your Ministry set aside resources in order, jointly with the Five Main Hospitals in Mauritius and one in Rodrigues, to campaign so that all women in the country know that, in cases of sexual assault, *the first stop can be the Hospital*, where there have been Sexual Assault Units for years. MLF in fact lobbied and mobilized for this, and we won it as a gain for women. Victims are thus cared for first – physically, psychologically, against STDs, pregnancy prevention, etc. Women and children who suffer sexual assault do *not* have to go to the Police first. And yet, the Hospital Sexual Assault Units keep falling into disuse for lack of the massive sensitization campaign about their existence that is such a crying necessity. (We attach the Protocol concerned that was developed in the past with the Police, but never popularized, except by MLF with our limited resources, and seen on your Ministry's site, see attachment on that.) We still hear everyone on Radio, including the Police and

## Protocol of Assistance to Victims of Sexual Assault [Between Ministries and Police]

### Main Provisions

With the application of the Protocol (since March 2006), adult victims of sexual assault may call:

(Scenario 1) At the Police station found in the area where the offence has been committed; or

(Scenario 2) Directly at any of the Sexual Assault Units of the 5 regional hospitals (Dr. Jeetoo, SSRN, Flacq, J,Nehru & Victoria).

Scenario 1: When a victim of sexual assault reports the case to the Police Station in the locality where the offence has committed:

\* Victim gives a regular declaration regarding only the gist of the offence. The full statement may be taken, at a later stage, at the hospital. Thereafter, the victim proceeds to the nearest regional hospital;

\* The Police Station contacts the Police Medical Officer and makes arrangements for the early examination of the victim;

\* The Medical Records Officer (Casualty) will immediately inform the Ward Manager or the Charge Nurse of the Casualty about the case so that arrangement will be made forthwith to receive the victim who is then seen, on a fast track, by the doctor for emergency treatment, if required;

\* The Ward Manager/Charge Nurse will inform other medical officers, Ward Manager, Charge Nurse of designated Wards for admission of victims (Gynecologist, Psychologist, medical Social Worker) about the case so that they arrange to see the victim at the hospital;

\* A specific place has been earmarked by the Ministry of health and Quality of Life in one Ward for female adults where the team mentioned above will see the victim as and when required. Arrangements will be made at the level of the hospital for victims to be treated in the presence of a close female relative;

\* The medical examination is undertaken and swabs are taken by the Police Medical Officer at the hospital;

\* Appropriate treatment for HIV/AIDS should be given to the victim.

\* The Police Station informs the Ministry of Women's Rights, Child Development, Family Welfare and Consumer Protection of the case of sexual assault. Subject to their consent, adult victims will be provided with psychological assistance by the Psychologists of the ministry of Women's Rights, Child Development, family Welfare and Consumer Protection.

2: When a victim of sexual assault goes directly to any of the 5 regional hospitals:

\* The victim goes directly to the Casualty Department.

\* The Medical Records Officer (Casualty) will immediately inform the Ward Manager or the Charge Nurse of the Casualty about the case so that arrangement will be made forthwith to receive the victim who is then seen, on a fast track, by the doctor for emergency treatment, if required;

\* The Ward Manager/Charge Nurse will inform other medical officers, Ward Manager, Charge Nurse of designated Wards for admission of victims (Gynecologist, Psychologist, Medical Social Worker) about the case so that they arrange to see the victim at the hospital;

\* A specific place is being earmarked by the Ministry of health and Quality of Life in one Ward for female adults where the team mentioned above will see the victim as and when required. Arrangements will be made at the level of the hospital for victims to be treated in the presence of a close female relative;

\* The Ward Manager/Charge Nurse will inform the Police Post which in turn contacts the Police Station in the locality of the hospital and makes arrangements for a statement of the victim to be taken;

\* A Woman Police Officer from the Police Station of the locality of the hospital will take the preliminary statement of the victim. Further statements would need to be taken, at a later stage, by officers of the Police Station of the region where the offence took place;

\* The medical examination is undertaken and swabs are taken by the Police Medical Officer at the hospital;

\* Appropriate treatment for HIV/AIDS should be given to the victim.

\* The Police Post informs the Ministry of Women's Rights, Child Development, Family Welfare and Consumer Protection of the case of sexual assault. Subject to their consent, adult victims will be provided with psychological assistance by the Psychologists of the ministry of Women's Rights, Child Development, family Welfare and Consumer Protection.

other officers of the State, advising victims with all the conviction in the world to “go to the Police”. In fact, once a victim is in one of the Sexual Assault Units, then, should she wish to give a statement to the Police, a woman officer is invited into the caring atmosphere of the hospital in order to take the statement there.

#### 4. National Women’s Council

We call for a national consultation on the role of the NWC. In particular, we call for the following changes in the conceptualization of the Council:

a) That the aim of the NWC be clearly stipulated as for the emancipation and liberation of women.

b) That only non-religious, non-communal women’s associations be registered with the NWC. This is not just because these organizations are divisive, but also because all the religious hierarchies are notoriously conservative on women’s issues. At the end of the year gathering in the NWC (Floreale Regional), we

even had the embarrassing spectacle of one women’s organization present praying. This immediately and predictably provoked a kind of “surenchere” reaction by some women of other beliefs. The best thing would be, we believe, to limit registration by your Ministry to *only* those organizations which are secular and open to women of any (or no) religious practice or faith, and whose aims are the advancement, emancipation and/or liberation of women.

c) That no profit-making organizations, or small enterprises, be registered with the NWC either. Profit-making enterprises aim at profit, not at women’s emancipation. They tend to divide women into employers and employees, instead of uniting us as women. And there are other places for such organizations to federate.

d) That the NWC be independent of the State.

e) That all the bureaucratic measures against democracy in women’s organizations be

removed from the NWC regulations and also from the Registrar of Association’s regulations. Women’s organizations must have full control over all their funds. It must be made easier to register changes in office bearers. There should be no tax or other bureaucratic impediment on democracy, as there is at present. In addition, we call on you to take a stand in favour of the Registrar of Associations using his discretion so as to allow minutes (a women’s association’s “collective memory”) in the mother tongue, mainly Mauritian Kreol, pending a change in the law allowing Mauritian Kreol if it is the vernacular of the meeting, as it inevitably is.

We take this opportunity of wishing that your Ministry, after a change in Government and at this New Year, takes new initiatives to further women’s emancipation.

*Yours sincerely,*

*Rajni Lallah, Ragini Kistnasamy,  
for the Muvman Liberasyon Fam.*

## LAMIZIK: IMANS TRAVAY MENWAR PE FER

Stephane Honore (pli koni kuma Lelu Menwar) so travay mizikal byin spesyal. U tann Cassis ek Bain des Dames ladan. U tann lamizik ki dimunn zve dan kwin sime ek devlope ansam ek kamarad ladan. U tann lavi lepor, matlasye, ansyin metye Porlwi ladan. U tann lavi Chagosyin ki finn debark dan larad Porlwi ek ki zot lexperyans finn tise dan listwar abitan Porlwi. U tann enn lamizik ki finn travay buku pu reysi fer. Ena travay pu invariant nuvo son par invariant nuvo linstriman avek lakok pistas ek tiz fler kann. Ena travay pu fer ravann ek adapte li dan fason ki enn mizisyin anvi zve. Ena ritmik sega ki devlope pu vinn enn lot kalite ritmik net, me ki tuzur gard latmosfer borlamer Pwintosab, Lesalinn ladan. U fini santi enn travay ki finn devlop lor letan sa. So bann melodi osi interesan: kumadir enn espes bluz Morisyin ki byin reflet latmosfer landrwa klas travayer viv dan Porlwi. Menwar rakont lavi Porlwi dan plizyer so bann sante. U tann refleksyon ki dimunn fer lor realite ki zot viv kuma so sante “baz militer” kont baz lor Diego. Ena fwa u mem tann latmosfer bann veye politik dan bann gran mobilizasyon klas travayer ladan. U tann son langaz dimunn dan fobur Porlwi.

So travay imans.

Menwar finn tir plizyer albem an form kaset ek CD: Suvenir lepor an 1980, Letan Lanfer an 1982, Kiltir de Zil an 1984, Pop lekonomi an 1998, Leko Rivyer Nwar an 2002, ek Ay Ay Lolo an 2006. Li finn osi zve dan buku-buku konser mizikal Moris ek lot pei. Buku dimunn ankor rapel li dan grup Soley Ruz lontan. Buku dimunn finn tann li zve enn u de morso dan kit aksyon solidarite avek klas travayer kuma dan konferans Diego ki LALIT ti organize an 2010, uswa kan ti ena protestasyon kan Bush ti pu vinn Moris pu konferans AGOA an 2003.

Li finn osi dedye buku letan pu teoriz so travay – li finn ekrir enn liv metod pu zve ravann ek li ansam ek lezot kamarad finn met dibut enn lekol ravann ki finn ede pu ki sa linstriman-la re-popilarize. Buku mizisyin ki finn travay avek li finn inspire par so travay, ek finn azut lor travay ki li, li finn devlope. Kaya par ekzanp, ti zve ar Menwar lepok 1982. Buku gitaris jazz koni isi finn zve avek li. Ena osi Kerwin Castel ek Kirty Oclou ki finn zve avek li pandan buku lane ek aster pe devlop zot prop stil. Zot fek tir enn CD apel “Lespri Ravann” ki deza pe gayn enn bon lakey parmi dimunn ki kontan ekut lamizik.

# LALIT CHALLENGE: IS GOVERNMENT CEDING ON DIEGO GARCIA?

LALIT wrote to the Prime Minister  
for clarification about the weak line on Diego Garcia in the President's Speech,  
compared with the stand taken during the elections. Here is the letter:

Dear Sir,

## **RE: Government Commitment to Take the UK to the ICJ**

LALIT is writing you this open letter to call for a public clarification on your newly elected Government's strategy on Chagos. On 22<sup>nd</sup> December 2014, we wrote to Minister of Foreign Affairs, Hon Etienne Sinatambou, to appreciate that, at long last, political parties that are in Government have taken a firm stand in favour of putting a case before the International Court of Justice at The Hague on the issue of the re-unification of Mauritius through the completion of Mauritian de-colonization by means of the re-inclusion of Diego Garcia and the whole of Chagos within the Republic. This huge step means putting into practice what is already in the Constitution. We presume the new Government's intention is to request an "advisory opinion", given that the UK does not accept binding jurisdiction from any present (or even former) Commonwealth member or ex-colony.

## **CLEAR STANDS**

### **Clear Commitment of Lalyans Lepep during electoral campaign for December 2014 General Elections**

Mr Anil Gayan, candidate of Lalyans Lepep, in a political broadcast on MBC, took a clear public commitment that should Lalyans Lepep come to power, Mauritius will go to the International Court of Justice on the issue of Chagos. This, we believe should be done.

### **Cabinet Decision on the illegality of "Marine Protected Area"**

In the Cabinet meeting of 9th January 2015, to complement Government's stand to go to ICJ, Cabinet reaffirms its position on the illegality of the "Marine Protected Area". We quote from Cabinet Decisions – 9 January 2015 on your PMO website:

*"3. Cabinet has taken note of the status of the proceedings initiated by Mauritius on 20 December 2010 against the United Kingdom ...[under] the United Nations Convention on the Law of the Sea..*

*. "Government wishes to state that (a) it maintains the sovereignty of Mauritius over the Chagos Archipelago, and the illegality of the excision of the Chagos Archipelago from the territory of Mauritius prior to its accession to independence; and*

*(b) it affirms in full the stand adopted by Mauritius with regard to the illegality of the "marine protected area" purportedly established in 2010 by the UK Government around the Chagos Archipelago. It looks forward to the Award of the Arbitral Tribunal...."*

### **Position on Chagos in the 27 January President's Speech on behalf of Government needs clarification**

We quote from the *govmu.org* site under the heading Government Programme 2015 – 2019:

"280. Government is much concerned at the lack of progress made to date to resolve the long-standing dispute over the Chagos

Archipelago. Every effort will be made to speed up diplomatic talks with the UK and US Governments and actively seek the support of the international community in this respect.

"276. Government will, in collaboration with international cooperating partners and like-minded countries continue to promote and preserve peace and security in Africa and the Indian Ocean region."

### **Critical times**

In 2015, we are in critical times.

The illegal lease's 50-year duration expires in 2016. According to this illegal lease, negotiations for renewal of the lease were supposed to begin, and were no doubt begun, in 2014. This is why the USA is seeking so desperately to penetrate Mauritian society, whether through NGOs, visits to schools, Youth Ministry penetration, a flurry of scholarships, etc as well obviously as upgrading their State of Forces Agreement (SOFA) if possible, and penetrating services like Customs and Coast Guard.

The recent Ramgoolam Government criminally neglected the Diego Garcia issue, and successive Governments before that have done the same, this ever since Independence. Navin Ramgoolam took the dossier out of the hands of his Foreign Minister Arvind Boolell, and set up a Unit in the Prime Minister's Office to supposedly look after the issue personally. He announced that he had a "secret" strategy. Today it is high time that whatever this strategy was be made public. There is no place

for secret strategies in diplomacy against imperialist powers.

Now, the Government of Mauritius has only until next year to act so as to stop the renewal of that ever-illegal lease between the UK and the USA for the island of Diego Garcia, on which, as you know, there is the huge US military base, with nuclear materials and hardware. This base was the direct cause of the cruel displacement of the entire Chagos population, even though it was supposed to be a mere “communications station” as you have often informed the public. Last week there is new evidence of US torture operations of the most shameful kind, dishonestly covered up by the UK executive, being carried out on this part of Mauritius. On principle, our territory should not be up for use for B-52 bombers and other aggressive machines of war like nuclear submarines, in any case. Mauritius has not declared war on any of the countries that the US has invaded from our territory. We must get international support for the decolonization and re-unification of Mauritius, on the basis of the need to get the base closed, as well as on principles of national sovereignty. There is the general need for peace in the Indian Ocean region, as well as respect for the new Pelindaba Treaty for a Nuclear-Arms Free Africa. At the same time, Government should, in liaison with Chagossians, elaborate a re-settlement plan.

## Conclusion


In LALIT, to be frank, we are disappointed at the apparent neglect of any mention in the President’s Speech of the commitment to taking the case to the ICJ. We hope this is not a sign of capitulation in exchange for some kind of UK-Mauritius Trade and Investment venture. The Diego Garcia issue has been haunted, in the past, and up to

now, by this kind of concession made by the UK and USA to the Mauritian capitalist class, in exchange for docile negotiations on Diego instead of proper principled action. Going to the ICJ

would be a fine example of proper principled action.

Yours Sincerely,  
Ragini Kistnasamy, for LALIT,  
6th February 2015

## LOAZIS LEKOL ALTERNATIF DAN LARENYON



Depi lafin Ut 2014, enn lekol alternativ finn uver dans lavi St-Louis, lor sime Silaos, dan Larenyon. Li apel Loazis Bann Zanafan ek sa nom la finn swazir parski enn loazis se enn landrwa anplin milye enn dezer kot kapav truv dilo ek lonbraz. So bi zisteman se pu akeyir zanafan maternel ek primer avek enn lot regar pu ki zot evolue dan enn atmosfer kot zot ena sitan konfyans dan zotmem ki zot gayn lanvi aprann. Ena 15 zanafan (6 maternel + 9 primer) ki ankadre par 4 adilt.

Lekol la finn pran nesans atraver enn lasosyasyon paran ek edikater apel Salanganes. Li enn lasosyasyon indepandan ki depi 3-an pe konsyantiz profeser ek paran lor lexisans bann teknik ranforsisman pozitif ki amenn epanwisman zanafan alor ki bann metod otoriter ek koersitif fer ditor. Li pa vedir les zanafan fer seki zot anvi, me se donn enn kad ki kering e pran konsyans ki enn zanafan ki ‘minant’ li pe zis dimann sa kad byenveyan.

Alors lasosyasyon finn kree sa lekol kot li met anplas enn pedagozi inovan. Dan fondasyon reflexion otur kreasyon enn lekol alternatif, ena konsyans ki Sistem ledikasyon ki Leta Franse inpoze li viz pu perpetye sistem kapitalis. Anfindkont lekol tradisyonel (ki an-pasan inyor lang maternel buku zanafan Reyone malgre bann diskur) so bi se pu furni mindev

ki konn sifizaman lir-ekrir pu rur masinn, produr bann byen, akeyir turis, etc. Me so bi se pa pu ki enn dimunn atenn enn ot-nivo reflexion ek epanwi dan so lavi. (E mem si ena profeser byenveyan ki keyr ek ki ti a byen kontan atchiv sa epanwisman, zot retruv zot avek klas sirpeple, tutsort evalyasyon e kontrennt ki rann li inposib dan sa sistem la).

Ena plizyer laspe ki rann Loazis diferan depi lekol tradisyonel me usi depi bann lekol prive peyan ki rezerve pu bann elit.

## Ledikasyon ansam ar paran

Bann paran avek lekip lekol travay ansam avek enn bi edikatif komin. Anplisdesa, bann paran inplike dan lavi tulezur lekol (netwaye, fer manze lor rorster, aranz letazer, etc.). Rol paran pa zis pu depoz zanafan kot geyt lekol.

## Aksesibilite pu ti-reveni

An atandan ki Leta Franse resi aksepte pu sibvansyonnn enn tel lekol (5-an minimem), li oblize peyan. Me kontrerman a bann lekol prive payan kuma Montessori kot lekolaz kut 600•/mwa, bann fiys proporsyonel a reveni bann paran. Li al depi 50• ziska 300•. Ena usi posibilite pu fer trok: ena enn madam ki enn potye. So zanafan skolarize san li bizin deburs okenn larzan ek anesanz li vinn montre zanafan fer potri enn fwa par semenn.

## Akey spesyalize

Ena plas rezerve pu bann zanfan ki swiv par lasistans sosyal parski zot orfelin uswa zot dan bann sityasyon familyal sitan difisil ki lasosyete bizin okip zot.

## Finalite edikatif

Dan Loazis, bann zanfan la esansyelman pu epanwir fizikman, emosyonelman, mentalman ek devlop zot potansyel kreatif. Bi final se pu ki sak zanfan epanwi dan relasyon ki li ena avek limem, avek lezot ek avek so lanvironnman. Lalis bann kompetans ki sak zanfan bizin devlope selon bann dimunn dan minister an Frans li segonder. Okontrer, nu panse bann zanfan pu al buku pli lwen ki enn lalis.

## Pedagozi

Ena 4 pedagog ki inspir metod ki servi dan Loazis: Célestin Freinet, Maria Montessori, Ovide Decroly ek Rudolf Steiner. Pwin komin ki ena ant sa bann metod se ki zanfan pa konsidere kuma bann resipyan vid ki bizin ranpli me kuma bann akter zot prop aprantisaz. Tutlong lazurne servi bann zuti ki amenn kestyonnman, tatonnman ek reflexion. Parey kuma zanfan aprann marse ek koze san ki li bizin asiz lor enn ban devan enn profeser, ena buku lezot nosyon ki li kapav akerir dan enn fason natirel.

## Lekol plirileng, artistik, ekolojik

Aprantisaz baze lor lang maternel zanfan me ena bann aktivite pu insit kestyonnman lor lezot lang (+ enn latelye lor kiltir Larenyon)

Dan lapremidi, ena enn aktivite artistik ki anime par enn artis: lapintir, potri, lamizik.

Lekol la truv dan enn laferm kot zanfan viv ek fer viv biodiversite.

Enn ti apersi enn zurne lekol. Li dekup an morso 45 minit

1. Lakey fer pandan 45 minit: zanfan kapav arive dan so ritm, sa les letan pu ki sak paran kapav koz ar lekip, li enn tranzisyon ant lakaz ek lekol ki pase dusman.

Zanfan kapav lir, desine, zwe Lego, alonze, fer zot travay.



2. Rasanbleman: enn ti morso lor lagitar sinyal zot ki zot bizin ramas seki zot pe fer. Fer enn serk deor kot sakenn dir kuma li pe santi limem ek aprann disteng bann lemosyon (par exanp diferans sibtil ant tristes ek deseptyon). Lerla inpe lexersis an Angle. Apresa rant dan klas pu enn per zanfan anons dat ek program lazurne. Kapav usi diskrit enn zafer ki finn pase dan zot fami, kartye, lor televizyon.

3. Swazir ant 'Bonzur bann zaimo' uswa 'Bonzur potaze' (fer enn swa ek asim li deza edikatif ek ogmant self-estiym). Kote laferm, ena dizef pu ramase, donn manze ek bwar. Kote potaze ena pu aroze, dezerbe, mezir bann plant.

4. Ti poz zwe ek manze pu 30 minit.

5. Dan Vandredi ena Konsey. Ena eleksyon enn prezidan seans ek enn sekreter. Nu kumans par selebre bann reisit (intel fyer parski li finn resi lir tusel, enn lot inn resi fer enn dinozor avek larzil, etc.). Apre zanfan expoz bann problem (intel finn perdi bann pyes Lego, enn lot inn tuy enn bebet bondye,...) Sakenn donn so lopinyon, truv enn solisyon, enn reparasyon ek enn regleman silefo.

6. Ler manze, sakenn ena so 'Servis' pu enn semenn (amenn lasyet, dilo, debarase ek lav vesel).

7. Apre manze ena enn letan kalm kot nu dan enn Yurt. Kapav fer Lego, Meccano, tresaz lastik an silans. Apre 20 minit, enn ti morso lagitar indike ki bizin ramas tu manipilasyon ek trap enn liv. Li kapav enn band-desine, enn albem etc. me li enn letan lir pu plezir. Suvan bann ki pa konn lir dimann enn adilt pu lir ek zot fer enn grup pu ekute. Sa derul enn 15 minit ek lerla enn lamizik kalm kumanse. Sak zanfan al remet so liv dan so plas, rod enn plas anba, alonze ek relax. Dan silans, fer inpe lexersis lor respirasyon, fer enn vizyalizasyon sipa zot pe anvole, uswa lor enn disab byen mu, uswa pe flote.

8. Enn grup al fer latelye avek artis ek enn lot al dan klas (grup sanze apre 45 minit). Dan klas, sakenn ena so planing pu enn semenn kot li finn marke ki li pu fer 2 exersis Matematik, enn lexperyans, 2 exersis lir etc. A sak fwa nu sey fixe enn obzektif: "mo pe fer tel lexersis pu aprann...". Travay fer dan lord ki zanfan swzir me la fin la semenn, bizin inn resi fer tu. Lerla li evalye si li satisfe avek so travay, li sinye, profeser sinye ek li amenn so kaye lakaz pu paran sinye.

9. Apre enn ti brek, nu fer Bilan lazurne. Sak zanfan marke kuma li santi limem, ki li finn resi dan la zurne ki fek pase ek ki li finn aprann (sa se enn dimansyon meta-kognitif: aprantisaz vinn enn akt konsyan). Nu chek lor tablo konportman seki finn pas byen u mwin byen. Lerla fer enn larond pu dir orevwar.

Finn bizin buku letan avan resi met sa dibut. Li ti ase derutan pu bann zanfan pu ena otan lotonomi dan enn premye tan me enn fwa ki zot finn metriz li, li vinn enn plezir extra. Kan anons zanfan ki vakans pe vini, zot sagrin terib!

J-Y

OXFAM  
1% DIMUNN POSED  
LAMWATYE LARISES

OXFAM finn pibliye so rapor lor inegalite dan lemond pu 2014. Ladan li dir ki 1% dimunn pli ris posed 48% tu larises ki finn prodir onivo mondyal. Sa 1% dimunn la pu posed plis ki sa lot 99% popilasyon mondyal ariv 2016. Ant 2000 ek 2014, larises sa 1% dimunn la finn ogmante par 50%.

Seki ankor pli sokan. Parmi sa 1% top 80 dimunn la an 2014 ti posed ekivalan reveni total 3.5 milyar dimunn, lamwatye planet. E zordi ankor ena ideolog ki vinn afirme ki analiz Marx lor kapital (ek minorite kapitalis) finn depase, ki lemond swadizan meyer!

Plis ki 150 an desela Marx ti explike ki larises sa minorite kapitalis la li pa rezilta zot travay me li sorti expropriasyon travay lezot. Inegalite kriyel ki nu pe truve zordi dan lemond li pe vinn konfirm analiz Marx e sirtu so konklizyon praktik. Setadir pu liber limanite depi lopresyon ek explwatasyon nu bizin liber nu depi sa minorite kapitalis la par expropriye sa kapital ki zot finn expropriye depi zenerasyon travayer. Sa li tuzur lor azanda.

Agrandisman dramatik inegalite pe amenn dimunn osi disparat ki lepap Francis ek direktis IMF Christine Lagarde pu koz lor danze lamonte inegalite dan lemond. Me, zot pa koz inegalite ant kapitalis ek travayer, me selman lekar dan saler. Obama pe mem propoz met 1% tax lor seki pli ris pu finans so plan sosyal. Ena mem dirizan Parti Repiblikin kuma Jef Bush ki pe koz lor inegalite saler. Anmemtan, isi sef patron kuma Bheenick ek Cheeroo pe koz kont inegalite saler.

Li vo lapenn gard antet ki tu sa bann dirizan pa pe met an kestyon inegalite anterm pozasyon ek kontrol kapital, e zot pena okenn lintansyon aboli inegalite ubyin povrete tukur. Zot ule selman anpes revolisyon.

## LASINN KUMANS RANPLAS FMI KUMA PRETER DERNYE REKUR

Kan Larisi ti truv valer so larzan Rub bese an Desam 2014, e Obama ti pe anonse ki Prezidan Putin, avek problem bes pri petrol plis lager Ikrenn, pu “tonbe” aköz FMI pa pu pret li larzan, li pa ti realize ki Lasinn pu vinn preter larzan dernye rekur pu Larisi. E Lasinn pu fer sa san tu sa kondisyonalite ki FMI abitye mete.


Wi, zordi, kan enn pei o-bor bankrut, USA nepli kapav zis dikte li kuma li anvi. So lekonomi nepli permet. Mem zafer pu Lerop. Alor, Lasinn pe ranplas FMI kuma “*lender of last resort*”.

Kan Lagres ena enn nuvo Guvernman ki pa pe dakor pu ranburs so det lor kondisyon ki Lerop exzize, e kan natirelman FMI refize, li osi, byin vit Lasinn vinn an ed. Sa donn Syriza, parti degos fek eli, enn marz de manev. Pa zis sa, me Obama, aköz li ankonpetisyon avek Lerop ek Lasinn, anonse ki Lerop bizin rey det Lagres!

Nu viv dan lepok byin interesan.

Telman ena bulversman ki Mme Lagarde, sef FMI, finn anonse ki FMI inn sanz so “Mission Statement”, setadir so “bi iltim” pu inklir “lalit kont inegalite”. Natirelman li pe koz inegalite saler, pa inegalite anterm posed kapital. Fode zot pe vreman krenn

enn rebelyon grander enn revolisyon, pu zot koz inegalite, kanmem. Pa zis sa, me Parti Repiblikin dan Lamerik, li osi, inn dir bizin lite kont inegalite. E, avan li ti ferme Alcatraz, R. Bheenick, kan li ti Direkter Labank Santral Moris, li osi ti dir ki su Ramgoolam inegalite sosyal inn tro ogmante. Bann ideolog kapital finansye pe kumans realiz limit zot sistem, zot mem. Me, pa par zot mem. Li plito parski finn ena tantativ ver sanzman radikal dan Lamerik Latinn, e asterla sa pe vinn dan Lagres, e petet Lespayn, Litali ek Lairland. Se sa ki finn ed zot kritik zot prop sistem. Remarke ki Mamood Cheeroo, ansyin sef MCCI, zordi Prezidan NESC (National Economic and Social Council), ki sipoze travay ver konsansis sosyal, li finn osi azut so lavwa pu deplor sa inegalite agrandisan dan saler, ant gran “travayer” ek ti-travayer. Li finn atribiye li, avek rezon, pa a “pos de povrete”, me a nivo saler klas travayer tro ba, ek gran kad tro ot. Oxfam so letid, ki ti sorti dan sa mem fule la, ti akablan: “Ariv 2016, setadir dan enn an, top 1% dimunn anterm larises, pu posed plis ki lot 99% dimunn lor planet.” (Get nu Lartik lor letid Oxfam akote).



Desin Herbert Sandberg, 1976



# NETANYAHU v/s OBAMA

Enn kote, nu ena Netanyahu, kandida pu vinn Premye Minis Israel. Israel finn e pe kontinye azir kuma enn *Leta bandi* e li sel pei ki posed zarm nukleer dan Mwayen Oryan.

Lot kote, nu ena Obama, Prezidan Lamerik. Lamerik enn *Leta reseler*, dan lesans ki li pe su-lwe Diego ki form parti Chagos depi ki Leta Britanik finn demantel enn pei Lafrik (Moris) e konfiske ilegalman tu lil Arsiipel Chagos, e lerala permet Lamerik instal enn baz militer lor Diego Garcia. Zordi Lamerik pe vyol trete Pelindaba pu enn Lafrik San Nukleer par stok armaman nukleer lor baz militer Diego.

Israel ek Lamerik tulede kupab lokipasyon militer ilegal, enn lor Palestinn e lot lor Diego. Zot tulede kupab stokaz zarm nukleer dan zonn kot pa sipoze.

Nu get enn-de bann fe otur sa konfli la.

## Invitasyon orater

John Boehner, Spiker Kongre US finn invit Premye Minis Israel Netanyahu pu adres enn renyon konzwin Kongre-Sena Lamerik le 3 Mars 2015.

Netanyahu sipoze pran laparol pu sey inflians politik etranzer Lamerik vizavi Liran so program nukleer. US, UK, Lasinn, Lafrans, Lalmayn ek Larisi (P5+1 setadir 5 Manb Permanan Konsey Sekirite UN + Lalmayn) pe negosye avek Liran pu enn Lakor lor so program nukleer an esanz pu lev sanksyon kont Liran. Depi 18 mwa ena negosyasyon ki sipoze debus lor sinyatir enn lakor interimer le 24 Mars avek Liran lor so program nukleer, e ver enn lakor final avan le 30 Zin 2015. Sa li an esanz pu lev sanksyon avek garanti depi Liran ki li pa pu fabrik zarm nukleer. Negosyasyon ant Liran dan so faz kritik. Negosyasyon li otur enn lakor ver enn rezolisyon politik pasifik pu rezud sa isyu la.

Invitasyon Spiker Republikin Kongre US a Netanyahu li enn muv pu sey anbaras Prezidan Obama ek bann Demokrat. Linvitasyon inn fer san pas par Prezidan. An memtan, Netanyahu an plin dan kanpayn elektoral e sa diskur divan Sena-Kongre li nek 2 semenn avan Eleksyon Zeneral dan Israel ki pu ena lye le 17 Mars 2015. Alor ankor enn fwa pe dilye enn keston osi inportan kuma enn Mwayen Oryan san nukleer par bann taktik politik partizann ant Demokrat ek Republikin dan Lamerik. Netanyahu, li pu adres bann Senater ek mam Kongre USA an tan ki kandida dan eleksyon zeneral dan Israel. Alor, nu kapav atann ki diskur Netanyahu li pu kuma enn ekstansyon so kanpayn elektoral pu so re-eleksyon.

Nu rapel bann lekter ki dernye diskur Netanyahu an 2011 divan Kongre ti vinn zistifye lokipasyon militer Palestinn par Leta Israel. Li ti defann Israel so politik kolonizasyon atraver annexe later Palestinn, e li ti refiz rekonet drwa refizye Palestinyin. Netanyahu pe uvertman dir ki so diskur pu pled an faver intansifye sanksyon kont Liran e mem menas enn intervansyon militer kont Liran. Li pe sey ris Lamerik dan enn lot lager dan Mwayen Oryan.

Ena enn kanpayn ki apel "*#SkiptheSpeech*" inisye par Code Pink kot *Jewish Voice for Peace*, *US Campaign to End the Israeli Occupation*, *National Iranian American Council* (NIAC), ek *RootsAction* finn zwenn ansam pu mobilize dan Lamerik pu dimann bann mam Kongre ek Sena pu boykot diskur Netanyahu.

## Veritab keston

\* Iran, Israel ek zarm nukleer: Iran inn siyn trete non proliferasyon zarm nukleer (NPT)

tandi ki Israel inn refiz sine ziskaler. Ena zis 4 pei ki pann siyn sa trete la: Lend, Pakistann, Kore di Nor ek Israel. Iran finn uver tu so bann instalasyon nukleer a tu inspeksyon internasyonal su Trete NPT tandi ki Israel inn zame ni dir, ni niye, si li ena zarm nukleer, e Israel finn sistematikman refiz tu form inspeksyon. Zame pa finn ena okenn prev kredib ki Iran inn met anplas enn program pu fabrik zarm nukleer. Tandi ki lot kote ena ase prev pu dir ki Israel anfet posed enn arsenal zarm nukleer sofistike.

\* Malgre tu sa bann diferans flagran ant Israel ek Liran zot program nukleer, u ti kapav panse ki Liran ki reprezant pli grav menas nukleer dan Mwayen Oryan e dan lemond. Kan aktyelman se monopol nukleer Israel e so arsenal militer siper sofistike ki responsab pu kree instabilite dan Mwayen Oryan e ki reprezant enn grav menas a sekirite dan lemond.

\* Alor kimanyer Netanyahu, Premye Minis Israel e kandida pu so prop re-eleksyon lor enn program pu kontinye lokipasyon militer ek kolonizasyon Palestinn, atraver anexasyon later Palestinn, ki fud tu rezolisyon Nasyon Zini, ena drwa moral pu vinn pled kont lakor politik avek Iran, pe dimann intansifye sanksyon kont Iran, e al ziska pus ver enn intervansyon militer kont Liran? E sa divan bann eli dan Lamerik. Kot li gayn sa kalite tupe?

## Kot Deba ti Bizin Ete

Veritab deba ti bizin lor enn Mwayen Oryan san nukleer, enn rezyon ki deza lamine par plizyer konfli arme. Isi nu sit lokipasyon militer Palestinn par Leta Israel, syez Gaza par Leta Israel e bombardman mertriye Lepep Gaza par Larme Israel. Fas a grav konfli Izraelo-Palestinyen, dan LALIT nu finn expoz

kontradiksiyon flagran ki ena ant rol USA kuma bayer de fon pu arm Izrael ek anmemtan azir kuma swadizan “kurtye lape” dan sa konfli. Zordi ena enn lot dimansyon sir-reel ki finn azut a sa sityasyon deza grav dan Mwayen Oryan. Israel ek Ladministrasyon Amerikin paret finn rant an konfli lor sanse kisannla pe defann Mwayen Oryan kont zarm nukleer. Li sir-reel parski Lamerik li prinsipal furniser zarm a Israel; li finn konplis pu ki Israel azir san inpinite pu tu so bann krim kont lepep Palestinn; li finn konplis pu gard sekre lefet ki Israel ena zarm nukleer. Li fer tusala, lerla lot kote li, Lamerik, li pe okip enn parti teritwar Moris e li responsab pu gard armaman nukleer lor baz militer Diego. Sa fer tuzur avek konplisite Guvernman Britanik; e li tuzur an kontravansyon Trete Pelindaba pu enn Lafrik san Zarm Nikleer.

#### Sityasyon pre-elektoral Israel

Dan Israel, plizyer parti politik dan Israel finn kritik Netanyahu kan li finn aksepte invitasyon pu adres

Kongre-Sena kan li dan enn kanpayn elektoral. Finn ena protestasyon depi omwin enn parti politik divan komisyon elektoral Israel lor eski pu permet difiz diskur Netanyahu lor radio ek televizyon dan Israel. Attorney General finn anonse ki pena okenn pwin legal pu anpes media difiz diskur Netanyahu. Kontrovers pe kontinye dan Israel.

Ena enn nuvo lalwa elektoral, pase an Mars 2014, ki finn fer minimam vot pu enn parti ubyin lalyans parti sorti depi 2% a 3.25%. Sa pe osi rant dan kalkil Netanyahu. Sa sanzman la pe fors lalyans bann parti pu zot resi pas labar 3.25%. Alor sa pu sanz bann donn pu tu koalisyon potansyel apre elektyon. Alor Netanyahu pe ule servi so diskur pu sey inflians vot depi elekter parti extrem drwat pu sey ogmant marz ki ase sere ant so parti *Likud* ek parti *Labour*, prinsipal parti lopoziyon.

Kontrovers dan Lamerik pe kontinye. Sa diskur Netanyahu pe amerd *White House* e lor so tayming e lor konteni so diskur.

Prezidan Obama finn dir li pa pu zwenn Netanyahu kan li vinn Washington. Vis Prezidan dir li pa la pu ekut diskur Netanyahu sanse aköz li ena enn vwayaz.

Netanyahu finn plann so vizit pu kwinsid avek konferans anyel lobi Israel dan Lamerik AIPAC (American Israel Public Affairs Committee) ki pu fer dan Washington. Sa usi riske kree problem aköz AIPAC fonksyonn lor baz lobi bi-partizan, setadir Repiblikin ek Demokrat.

Alor diskur Netanyahu anplis ki maske veritab lanze dan Mwayen Oryan zordi, mine par plizyer konfli arme dan Lirak, Yemen, Lasiri, lamonte ISIS, lokipasyon Palestinn par Israel, poz kestyon eski Israel pa pe anfet debat pu ki li res sel zandarm imperyalism Amerikin dan Mwayen Oryan.

- \* Pu enn Mwayen Oryan san Zarm Nikleer!
- \* Pu enn Palestinn Lib!
- \* Pu enn Lafrik San Nikleer!
- \* Pu anbargo zarm lor Mwayen Oryan! Ferm Tu Baz Militer!

BK

Dan kad Fet Lindepandans  
**Komisyon Sindikal LALIT**  
 invit tu sinpatizan ek aktivist sindika alabaz  
 pu enn seyans get fim lor  
**lalit travayer minn sarbonnter**  
 ki finn gayn buku pri internasyonal

**Harlan County, Kentucky**  
 par **Barbara Kepple**

apre ki nu finn get fim la,  
 nu pu ena enn deba.  
 Nu pu sirtu get manyer fim la  
 get lalit travayer,  
 lyin ar sindika,  
 rol dirizian sindika,  
 rol fam dan sa lalit la,

e

manyer ki konesans ek lexparyans lalit avan  
 finn kontribuye dan lalit la.

**Kontakte militan LALIT pu invitasyon, ubyin sonn 208 5551 ubyin 208 2132.**

# INTERVYU ALEXIS TSIPRAS, LIDER SYRIZA

Sa li tradiksyon enn extre enn intervyyu fer par par Haris Golemis zis avan parti degos Syriza anfet gayn eleksyon dan Lagres.

**Q:** *U ti enn parti ase marzinal 3 an desela. Zordi u pre pu ranport laviktwar dan eleksyon zeneral. U pre pu vinn Premye Minis. Ki fakter ki finn amenn sa lamonte sa parti degos la? Eski pu enasanzman similer lezot pei Lerop?*

**R:** Lefe Kriz lor sosyete Grek finn devastater. Alor, li pa etonan ki ena sanzman mazer dan peyzaz politik. Syriza finn tultan ena enn analiz byin detaye natir sa kriz ekonomik la, e lor lakoz profon sa kriz la. Bann parti tradisyonel finn, par kont, amenn dimunn dan bato – e zot finn fer li figir dekuver – tandi ki nu, nu finn persiste mintenir ki politik losterite pu ena rezilta negativ, pu amenn resesyon. Sa kalite politik la napa kapav kontinye lor letan, nu ti predir. Anmemtan, nu finn sutenir buku linisyativ alabaz inpe partu, nu finn dan gran manifestasyon, e dan muvman solidarite sosyal ki finn leve dan Lagres. Kote politik, nu finn travay ver linite lagos. Sa ti inportan. ... E malgre enn kanpayn pu fer per par lapres, nu finn kontiyn grandi.

Nu finn travay byin dir dan Syriza pu elabor enn program detaye lor kimanyer Lagres kapav sorti depi kriz. Ant-ot, nu finn montre kimanyer bizin fini ar politik losterite, anmemtan renegosye kondisyon det Lagres.

Kumsa ki zordi nu ena enn program global pu adres sa det la. Seki kle ladan se: renegosyasyon kondisyon sa det la ar nu partner dan Lerop; enn plan detaye pu krwasans dan lekonomi; adres somaz; ranforsisman welfer steyt; sulazman pu dimunn dan sosyete ki pe pli sarye fardo sa kriz la. Li inportan ki nu fer sa bann sanzman la: losterite e kupir bidzeter napa kapav sesteyn. Sel zafer zot fer se ankor plis destriksyon koezyon sosyal.

Lamonte ek laviktwar nu parti Syriza li pa pu zis enn “eleksyon koreksyon”. Li pa pu zis akoz bann parti tradisyonel finn amenn larwinn Lagres amizir kriz la finn morde, non. Syriza li pe atir elekter parski li sel parti ki ena enn alternativ vyab pu Lagres sorti dan sa kriz la. Dan eleksyon Linyon Eropyin resan, nu finn sorti premye [dan Lagres] avek enn lavans 4%; e depi sa, nu finn ogmant nu skor sak eleksyon. Nu finn gayn plis vot ki koalisyon opuvwar. Nu pu truv enn gran sanzman prosennman, me sa pa pe fer nu res lebra krwaze. Nu angaze pu sa travay divan nu, ki li lor nivo politik ek sosyal. Nu pena okenn ilizyon lor grander defi divan nu, kan nu vinn opuvwar – li pu enn gran premyer istorik pu nu, e pu Lerop an antye. Nu ena determinasyon pu al delavan, avek sutyin lepep, atraver batir konsansis, me anmemtan, nu pa pu evit konfli kan konfli bizin ena. Kuma F. D. Roosevelt ti dir, “*sel zafer nu bizin per se ... laper limem.*”

Lor dezyem but u kestyon, anfet anmemtan ki sa buzman politik dramatik dan Lagres, finn ena tandans similer lezot plas, sirtu dan lesid Lerop. United Left ek Podemos finn reysi gayn 18% vot Lespayn dan eleksyon Eropyin, preske mem kantite ki Sosyalis ek Parti Popiler ki finn degradingole apre. ... An 2015 nu pu gete si sa formasyon degos kontinye grandi. Sinn Fein finn osi ranport sikse, e Lairland ankor enn sa bann pei ki pe al lor bankrut. Litali osi ena enn siyn lamonte lagos, parey dan Slovenia.

Kumansman bann lane 1990, seki finn arive se bann sosyal-demokrat Lerop finn fer lalyans pu promuvwar neoliberalism partu dan Lerop. Zordi zot pe peye pu sa erer la. Samem kifer lagos dan Lerop li sel lespwar pu transand sa kriz la. Tu sa inpoz-

isyon losterite par bann guvernman konservater ek sosyal-demokrat finn ariv zot pwin de non-retur. Tu pu baskile: bann konsiyn Linyon Eropyin lor politik fiskal tu sinpleman pa kapav met anpratik. Li inposib. Si Lerop pa vir agos – pran sime krwasans ekonomik, travay desan, konsolid welfer steyt – lezot swa pu extremism extrem-drwat ek priz puvwar parti anti-Lerop mem. Sa pu amenn enn rekil terib.

Sanzman politik rapid atraver Lerop finn arive akoz kriz, e sa finn ede pu lagos dan buku pei kree nuvo oportinite. Lalit sosyal pu travay desan e pu dinite, li kritik – e lagos angaze anfaver sa. Pli lagos for, pli sans ena sanzman mazer dan Lerop ki kree enn nuvo balans de-fors de-klas anfaver “travay”. Syriza ule azir kuma enn katalist pu sanzman, e kree enn “lefe domino”.

Li inportan ki nu travay li pa zis pu aboli losterite. Nu misyon li pa zis pu terminn sa travay sosyal-demokrasi post-WW2 ki finn abandone. Seki nu ule se pu permet enn transformasyon radikal sosyete, atraver Lerop net, baze lor sosyalism e lor demokrasi. Sa nu bi. Pu sa, nu pe form nuvo lalyans kote sosyal ki pu inifye klas travayer ek klas mwayenn, intelektuel, muvman sosyal, otur enn lalit an-komin: setadir enn lalit pu liber sosyete depi ket debride pu profi, e nercher lazistis sosyal ek demokrasi, kree enn lekonomi ki ena bi pu donn lepep seki li bizin, devlop enn welfer steyt ki asir ledikasyon, lasante ek dinite pu tu dimunn. Si nu ule reysi fini ar sa politik “marse lib”, ki responsab trenn Lerop dan labu sa kriz ekonomik la, lagos Lerop bizin ena enn stratezi politik ki fezab, ki realizab, ansam ar enn vizyon inifikater – sa al ansam.”

*Depi United Europe Divided  
Europe: Transform!*